

明
清
史
料
丙編
第九本



(96356·1C9)

明 清 史 料
丙 編
十 本

版權所有 翻印必究

中華民國二十五年十一月初版

全部^{連布}實價國幣玖元
第九本實價國幣玖角
外埠酌加運費匯費

編輯者

國立中央研究院歷史語言研究所

發行人

王雲五
上海河南路

印刷所

商務印書館
上海河南路

發行所

商務印書館
上海及各埠

平

明清史料目錄

丙編第九本

八百零一至九百葉

平南王揭帖

八一

廣東巡撫李棲鳳揭帖

八一

江西巡按張嘉題本

八二

湖川總督羅繡錦殘題本

八三

延綏巡撫董宗聖題本

八四

戶部題本

八五

刑部等衙門殘題本

八六

廣東巡撫李棲鳳揭帖

八七

廣西左翼總兵馬雄稟

八八

署潯梧參將等稟

八九

陝西巡撫馬之先揭帖

九〇

戶部題本

九一

戶部題本

九二

平南王揭帖

八一

湖川總督祖澤遠揭帖

八二

廣東巡撫李棲鳳揭帖

八三

吏部題本

八四

陝西巡按王佐題本

八五

兵部揭帖

八六

吏部題本

八七

江西巡按張嘉題本

八八

戶部題本

八九

湖川總督祖澤遠題本

九〇

平南王殘揭帖

九一

瓊州總兵高進庫揭帖

九二

廣東巡按楊旬瑛揭帖

九三

江南江西總督殘揭一 八三九

江南江西總督殘揭二 八四二

戶部題本 八四三

陝西總督孟喬芳揭帖 八四四

平南王尙可喜等題本 八四七

兵部殘題本 八四八

工科左給事中魏裔介揭帖 八五〇

直隸山東河南總督馬光輝揭帖 八五二

甘肅巡撫周文燁殘揭帖 八五三

兵部殘題本 八五五

兵部題本 八五八

刑科左給事中孫珀齡題本 八五七

靖南王耿揭帖 八五九

靖南王耿揭帖 八六〇

靖南王耿揭帖 八六〇

陝西平慶西鳳等處總兵李茂揭帖 八六一

延綏巡撫董宗聖揭帖 八六二

戶部題本 八六三

宣大總督馬鳴珮題本 八六四

原定南王女孔四貞奏本 八六五

叔和碩鄭親王跡爾哈朗等題本 八六六

直隸山東河南總督李蔭祖揭帖 八六七

偏沅撫院袁咨文 八六八

山東巡撫耿焯揭帖 八六九

直隸山東河南總督李揭帖 八七二

定南王下死難各官情由殘揭帖 八七四

廣東德慶開建州縣等官棄城案殘件 八七七

王道真自稱天啓太子案殘件 八七九

江西永新等縣失陷案殘件 八八一

山西巡撫陳應泰揭帖 八八三

兩廣總督李率泰揭帖

八八四

平南王揭帖

八八五

平靖兩王援勦新會高明殘件

八八七

平西王吳三桂等題本

八八八

兵部題本

八八九

戶部題本

八九一

平靖南王揭帖

八九二

平靖南王揭帖

八九三

抄白僞恢討左將軍等僞啓

八九四

兩廣總督李率泰揭帖

八九五

靖南王耿揭帖

八九六

平西王吳三桂殘題本

八九七

湖廣巡撫林天擎題本

八九八

部題楚督請催江浙完解協濟楚餉殘件

八九九

戶部題本

九〇〇

明清史料

丙編第九本

八百零一至九百葉

平南王揭帖順治九年正月初八日到本揭對同

平南王揭爲恢復雷郡事拾月貳拾陸日馬兵到遂溪起身至貳拾捌日兵馬至雷州府城內並無百姓止是空城房屋俱已倒壞草長砌住街道城牆四邊倒塌其北路并近城投過些離城叁拾里有河其河西有王翰的賊巢河南亦有賊兵未順今河水深大無船得渡職今收拾城牆一面招撫商議另計過所剿賊平定之日另報等情到爵等據此該爵等看得雷郡初定餘孽未靖四野荒蕪人民遯跡一面檄該道府廣布皇仁多方安撫一面檄該鎮將勦蕩餘氛其兵馬糧糗併檄鄰郡有司催運接濟以資戰守除具題外理合具揭須至揭帖者順治捌年拾壹月日

廣東巡撫李棲鳳揭帖順治九年正月二十二日到本揭對同

欽差巡撫廣東等處地方提督軍務兼管糧餉鹽法都察院右僉都御史李棲鳳謹揭爲塘報事順治捌年拾壹月初叁日准靖南平南二王咨據甲喇章京徐有才張文升爲飛報大捷事柒月拾貳日據防守乳源中軍都司葉得魁塘報白毛氈前已逃遁今復盤踞龍溪地方□□柴拾餘里雖隔稍遠勢欲侵犯乳地等□□恐迫門庭時難接應隨與雄詔各將商議卽於拾叁日督兵前往彼地復恐賊卒探知先行潛避職等密行計議於拾肆日連夜官兵下馬步行繞徑登險驀山度嶺拾伍日黎明趨至賊營逆賊知覺前來交敵才等鼓率各兵奮勇衝進當陣殺死賊兵數百有餘賊見我兵鋒銳難抵遂卸戈棄甲束手歸降其中負拒殘叛遁入長溪山內嶺高路窄不能追殺當收兵回營卽有傾心降服僞副將肆員兵丁壹百貳拾名前來歸順而各營兵丁獲得大小婦女小子壹千餘名口僞官家口肆口僞劉侯妻壹口□□肆張牛壹百餘頭大砲貳位旗貳拾伍面盔□□叁頂甲叁拾身刀肆拾口弓叁拾張箭數百餘枝長槍不計等情到藩合咨具題等因到職該職看得逆寇白毛氈卽僞淮侯劉國昌也竄踞龍溪地方荼毒生靈而甲喇章京徐有才張文升等秣馬厲兵潛師度險當陣斬級數百因疊復降肆將奪獲器仗纍纍可紀此皆仰仗皇威以致蕩除羣醜有功員役除俟通省大定另行彙敘外爲此除具題外理合具揭須至揭帖者順治捌年拾壹月拾捌日右僉都御史李棲鳳

江西巡按張嘉題本

巡按江西監察御史臣張嘉謹題爲恭報起解錢糧事竊念江省遭金逆叛後以田荒民亡之戶口歲增陸拾叁萬兵餉俱屬搜括款項兼以天災數年之水旱閭閻杼柚其空人不樂業土不生毛自陸年開城以來月復月年復年有司竭盡催科之心力猶無補於各鎮營呼○癸之急需矣藩司補苴無術勢不得不移彼易此內供錢糧起解不前職此之由然臣謬膺巡方之任自受事以來日奉咨劄催督憂心如焚蚤夜拮据終不敢以京解爲緩視也除前已解過工部柒年捐派城工抵補捌年正額銀伍萬玖拾陸兩外續催據左布政使盧震陽起解過戶部京庫貳次參價兵部會同館馬價工部前撫搜括捐助城工等項共銀貳萬柒千伍百叁兩貳錢玖分伍釐叁毫差瑞州府經歷朱英於玖月貳拾伍日起行赴部交納今又催據該司起解戶部陸柒捌年分京庫舊例加增折色農○黃白蠟絲綿絹苧布富戶葵苧菓品鹽○併○解住罰俸銀叁次參價贖罰等銀共伍萬捌千貳拾玖兩柒錢伍分陸釐玖毫柒絲捌忽肆微肆渺禮部陸柒捌年分牲口藥材銀壹千叁百肆拾陸兩肆分玖釐貳毫工部陸柒捌年分弓箭弦料胖襖褲鞋併花價軍器民柒併扛解四司料銀魚油蔴鐵兜皮狐皮天鵝野味翎毛苗水竹棕籐等銀共柒千肆拾肆兩陸錢貳分伍釐叁絲肆忽叁微以上通共銀陸萬陸千肆百貳拾兩肆錢叁分壹釐貳毫壹絲叁忽柒微肆渺見委南昌府檢校劉聲芳領解於捌年拾貳月貳拾陸日給批勒限起程前赴交納從○□□起解較前漸有起色庶可少抒持○□□□除各部款項細數清冊已經撫臣另咨送部查考外臣謹會同江南督臣馬國柱江西撫臣夏一鶚合先具疏題報伏乞勅下該部查收施行緣係恭報起解錢糧事理爲此具本差快手饒龍齋捧謹具題知順治捌年拾貳月貳拾壹日

湖川總督羅繡錦殘題本

(上缺)臣當日奉行嚴查速奏之旨不過爲弘猷誤軍餉折米價兩事耳前疏所悉之情竝未旁參一語亦曷嘗頌猷之功公似可以心服矣今公就司道報臣語意輒以朦溷責臣臣固不能無言也臣細揣公之苦苦作對者亦自有由如春間公行衡州道臣張兆鼐取造各官賢否詳臣應否造送臣復道當請讀公勅以定從違原未常必令造送也又公委安化知縣王武城因道臣郭萬象差役催糧武城將道差痛責本官旣抗不完糧臣移公酌撤正以急公營之糧也又因沅城被襲公移內有云孫可旺有賊捌拾萬造船叁千餘隻臣以爲自戊午來曾未見故明有如許之衆且辰河窄小何能容此多船乎但恐賊中之虛聲一張則人心之驚搖愈甚臣雖附報上聞此心實不敢信行道確查原非有心與公爭是非不過止地方之喧謠耳該道回文見據以上各事種種拂公公遂宿有數怨因而藉弘猷之事使臣知其辣手而欲隨波上下也殊不知臣濫叨督任與官民休戚相關若不爲公道主持一味徇公是非顛倒而繭絲地方明有國憲幽有鬼神臣亦不能逃罪也且公自奏之外又引撫臣金廷獻指臣之語謂臣不肯爲朝廷說真情若公臣所報孫可旺賊兵捌拾萬造船叁千隻移臣臣卽以入疏又何曾不爲實告乎旣謂臣不肯畫長策臣年老矣精力心思實有不逮公臣年旣英發爵位較臣最高且共事封疆何不出其所長以獻當宁乎事關係析緣由字逾格限統乞矜察施行緣係奏明朦溷情節仰祈聖鑒事理臣未敢擅便爲此具本專差官張光耀齎捧謹題請旨順治捌年拾貳月貳拾肆日總督湖廣四川等處地方軍務兼理糧餉都察院右都御史兼兵部右侍郎臣羅繡錦

(貼黃)總督湖川右都御史臣羅繡錦謹題爲奏明朦溷情節等事接邸報該沈永忠題前事奉有該部確察具奏之

延綏巡撫董宗聖題本

欽差巡撫延綏等處地方贊理軍務都察院右副都御史臣董宗聖謹題爲恭報查明延屬失守文武官員情形仰祈聖鑒勅部分別議處事案照順治捌年捌月初柒日准兵部咨覆該臣題前事等因順治捌年柒月拾玖日題貳拾日奉聖旨是依議行欽此欽遵抄出到部備咨到臣准此隨抄疏備行陝西按察司遵照發落嚴緝究擬去後順治玖年貳月貳拾伍日據該司按察使于時躍呈問得壹名柴化愚年伍拾歲係山西平陽府太平縣人由武進士于順治肆年貳月內除授延安衛掌印守備本年伍月貳拾捌日到任狀招延安衛與延安府設在同城有先在後謀叛被戮延安營參將王永強于順治伍年拾貳月內因姜逆叛亂蒙先在後被賊殺殉難延綏王巡撫并先在後被賊殺延綏沈總鎮調去神木府谷等處帶領馬兵前去防河止留先在後被擒梟斬王永鎮統領步兵防守府城間王永強于順治陸年貳月內在榆林倡謀叛亂先發賊兵于陸年貳月貳拾壹日黎明到府比化愚就不合失于防範以致王永鎮內應而城外賊兵卽入城內衆賊擁撲府堂將各官印信摘去倉庫錢糧盡行刼搶各衙門卷宗俱毀無存士民驚逃房屋焚燒多半又將本衛監內囚犯張一貞李氏打開監門徑自釋放其先在後被賊殺戮知府宋從心羈留城內後王永強率領賊黨至叁月初玖日到府殺死知府宋從心將化愚委黃龍山同知化愚行至黃龍山迤北叁拾里洛川縣地名石頭裏卽行逃回原籍訖後王永強領賊兵南下赴省行至蒲城等處地方遇平西王固山額真伯墨勒根蝦大兵撲剿將王永強殺死賊兵大敗比化愚當卽速赴軍前投見爲是又不合徑自逃回不來投見後蒙延綏董巡撫牌行布按兩司并分巡河西道備行本府查取失守并已未受賊僞職投誠脫逃官員文冊本府查將化愚受委未任脫

逃情由入冊類造呈報司道轉報各部院訖蒙延綏董巡撫會同陝西督撫具題順治捌年肆月初肆日奉聖旨著分別擬議具奏該部知道欽此欽遵抄出到部送司議覆問化愚于捌年陸月貳拾日投赴本府羈候呈報間蒙兵部除文職聽吏部議覆外將見在失守受僞各官議俱分別革職爲民并永不敘用因化愚等原冊報逃議緝擊另結等因于捌年柒月拾玖日具題貳拾日奉聖旨是依議行欽此欽遵抄出到部移咨延綏董巡撫又咨都察院劄行陝西王巡按俱案行本司行間本府將化愚投見情由呈報本司詳批柴化愚雖來投見已在報逃之後業奉嚴旨緝究難以因投請豁仰府確擬速報又蒙本司將前案關移榆林神木靖邊分巡河西肆道及延安府將各官遵旨發落并緝在逃官員去後依蒙除將賈勳等行令嚴緝獲日如律究招另詳外弔喚化愚到府該知府李肇源研審前情明白看得柴化愚雖冊註受委脫逃而其實變亂倉卒之間永強欲委以同知在化愚亦無以自主但跡其未至龍山而潛逃則雖委豈化愚所欲哉獨惜其不能早爲投誠至冊報之後方始來府卽亟爲申報亦已晚矣是以他員獲邀恩赦而私逃之愆烏容自追按律擬杖洵屬非枉問擬化愚官避難在逃杖罪招呈本司詳批柴化愚賊委潛逃不卽投誠律有應得之罪僅擬一杖殊屬徇縱仰府速勘確擬招報依蒙卽喚柴化愚到官該本府李知府覆審前情明白看得柴化愚身當逆亂不能固却永強之委罪難輕宥但未至廳署而卽已遞去則較之實受僞委者當不同科但旣不能堅却于先復不能早投于後按律改擬杖流允宜問擬化愚謀叛未行爲從流罪招呈到司該本司按察使于時躍覆詳看得延屬當王逆叛亂之際各官失守守備柴化愚因王永鎮內應陷城賊委爲黃龍山同知已自干大法矣觀其中途脫逃不過畏死偷生之計似不得與甘心受委而卽赴任者比也若賊敗之後卽來投首自與見在各官同邀寬政胡

乃潛逃回籍迨行查冊報之後始來投見既奉有緝拏究擬之旨雖未任之情有可原而失陷城池其何能辭于一斬矣第又逢新赦豁免本犯之幸際皇仁耳伏候裁奪將化愚取問罪犯壹議得柴化愚所犯除謀叛未行爲從并避難在逃輕罪不坐外合依守備不設失陷城寨者律斬查事犯新赦以前應遵詔豁免合候具題請旨發落壹照出柴化愚斬罪遵赦豁免等因招呈到臣除賈勳等俟該司緝獲究擬招詳至日另疏具題外該臣看得柴化愚身膺衛備職任同城當王逆叛亂之際旣不能防範于早及城池失陷之時又不能殉難于後迨賊委爲黃龍山同知而中途脫逃揆其本心乃一時畏死偷生之計實非甘心受僞從逆者比也然賊敗之後不來投見而潛逃回籍至奉旨緝拏而方來投首雖與從逆各官固難同科而欲與投見諸臣同邀寬政其能之乎按以失陷城池之律化愚其何能辭于一斬也但事犯赦前應否豁免出自聖裁非臣所敢擅專也旣經該司招呈前來臣謹會同總督陝西叁邊兵部尙書孟喬芳巡撫陝西都察院右副都御史馬之先巡按陝西監察御史王佐合詞具題伏乞勅部議覆行臣等遵奉施行因述原詳字數溢格併祈聖恩鑒宥緣係恭報查明延屬失守文武官員情形仰祈聖鑒勅部分別議處事理臣等未敢擅便爲此具本專差承差白其中齎捧謹題請旨順治玖年叁月初柒日巡撫延綏等處地方贊理軍務都察院右副都御史臣董宗聖

（硃批）三法司核議具奏

戶部題本

戶部尚書臣車克等謹題爲銷算兵馬錢糧事山西清吏司案呈奉本部送戶科抄出廣西巡撫王一品題前事內稱准戶部咨前事移咨前來准此該臣案照各省設有鎮協撫道等營標兵馬月食糧料每於年終將支領扣存數目分別肆柱造冊奏銷此舊例也粵西於順治柒年拾壹月開闢省會其餘州郡見在征進因地未盡闢未經題請設立鎮協營堡等官兵亦未造有經制無憑造報惟臣標舊額設兵貳千止前撫郭肇基奉部撥有戰兵貳百名其餘業經臣疏請撥餉召募雖奉俞旨無餉難招應候陸續舉行除將順治柒年拾壹月初壹日起至順治捌年拾貳月終止見在兵目新舊不等連開計壹拾伍箇月共支過餉銀捌千肆百陸兩柒錢伍分捌釐陸毫伍忽支米壹千捌百壹拾壹石肆斗捌升柒合壹勺伍抄照數給散取領附卷訖遵卽造冊另行咨戶部查銷外至於新例原分戰守貳項并馬步次第今見在之數無幾且值多事之時均作戰兵餘候招足再行分派另造經制奏報者也合行具題伏乞勅部覆覈施行等因順治玖年貳月初叁日題叁月貳拾陸日奉聖旨戶部知道欽此欽遵抄出到部送司奉此相應議覆案呈到部該臣等看得粵西初開經制未定撫臣奉撥淮濟兵馬并陸續招募兵丁自口馬匹自順治柒年拾壹月初壹日起至捌年口貳月終止通共支過銀捌千肆百零陸兩柒錢伍分捌釐陸毫伍忽批行布政司照數給發各官兵訖支過米壹千捌百壹拾壹石肆斗捌升柒合壹勺五抄批行糧儲道轉行桂林府管糧通判照數支散各兵訖循例奏銷奉旨下部臣部逐款覆覈總撤相符支過庫餉馬乾米石似應准其開銷者也既經該司案呈前來相應覆請恭候口口臣部轉行遵奉施行臣等未敢擅便謹題請口順治玖年伍月貳拾肆日戶部尚書臣車克少保兼太子太保尚書臣

刑部等衙門殘題本（另一同本殘揭封面注）順治九年七月十五日到本揭對同

刑部等衙門尚書臣巴哈納等謹題爲密奏捉獲叛賊謀逆事山東清吏司案呈奉本部送刑科抄出山東巡撫夏玉題前事內開據山東按察司呈稱一問得壹名羅光耀年叁拾陸歲係江西南昌府南昌縣人狀招光耀原係明朝守備於崇禎捌玖年間跟隨明朝總兵穆文壽鎮守遼東臭水坑後又鑽幹都司官職又跟穆文壽在廬州府泗州鎮守廢明皇陵後聞北京被闖賊失陷光耀又至南京投見僞弘光加光耀副總兵官職鎮守蕪湖采石磯等處後清朝統兵南伐弘光隨先脫逃比光耀與黃闖子合兵與左良玉打仗因敵不過闖關下海被清兵趕至海口將光耀捉解南京押解豫王批打光耀肆拾板責令光耀跟隨職方司姓常不知名監造船隻押至北京光耀就不合心懷不軌不願做官欲要恢復明朝因而辭脫至順治貳年失記月日聞明朝未獲僞翼王係湖廣人名喚朱治海在蘇州府隨投見僞翼王即蒙收用於順治貳年七月內帶至浙江周山（舟）又見僞魯王仍加光耀僞副總兵官職見獲僞劄附卷光耀親見周山週圍捌百里許兵馬難到僞魯王隨令光耀跟隨僞翼王帶白綾僞劄勅共叁百張并僞銀印訪會天下豪傑以爲接應光耀扮爲賣茶客人翼王改名許天乙扮爲堪輿先生同跟隨僞翼王又有使人董北隆軍師楊從力往山西一路會叛賊李赤心即與赤心銀印壹顆光耀身帶見獲圖書貳個方者上刻光耀名字圓者上刻光耀號係秀之與僞翼王又至山東濟寧等處分散僞劄因濟寧州地方盤結牌甲（詰）甚嚴未敢久停於順治肆年正月內光耀與僞翼王又至山東青州府諸城縣西北關寓於在官孫飯店即孫雲峯店內吃飯各畢翼王隨與董北隆楊從力向山西一路去訖孫雲峯止知賣飯原不認識并不知情光耀與孫雲峯各面質證光耀獨在諸城縣假賣烟茶爲由於順治

肆年拾月拾陸日遊至諸城縣地方工村集窺見在官開飯店名喚趙梯係個好漢隨與趙梯未獲僞把總劄付一張比趙梯亦不合知情不首將僞把總劄付接收訖光耀隨在趙梯家內往返住有壹月光耀與趙梯面質活受明朝劄死係明朝鬼不必再辯趙梯隨俛首無辭順治伍年陸月內光耀同在官僕人趙完璧行至沂州城東地方玉皇廟墩上村有在官楊瑞寰即楊振邦因明朝時在三臺營吃糧當兵相識訪詢至彼隨與楊振邦見獲僞副參將劄付一張比楊振邦亦不合即將僞劄接收用紙包裹藏於堂房樑上光耀隨離了楊振邦家又至沂州地方沙埠屯會一賣烟人姓羅名喚羅太寧即羅希堯光耀稱說伍百年前原係一家即與羅希堯結拜兄弟認成一家光耀隨將未獲圖書帖壹個留與羅希堯比羅希堯明知光耀係南朝僞官亦不合將圖書帖接收訖光耀隨將趙完璧留在楊振邦羅希堯兩家借名讀書共養半年光耀自己回南去訖來回走過肆伍次并不令趙完璧知道所幹何事趙完璧原止陪伴光耀一路行走代背褥套光耀會賊等事趙完璧原不知情光耀與楊振邦羅希堯趙完璧各面質證至順治陸年叁月內光耀行至鎮江府寓于新峯大聖寺內比有僧人慈雲即將燒火今在官徒弟袁錢送與光耀使喚至陸年肆月貳拾壹日光耀同袁錢到了沂州沙埠屯羅希堯家相隔楊振邦家伍拾里許隨就著趙完璧同袁錢隨光耀前訪楊振邦行至玉皇廟莊大樹下歇涼向一送飯人要水吃比送飯人即與光耀叁人幾碗簿飯吃了因他係個好人隨問他姓號他說姓張號魁吾係楊振邦家族間外甥光耀隨將見獲圖書帖一個留與魁吾稱說我恢復明朝時你持此帖以爲後日酬答之照比張魁吾亦不合明知光耀係南朝僞官即將圖書帖接收各散訖光耀與張魁吾面證本日光耀與趙完璧袁錢叁人行至沂州東潘集地方尙未至楊振邦家行走間即被沂州吏目傅紹輔見光耀等叁人踪

跡可疑當即盤獲搜出見獲白綾偽箭陸張連人押解沂州申解總鎮張大治并兗東道李申并沂州知州唐成勳從公會審據光耀招出前情并各省逆犯姓名在案隨差遣標員先將楊振邦張魁吾捉獲到官審供與光耀供稱相同且起獲楊振邦原受光輝（耀）偽箭附卷隨將前情申爲塘報捉獲叛賊謀逆事於陸年五月初某日塘報總撫兩院訖續蒙撫院呂都御史隨據塘報情節具題前事等因奉旨羅光耀等著呂逢春會同該督按確審正法本內有名叛黨著各該撫按嚴拿確審具奏不得波累無辜該部知道欽此欽遵密封兵部遵行間又蒙總河楊部院題同前事等因奉旨已有旨了該部知道欽此欽遵密封兵部移咨總撫按三院備行按察司案行濟刑廳審問又蒙本司憲票蒙前撫院呂都御史批據本司呈報續獲張明吾等緣由詳批仰司將續獲人犯與羅光耀等確審招報等因到司轉行到廳遵行間又蒙本司憲票仰廳會同濟南府確審問蒙本司批據諸城縣生員徐明藩稟狀爲投見顛辯奇冤事蒙批仰濟刑廳併審報等因又蒙本司憲票蒙撫院呂都御史批據生員丘元武稟爲電豁盆冤恩超無辜事蒙批仰按察司查報等因到司抄詞稟行到廳蒙此又蒙本司批據膠州申同前事申解起獲楊朗皮箱一箇內有四書玖本并無劄付緣由蒙批仰濟刑廳併究報等因到廳蒙此又蒙本司憲票蒙撫院呂都御史批據賊允德稟爲泣陳奇冤明察覆盆事蒙批仰按察司併察報等因到司稟仰濟刑廳會同濟南府究審該濟南府知府楊于廷會同推官李振春逐一研審除沂州張魁吾羅希堯楊振邦諸城縣趙梯的係光耀同黨已經對認明白將所犯情由開列招前外至若原疏據光耀招稱鄆城縣東鄉離城拾肆伍星路住人張明吾受都司劄付壹張今審據光耀招稱與翼王在濟寧等處分散偽劄至鉅野縣城西嘉祥縣地方有賊首張明吾身長面黑鬚鬚頗長年

有肆拾多歲見今率賊作亂曾與僞總兵劄付壹張前官審時嚴刑之下錯招係鄆城縣東鄉離城拾肆伍里路住人張明吾與僞都司劄付壹張其實不識鄆城縣張明吾一面至若原招呂康侯係嘉祥縣西鄉離城拾里路住人光耀原聞他素係好漢假買綿花爲由訪詢至彼因呂康侯係練兵鄉長恐被他拿了隨即走去原未與呂康侯將軍僞劄一張是實隨據呂康侯辯稱名喚呂世齊原係總河楊部院標下副將梁武門下效用官毫不非爲望乞行查便知真僞等情光耀又供順治肆年正月內光耀與翼王董北隆楊從力在諸城縣西北關孫雲峯店內吃飯各畢因盤查牌甲甚嚴翼王卽同董北隆楊從力向山西一路去了孫雲峯原不知情隨據孫雲峯供稱名喚孫士隆在諸城縣西北關開飯店是實每日來往客商吃飯甚多何由而知係翼王等情職等又訊光耀你別了翼王除在諸城縣工村集趙梯家居住壹月外你還在誰家隱藏與誰人往來通信據光耀又供光耀別了翼王自己在諸城縣賣茶時有東大街住人臧錦衣陸續使不知名管家取光耀茶葉肆拾斤每斤該價銀捌錢共該價銀叁拾貳兩陸續討要貳次止與銀捌兩其餘屢討不與每常在門首等候一日并無一人答應因以成嫌是以妄招翼王常在臧錦衣家實未見臧錦衣一面亦不知其名號隨喚臧錦衣與光耀面質委實兩不識面隨據臧錦衣辯稱名喚臧允德原係明朝錦衣衛千戶比羅光耀在諸城縣賣茶時允德只當是個賣茶客人其取用茶價俱交允德管家送還光耀訖不意德僕扣落自肥致光耀懷恨妄扳允德於貳叁兩年在京都王府大街府廳庵路西寓時見清法森嚴回家閉門讀書一切山人術士并不接見闔縣共知共聞實不知翼王爲誰原未在允德家住是實職等又訊光耀與丘自麟情由據光耀供稱諸城縣西南柴捌拾里許間有丘自麟是個好漢隨同僞翼王送勅與他初次未容相面旋即回寓後又至門首因丘自麟

得了清朝貢士見他門首豎旗衆人舉賀恐彼自麟捉獲因而走去僞翼王原未在本縣東南陸拾里高河橋居住莊東

耀面質委實兩不識面隨據丘元武辯稱係諸城縣生員與父丘石常字海實在本縣東南陸拾里高河橋居住莊東

頭有小山嶺一道平素閉戶讀書毫不妄爲武父係順治肆年貢士見今在京廷試諸城縣知縣因與羅光耀所扳姓

投貢士貳字又投因父不在隨將武拿獲代解實不知僞翼王爲誰職等又訊光耀與宋煥僞箭情由據光耀供稱光

耀聞得濰縣東門裏有鄉宦宋煥係個豪傑訪至濰縣未容光耀進城隨即回來原不識宋煥面貌翼王不會在伊家

隨喚先在官今病故宋煥與光耀面質委實兩不識面據宋煥泣辯煥素係農夫原在昌邑縣城南捌拾里龍灣莊居

住并不係濰縣籍貫亦不在濰縣地方居住職等又訊光耀與徐世臣僞箭情由據光耀供稱日照縣城東捌拾里墩

上有開鹽豬店徐世臣素係有名望的人因去訪他原未與伊見面隨喚徐世臣與光耀面質委實兩不識面隨據徐

世臣辯稱名喚徐明藩係諸城縣生員住居宋興集俗名呼爲墩上有族侄徐加印號田字常開鹽豬店是實順治貳

年間明藩係貢監在京考試京舉未中隨在法翰林名若真宅內與伊拾柒歲生員法雲一處伴讀於肆年玖月內丁

母艱回家毫不結交匪人後仍回京師訖至陸年柒月初捌日家人至京說被光耀誣扳在案隨即起身於貳拾貳日

投見按察司今雖名姓村落相投其實縣名不同且不識面望乞行查良善有分等情職等又訊光耀焦魁軒子原係

甚麼人據光耀供稱順治肆年叁月內光耀遊至濟寧州寓於南關二里許玄帝廟前開店焦魁軒家同董振先在店

住歇一宿至次天明即行了原未與軒子參將箭付是實光耀因受刑不過想起焦魁軒店前豎立招牌上寫焦魁軒

姓號以此招扳在案徒免一時責打隨喚焦魁軒子與光耀面質委實兩不識面據焦魁軒子辯稱名喚焦胤洪乃軒

義子肆年陸月內魁軒病故陸年叁月內殯埋生前開店是實止知安下行人外事毫不相涉職等又訊你與膠州楊朗楊秀各監軍道箭付一張俱是真贗據光耀供稱順治肆年捌月內光耀原在膠州賣茶寓於城西南陸拾里上莊楊朗店內吃了伊半個月飯臨時時因飯錢不足給朗紫花綿背心壹件抵兌飯錢比楊朗不要縱僕毆打光耀一頓因此成讐以故招扳在案實原未與楊朗兄弟二人各監軍道箭付壹張光耀原是訪賢之人聞楊朗胞弟楊秀係生員因記他名字一併誣扳實未與秀見面隨喚楊朗楊秀與光耀面質光耀止認得楊朗併不認識楊秀據楊朗辯稱朗在膠州西南陸拾里上莊開店安寓客商是實光耀曾寓店內賣茶因臨行飯價不足當下舊紫花綿背心比朗僱工人與光耀相嚷一場各散去訖只當光耀係賣茶蠻子不知光耀係南朝僞官又據楊秀供稱秀係生員秀兄楊朗在上莊開店下客秀在本州城裏東關崔秀才家設教并不與兄朗同居且不認光耀之面委係讐板（板）再審朗父楊夢鸞供稱前蒙州官苦拷皮箱內止有四書玖本并無劄付等情據此又審趙完璧招稱係紹興府山陰縣人因清兵過錢塘江逃至高郵州姓姚壹人即領與盧洪業使喚半年盧洪業隨令完璧至淮安府尋馬魁吾到了新安鎮千佛菴內住下光耀於伍年陸月內到菴遇着盧洪業向洪業稱說我沒有兒子你將此小厮送與我做兒罷等語盧洪業即將完璧送與光耀做兒子帶至沂州地方玉皇廟墩上村楊振邦家光耀即回南去訖光耀來回走過四五次全不令完璧知道所幹何事即光耀與盧洪業背地講話私事并不令完璧在前又審袁錢招稱係湖廣德安府雲夢縣人被左良玉兵馬擄至營內一年有餘逃出拉船至鎮江府新峯大聖寺內與僧人慈雲燒火叁年叫我削髮爲僧不曾依他逃走拿回至順治陸年叁月內羅光耀由本寺經過慈雲即將袁錢送與光耀指使至肆月內行至沂州光耀買了

些包頭花線包於褥套之中假賣貨爲由以便行走至貳拾壹日先至沂州地方沙埠屯羅家就著趙完璧一同行走間卽被傳吏目拿了是實光耀所幹的事原不知情職等又訊光耀你同翼王帶白綾僞劄共叁百張併僞銀印俱與了甚麼人了據光耀供稱順治肆年伍月內將銀印一顆同翼王交與山東地方蒙山今另案正法賊首田松山封爲定東伯又與山西叛賊李赤心係李自成同姓不同族銀印一顆又至淮安府桃源縣古城地方訪著石應元係明朝守備并弟石應進各與僞參將劄付壹張又與石應仕僞都司劄付一張又至高郵州城裏訪有陳鼎臣係明朝武舉與僞都司劄付壹張又有陳生白係明朝指揮與僞監軍道劄付壹張又與盧洪業僞參將劄付壹張又有張秀係明朝武進士去訪他是實原未與他僞總兵劄付光耀又至鎮江府金壇縣有明朝進士王夢錫原係明朝布政司今削髮爲僧會著他是實原未與錫僞布政司劄付翼王又給金壇縣潘應祥與光耀貳人見獲白綾僞牌一面自陸年貳月初柒日在鎮江府南關姚家店內潘應祥別了翼王卽回周山投見僞魯王管營頭訖潘應祥曾受僞都司劄付壹張至於蘇州府陳弼原係明朝侍郎與弼僞兵部尙書劄付壹張見在周山跟僞魯王做官常熟縣徐應奇係明朝秀才與奇僞監軍道劄付壹張見在周山跟僞魯王做官常熟縣郭清輔卽郭德輔係明朝總（下缺）

廣東巡撫李棲鳳揭帖九年八月十六日午時到李棲鳳密本揭帖

欽差巡撫廣東等處地方提督軍務兼管糧餉鹽法都察院右僉都御史李棲鳳謹揭爲飛報緊急賊情懇啓發兵救援事順治玖年柒月初拾日准平南王咨前事稱柒月初玖日申時據□□□翼署總兵官馬雄啓前事內稱本月初肆日戌時捧接定南王飛諭內開諸孽陡逼省城勢其猖獗該鎮速調各路兵馬盡赴平樂府候調前進不必顧慮他汛其文官一併調赴梧州事關□□□刻爲歲敬此職跪讀不勝驚悸隨一面飛調各路兵馬一面將梧州馬兵挑選貳百名星馳赴援訖職因梧城重地候各路兵馬調齊方進又恐遲滯稍稍布置即帶隨身馬步初陸日午時前進路遇前去兵丁馳報賊於初叁日圍了桂林省城走出滿州壹名報稱城已失陷是以小的奔馳前來據此事關緊急賊勢叵測一面探的前進一面調度堅守梧城但恐梧爲廣之上游兵單力弱難以支持懇啓王前迅發大師救援免悞封疆等情到藩本月初拾日辰時又據定藩左翼總兵官馬雄啓爲塘報緊急軍情事內稱本月初柒日節□□報想蒙睿覽初捌日寅時職差官馬國用馬全於初伍日越桂林水東門城下河貳拾里覓得小船壹隻飛下報稱初貳日亥時賊兵圍城水泄不通至初肆日巳時賊四面擁入當聞定南王自盡其後殿自焚小王子不知下落賊首內有王子併馬進忠又右軍都督府王姓等俱現扎桂林兵馬勢重傳言四十營□實不知多寡數目賊撥直過平樂現窺梧州除職一面發兵應援平樂一面嚴兵城守梧州外但梧州重地爲兩粵咽喉兵單可慮懇王方略星速遣兵救援互相犄角封疆幸甚等情到藩准此事關鄰省除一面繕疏具題外合行移會等因到職該職看得粵西逆寇跳梁據報攻陷省城定南王孔自盡兩粵唇齒相依一時震鄰若此職不勝認認慮之但梧州爲廣肇上游門戶防梧扼險乃

可以固東粵也况東省初復各府餘孽未靖閩寇耽耽窺伺潮郡平遠失守水陸策應維艱且靖南王耿進勦瓊州未
 奏底定恐窺關號澤之輩一聞西粵聲息未免乘機蠢動則消內患以禦外侮實有一刻不容緩者今平南王尙聞報
 已發官兵船隻前去梧州應援矣但狡賊此番舉動大異尋常□□□皇上亟勅銳師進勦恐未易迅掃逆氛而紓
 聖明南服之顧也事干軍機理合具疏密封馳報伏祈聖鑒施行爲此除具題外理合具揭須至揭帖者順治玖年柒
 月日右僉都御史李棲鳳

(Faint bleed-through text from the reverse side of the page, mostly illegible due to fading and ghosting.)

廣西左翼總兵馬雄稟

隨征廣西署總兵官管左翼總兵事馬雄謹稟爲孤軍天末甚危梧城一綫獨守謹同諸將士披瀝赤心懇祈援救事竊自湖南武寶告警王爺以大師扼守全州嚴關不期諸賊迅至各路喪敗王爺聞報於陸月貳拾玖日日出大溶江禦敵賊伏四起大師潰敗賊隨尾追至桂林王爺於柒月初貳日戌時發諭令提塘楊正相由水路飛馳至梧職初五日接諭卽一面遵諭飛調各州縣兵馬文武各官赴梧一面挑選在梧兵馬水旱齊發水程逆上桂林玖百里早程山蹊有壹千里不期初柒日凶信遂至桂城已於初肆日巳時失陷王爺以身殉國閣宮自焚衆蝦俱遭毒害職與衆將士痛哭號天變生倉卒真插翅難前也賊踞桂林將職扶柩抵桂眷丁五百餘口盡爲淪喪父喪暴露生死含冤職恨不能滅此而朝食也乃賊先遣馬全懷挾僞票僞旨招安職與衆將官許以地方官爵職見之切齒裂眦皆欲解老爺臺前柰因路途遙遠已經具啓解赴

靖平

二王爺訖續於柒月貳拾肆日賊又差官李彥台趙元符等許職侯位并許解運

數拾萬金饗士隨職願那處地方卽取與職職當將來官對衆嚴刑拷問亦解赴兩王爺去訖賊今已令徐總兵提兵坐鎮昭平賊率衆已布平樂賊勢順流呼吸立至勢誠岌岌也計職分守平梧潯三府貳拾壹州縣處處分防路途懸隔在梧之兵無幾糧米尤可接濟今各師集梧文官盡撤四邊伏莽閔然齊出猺狼槍擗網揭竿米糧斷絕七八萬之眷口兵丁食馬食人如何支應東粵兩王爺與撫君等各官見賊勢緊急非不多方接濟東粵小舟逆挽助炊幾何亦難濟之事也且南寧線總鎮杳無音信兵馬不知何向差接難前柳慶全總兵雖於柒月拾陸日奔梧其兵馬盡行譁散被蔡大廳鄭副將帶往桂林投賊是廣西九府只存梧州一塊土西兵貳萬止餘職兵五千人誓死當鋒齊心奮

(軍)

署灣梧參將等稟

原任隨征鎮標今署灣梧參將加銜副將□□□原任前營領兵參將今署中軍事馬□□□領兵參將楊才左營領兵參將李應□□營領兵參將安化龍後營領兵參將安邦委署鬱林參將黑明管糧城守參將魏勝貴中軍守備張應啓石瑜丁得勝韓震領旗遊擊朱尙文楊俊廣李平忠羅茂滿進貴夏三吉馬子雲王希玉等謹稟合詞遙叩大恩主老爺鈞座前桂省失事情形顛末具悉鎮主稟中職等竭忠合力固守蒼梧天日可矢且於辰常時與渠逆馬進忠戰無虛日仇恨已深職等惟與鎮主捐糜以圖恢剿已耳惟是軍孤糧匱□而待困竊思職等西涼之旅儘堪自効不識老爺別有策以教職等否揣此附稟須至稟者順治玖年柒月日

陝西巡撫馬之先揭帖順治九年九月十三日到本揭對同

欽差巡撫陝西等處地方贊理軍務都察院右副都御史馬之先爲官兵奮勇血戰直搗賊窠撲剿渠魁威服羣孽事
順治九年八月十三日准興安總兵趙光瑞塘報前事內稱本年七月二十五日據中軍遊擊張德俊塘報竊照僞興
安伯孫守金虎踞洞河板場寨勾連仁河僞總兵覃琦張木溝僞副將賈明瑄又有大小蠟燭山木連龍潭等寨十數
處憑陵一方以爲牢不可破之域欲收盪平之功用兵必先計糧若非本色源源輓運多兵雲集深山資食何賴遵蒙
總督軍門孟尙書憲檄發餉本鎮會同分守關南道夏參政散發署興安州事州同王親命等各州縣易糧總運紫陽
縣轉載鶴子崖不時接濟以鼓飽騰本年四月十一日奉本鎮軍令督發卑職同左營遊擊趙虎臣并外委領兵參遊
都守李良臣王承胤劉英化守登趙光榮孫盛路之岱房箕尾李登第牛廣真中營守備何鳳翔白土關中軍守備張
本強各營千總李自得陳良柱等官兵馳赴紫陽又蒙本鎮檄令漢陰路遊擊仰九明等官兵合力征勦十四日兵至
鶴子崖渡過漢江密約分路前進甫至山下賊衆擺列長鎗密布山頭望見兵至蜂擁而來官兵分投迎敵羣孽漫山
接應砲石憑高擊打我兵奮勇直前屢戰多時常陣殺死甚衆孫逆扼險遏堵指示拒敵我兵拚命齊擁終不能斬關
而入卑職分發勁健暗透龜山木連橋將賊衝分兩截官兵突圍砍殺各賊抵敵不住鼠竄奔逃擁落溝崖者無數生
擒長髮活賊黃希才等三十六名奪獲大旗三杆倭鎗九杆腰刀十五口弓箭長鎗六十五杆件賊衆踉蹌山林官兵
奪路而進日暮收兵葦炊隨將擒獲黃希才等三十六名解赴本鎮面同關南道夏參政審實梟示振揚兵威訖十五
日移兵直向賊窠峻嶺高山大霧陰霾正在相地列營倏聞喊聲四起俄頃霧起晴明探得密林鎗旗遍遠知賊四面

埋伏卑職分兵四應撲剿各賊占據山頭壘石亂滾响如炸雷倭鎗放打叢若飛蝗自寅至酉鏖戰終日砍死賊徒扒山落澗披靡窠穴我兵收營擐甲待旦十六日黎明官兵列隊揚旗卑職遍觀地利望見孫逆所居板場寨突兀巉巖千雲插漢半山有泉數眼山下周圍一河大小蠟燭兩寨形似浮屠爲板場山之屏障一夫當關萬人趨趨木連石溝兩寨峭壁直豎爲板場山之後勁又龍潭白花園龜山子跌馬砍柞道河木竹埕陳二溝等寨皆基布星列爲板場山之犄角聲援復有鷓鴣關等寨扼吭秦境津關巴蜀欲洗窠穴先破籬籬遂分布左營遊擊趙虎臣千總劉定玉把總劉自友領旗王新正王化蕭世俊楊輝陸栢劉四王進才等官兵列營於大小蠟燭山東面漢陰路遊擊仰九明把總張敬魏元領旗楊槐張龍賈尙貴張自魁安虎蕭成楊伏明李自明曹春李寬並鎮標外委領兵遊擊孫盛路之岱趙光榮等官兵列營於大小蠟燭山西北一帶外委西鄉駐防官王承胤領旗劉雄等官兵並城守營把總戴仲祥駐防石泉領旗郭大寶等官兵列營於大小蠟燭山南面又發中營遊都守備何鳳翔房箕尾任錫千總甘承蔭領旗孫一龍哈天勇右營千總陳良柱漁渡壩中軍沈忠等官兵斷絕水道又發外委參遊都守李良臣劉英化守李登李登第牛廣真白土關中軍守備張本強右營千總李自得等官兵分屯三營犄角堵防板場寨以張聲勢卑職部領中營領旗李自友席承芳苗復成石萬福楊滿庫千總高連楊永祚把總王國棟等官兵往來接應分信已定晝則併力攻打蠟燭兩寨夜則設伏準備劫營擄殺各賊凭高恃險飛石倭鎗齊發官兵仰攻豎立土圍挨牌鎗砲晝夜衝打間於六月初二日仁河僞總兵覃琦探知官兵進剿逆孽僵尸惟恐蠟燭兩寨尅下移師征討差來僞中軍王立朝乞降營前卑職稟請明示蒙本鎮仰體清恩浩蕩姑釋前罪准降嘉興維新僞總兵覃琦僞副將覃昌藩唐化民僞知縣王玉基僞

參將王立朝王繼民孫洪賓楊茂才僞遊擊彭上達曹成瑞張守志康雄僞都司馬成功王應朝徐晏劉啓龍劉甫興單興喬賈從範謝國泰徐宗漢等俱各剃髮投首僞箭二十一張又張木溝寨賈明瑄聞知官兵搗窠凜畏滅亡亦即剃髮投繳僞劄一張僞銅關防一顆僞諭一紙已經具報蒙本鎮撫諭外又蒙本鎮遣發右營遊擊于可訓內標都司折可復左營守備葉桂醴黑水峪領旗高養全等官兵復布重圍正在併力共取蠟燭兩寨忽有板場寨孫逆見得添兵剿殺號砲連天知蠟燭二寨危急默連各山逆賊暗來救應各營官兵一面扼險固圍一面退要衝殺趕至板場山下奮勵血戰砍賊伏屍者百餘生擒長髮活賊李榮等三十二名奪獲倭鎗十一杆佛郎機三杆獨眼鎗三杆三眼鎗三杆賊見救應各孽一戰狼狽胆落心駭兩蠟燭寨僞副將楊應德僞遊擊楊應道僞守備李華茂張應虎並頭目劉萬祥王國信會仕俊劉明方可舉等剃髮扶老攜幼比例覃琦等繳首僞劄四張綿甲十六副火藥七十斤鉛子一千三百個旗幟長槍弓刀七十三杆件悔罪乞降卑職仰遵本鎮原發剿逆撫順示諭查得投順楊應德等男婦老幼四百三十六名口姑開一面之網具報本鎮內有脅從不係紫陽縣戶籍者卽於營前解散各歸故土其餘暫令移住江北已蒙行文紫陽縣查照安插墾土業農歸附版籍訖蠟燭兩寨已下官兵越關而進復行攻剿木連寨相度賊勢觀察地利又分布右營遊擊于可訓守備葉桂醴千總李自得陳良柱把總劉景德趙祥范常二陳朋領旗金尙信王廷輔中營千總高連甘承蔭把總張讓楊萬林楊滿庫領旗馬河圖龐學鳳石茂英左營把總劉自友漢陰路千總領旗曹春李寬張龍賈尙貴等官兵列營分汛四面密圍賊寨砲石亂擊官兵晝夜攻伐奈山峻寨險勢不能騰空而上卑職同遊擊于可訓相度木連寨三面壁立惟有西面山脚可達寨內但一線細梁又非行兵戰陣之地卽令千總李自

得金尙信等官兵掏挖墊路打洞穿穴直透敵樓之下仍傳集各營兵士砍伐梢林細縛柴把俟墊平山梁挖至附近意欲寨門運柴舉火使賊救焚不暇洞內透穴而入賊見官兵攻圍愈嚴危在旦夕於七月十八日僞副將楊永禛潘應奇僞參將苟明臣僞都司苟明學王亨王興僞守備淡友等閔然盡行剃髮首出僞劄十二張交納倭鎗十二杆三眼鎗十二杆獨眼銃三杆佛郎機二位鳥鎗一杆鐵盔七頂綿甲十副旗幟長槍七十八杆火藥硝黃九十三斤并首出孫守金親妹孫氏之兒媳孫氏親女一口使女一口幼子二名乞降下寨男婦老幼共三百五十八名口牛二十四隻驢三頭當衆審據楊永禛等涕稱我等誰非赤子一入網羅干犯不赦委因孫逆挾縛復有孫氏本夫常春監制幸被官兵用砲打死禛等得以改邪歸正衆口一詞卑職卽將本鎮原發撫順剿逆示諭卽令膽棄逆寨具報本鎮內有脅從不係紫陽縣戶籍者卽於營前解散其餘暫令移住江北移會紫陽縣查照安插歸附版籍仍將僞副將楊永禛潘應奇等七名呈解本鎮撫諭發落卑職會同各營移兵深入攻剿查得節次攻殺逆賊傷亡漢陰路把總張敬領旗張自魁中營領旗孫一龍哈天勇各營兵丁曹元吉等十三名各營中傷官丁張讓張天保石萬福等二十七名若待元兇授首先後彙報恐其遲延時日理合先行塘報等情到鎮據此爲照官兵深入山林當陣屢獲擒斬攻圍威服投誠門庭既劈堂奧立窺除嚴加申飭奮勵進剿本鎮仍親督官兵前去軍前設謀攻取剪除元兇既經具報前來今將僞將覃昌潘楊應德楊永禛等僞劄三十七張并賈明瑄僞劄一張銅篆文關防一顆及擒獲活賊李榮等三十二名一併解省查驗發落至於投順僞將留在營前立功贖罪其餘脅從男婦老幼俱係紫陽縣查照安插外尙有孫守金親妹孫氏男婦大小六名口俟渠魁就戮捷報之日一同解報等因又據關南道塘報相同各報到職除將解到長

髮活賊李榮等三十二名在於公所會同提督臣傅夸蟾按臣王佐及滿漢各官驗審梟斬訖僞將覃琦等該鎮收營効用脅從男婦老幼已經安插其孫守金妹孫氏等男婦大小六名口俟守金獲日一同另報無容再議僞劄三十八張僞諭一紙僞銅關防一顆咨送兵部外該職看得渠魁孫守金負固險寨作祟地方已非一日鎮臣趙光瑞遣發遊擊張德俊等統兵征剿幸賴官兵奮勇攻擊設奇制勝先後擒斬多賊奪獲器械什物如許且僞將覃琦楊永禛等畏威披荆倒戈投降功有可嘉在事各官以及傷亡官丁均應敍卹以勵後効者也既經塘報前來時督臣孟入覲職謹會同按臣王佐合詞具題伏乞勅下該部議覆施行除具題外理合具揭須至揭帖者順治九年八月二十七日右副都御史馬之先

戶部題本

戶部尚書固山額真臣噶達洪等謹題爲全楚時值寇荒兵糧實無出辦懇乞速賜題請立撥鄰省接濟事奉御前發下紅本該湖廣巡□□日益題前事內稱本年柴月貳拾□□布政司左布政使林德馨詳稱楚省南漕供應王公兩營及制兵月糧每年缺欠甚多前賴江南漕米接濟并借動餉銀買補通融支□□以柴年奏銷冊內有存剩南□□柴萬零肆百伍拾玖石玖斗叁升玖合應入捌□□□營捌年分共應支米伍拾肆萬壹千伍百壹拾捌石壹斗叁升其捌年分實徵南漕共伍拾萬零玖千柒百柒拾柒石肆斗壹升催據各屬陸續止完叁拾伍萬玖千肆百肆拾肆石貳斗肆升尙欠壹拾伍萬零叁百叁拾叁□□□屢經檄催差取未據完解計捌□已完與柒年□剩止共米肆拾貳萬□千玖百零肆石壹斗捌升抵各營捌年應支之數尙少壹拾壹萬壹千陸百壹拾叁石玖斗肆升此捌年舊欠之數也至玖年南漕原非銀□□可按季催納糧必捌月始徵其正月至柒月之兵糧□□餘萬安能懸釜以待查陸柒兩年南漕雖有□□□遠年積逋百呼莫應者徒爲紙上空言幾可得一實濟本司冀望秋成可待少資接應不謂開徵之時未至而賊逆披猖沅靖武寶見爲竊據辰常衡永長榔等府州風鶴奔逃兼亦苦旱何以取賦至武岳漢黃安德等府□□□□迨今不沾雨澤其一望焦枯三□□絕之慘□此各上臺所共耳而□□者也哀我人斯飽腹旣無半菽謀生非死則逃誰司民牧不能效長孺之矯粟以甦流移顧忍事催比無益於升斗而徒化殘黎爲異物哉□節年之舊欠新徵此時斷不可問矣今玖年分數拾□□米與□征大兵之口糧尙不知所需多寡□□□容遲悞本司職掌度支有心許國無肉可剗此所以昕夕惴惴不爲本司一人性命惜實爲朝廷封疆

計也不得不呈懇亟賜題請就近鄰省漕糧作速輓運抵楚先救燃眉其節年舊欠新徵俟其寇氛寧□□□□□
查另報等因據此又據署糧儲□□分守武昌道參議佟鳳彩詳稱竊□楚地比年以來兵荒交悴瘡痍未起之民輸
納難前其未完之糧猶望後來有年徵補詎今歲復遭奇旱自春徂秋數月不雨值茲開徵之□田起黃埃野無青草
一年之望已絕二糧之輸何出□□各屬咸稱萬井烟寒千家空杵始猶採野薺□□□□根以爲續命之膏而今
則俱盡矣賣產典身無主易妻鬻子無門卽欲剜肉急公誰肯量沙作數是從古不再罹之荒而今日最傷心之慘也
惟是南漕關軍國重務本道何敢寬緩無奈差檄頻催穎禿舌敝舊欠新徵終□□□□右布政司支放先准該司
咨合□本省米供本省兵卽年豐歲穩尙多缺額今則顆粒無收卽在楚枵卒已鰓鰓脫巾之爲慮矣若目前大兵一
至何計以資飽騰晝夜思維計無別出惟江西玖年起運捌年漕糧□目前尙未盡發北上伏乞亟賜具題請撥江省
起運漕糧更冀一□□□□撫院及行彼省糧道挽留運楚庶軍需不至有悞而一二未盡之民猶得以存子遺也
等因各具詳到臣該臣看得楚當二空四盡之時非不欲設法勸輸以佐萬一而司道諸臣寧置在我之南漕於不問
而請仰沫於隣封者□□□天不佑楚產米之屬其爲死賊□□奔避靡□者無論矣卽距賊稍遠府屬以及武
岳漢黃安德等府慘罹旱災臣之前疏已悉迄今橫畝皆焦千里盡赤野無粒食之農村盡逃亡之屋嗟嗟糧出於田
而田已成□毛之區糧納於民而民半作溝渠之殍新舊南漕能□□追徵□省倉旣無顆粒之儲境內又無可□
□□征大兵與王公制兵應支月短從何措辦臣蚤夜焦思寢食幾廢前此督臣病臥曾以乞留江省漕糧商臣會
題臣日望督臣痊可附銜上請今不幸身殞封疆重任萃於□□□及蚤披陳必致臨期大悞臣是以□□瑣聒之

○瀝血泣請也江楚原屬唇齒之邦今楚旱異常糶糴告匱不得不求協濟於江右微臣目擊時艱憂惶無措除仍嚴檄該司道分途督催各勉力輸納外謹密會同湖南按臣李敬湖北按臣聶玠合詞密請伏乞聖恩垂鑒勅部速議允撥江省□□□漕糧卽以楚省協船星飛輓運接濟征兵目前之急庶幾士馬飽騰巨寇不難殄滅矣臣等不勝引領待命之至備述寇荒苦情字多逾格仰祈聖鑒施行等因順治玖年柒月貳拾玖日題捌月貳拾肆日奉聖旨戶部速議具奏欽此□□密封到部□此相應議覆該臣等看得楚省經制兵丁月米久經題留該省南漕貳糧至王公官兵需用糧米臣部已撥江西漕糧拾萬石今撫臣遲日益以該省荒旱告匱疏□江西漕糧爲請相應如議再撥江西玖年起運捌年漕糧拾萬石卽□楚督撥船協運星速飛輓以濟□□□幅員甚廣何得概以荒旱藉口請勅下該督撫按確查未經被災地方設法催徵以資接濟可也相應覆請恭候命下臣部轉行遵奉施行臣□□□謹題請旨順治玖年捌月貳拾玖日戶部□□□□臣噶達洪尙書□車□少保兼太子太保尙書臣党崇雅左侍郎臣孫塔左侍郎臣祝世胤左侍□□王永吉右□郎□耳得都察院右都御史管右侍郎事臣趙繼鼎啓心郎臣方不黨啓心郎臣李迎春啓心郎臣任和尙額者庫臣和善

(發批)是

戶部題本

戶部尙書固山額真臣噶達洪等謹題爲請撥玖年不敷兵餉事山西清吏司案呈奉本部送准陝西總督孟喬芳咨前事內稱查照秦省陸鎮及駐省駐漢併收川滿漢官兵家口玖年分俸餉糧料與□召買運川米石征剿寧夏滿洲官兵支過銀糧通共肆百貳萬貳千柒百玖拾柒兩零內除本省民屯王糧併雜項本折充餉壹百陸拾伍萬陸千貳百肆拾肆兩零外該不敷銀貳百叁拾陸萬陸千伍百伍拾叁兩零於貳月初陸日准戶部咨文撥兌江浙晉豫額賦及河東兩淮鹽課共壹百陸拾叁萬陸千伍百捌拾叁兩零尙該不敷銀柒拾貳萬玖千玖百柒拾兩零又每歲有進貢喇嘛番僧併馬駝及過往官兵行糧等項爲數纍纍難以預定俟用過另請算補外今據布政司估計造冊前來相應移送撥兌咨會到部送司奉此相應具題案呈到部該臣等看得秦省玖年分兵餉臣部於本年正月內俱照兵部經制如數撥兌訖今秦督咨稱秦省兵餉并下川官兵俸餉等項銀兩通共該銀肆百貳萬貳千柒百玖拾柒兩零除本省正雜錢糧及撥兌外尙該不敷銀柒拾萬玖千玖百柒拾兩零冊報前來臣部備查冊開西安肆旗平西王固山操賞并甲兵恩賞米石等項俱係新增應找撥銀肆拾陸萬伍千肆百叁拾餘兩合查玖年額賦於山西省撥銀貳拾貳萬兩江南省撥銀拾萬兩兩淮鹽課撥銀拾萬兩陝西省裁減衙役工食等項撥銀肆萬伍千肆百叁拾兩玖錢玖分共合肆拾陸萬伍千肆百叁拾兩有零之數請勅下江南總督秦晉巡撫兩淮巡鹽御史將撥兌銀兩星速解交秦督以資接濟至於冊造各鎮征川官兵并兵丁家口坐糧及塘丁月餉等項該銀貳拾陸萬肆千伍百叁拾玖兩零備列項款另咨秦督查明報部覈算清楚再行酌奪可也旣經該司案呈前來相應題請恭候命下臣部轉行遵奉施

行臣等未敢擅便謹題請旨順治玖年玖月拾叁日戶部尚書固山額真臣噶達洪尙書臣車克少保兼太子太保尙書臣党崇雅左侍郎臣孫塔左侍郎臣祝世胤左侍郎臣王永吉右侍郎臣耳得都察院右都御史管右侍郎事臣趙繼鼎啓心郎臣方不黨啓心郎臣李迎春啓心郎臣任和尙額者庫臣和善山西清吏司副理官臣金打喇漢太僕寺卿仍管山西清吏司郎中事臣王弘祚

頁 拾 四 本

平南王揭帖順治九年十一月二十二日到本揭對同

平南王揭爲欽奉聖諭恭陳謝悃事本年九月二十四日戌時接奉天使賚到皇帝敕諭平南王尙可喜靖南王耿繼茂覽王奏報知定南王孔有德爲國盡忠捐軀殉難朕不勝痛悼故將敬謹親王尼堪爲定遠大將軍挑選精銳官兵使之統領兼程前進不久可抵廣西王切毋憤恨輕赴廣西倘賊犯廣東爾等宜圖萬全爲上計俟大兵至日盡付之定遠大將軍慎毋輕舉以失事機特諭欽此欽遵恭捧到爵該爵等恭設香案叩頭謝恩訖竊惟粵西失陷慮切震鄰蒼梧旋失旋復稍紓唇齒之憂荷蒙恩綸遠錫敬謹親王耑師南下指日蕩平爵等惟有仰遵天語固守疆圉以圖萬全毋厪聖慮謹具疏稱謝除具（題）外理合具揭須至揭帖者順治九年十月初四日

湖川總督祖澤遠揭帖順治九年十一月初三日到本揭對同

欽差總督湖廣四川等處地方軍務兼理糧餉兵部尙書兼都察院右副都御史祖澤遠爲直陳地方情形仰祈聖恩
軫念事職重叨殊眷深切冰兢務欲竭盡愚忠仰答高厚但入境以來親見荒村野火寥落堪悲鵠面鳩形死亡待踵
民窮於財盡兵弱於力單不禁颺言可爲痛哭職不遑槩述即以武昌一郡言之省會素稱饒富天府雄藩今則兵火
餘生徒存瓦礫編蒲暫息朝暮苟延父母妻子潛遁梁子湖之中一驚風鶴輒負擔而逃城成空谷蓋餘虐怵心多無
固志此民心之不足恃一也楚省賦役最繁平成之日輸將恐後今則兵火未息又值奇荒即近如省會民旣迫於饑
寒復又憊於征斂逃亡死徙在在不堪此民力之不足恃一也近者楚省額賦止捌拾萬兩已不過江南一邑之多而
協濟則有浙餉有鹽課有江南之銀江西之米亦可謂緩急相濟無虞匱乏矣然派多積欠解不如期兵丁枵腹以荷
戈有司捉襟而露肘額協兩餉均不足給此錢糧之不足恃一也至若楚屬額兵肆萬玖千柒百名月糜金錢陸萬叁
千餘兩養兵辦賊藉寇固圉也楚俗向誇雄悍然勇於私鬪怯於公戰見大敵至不發一矢輒鳥獸散耳蓋緣南方之
人習于剽掠旣未久練師中又未屢經大戰其去滿洲兵馬不啻千百沅靖之事今可概見此兵力之不足恃又一也
職初蒞茲土深用憂心即竭力圖維尤慮覆餗然時雖有極敵之勢而臣子實有畢盡之心職惟捐糜矢志頓起精神
大振頽頹因時補苴務期民生奠安小醜殲滅庶下不負所知上可報鴻恩于浩蕩耳職實見地方凋殘如此不禁痛
哭直陳伏乞聖鑒施行爲此除具題外理合具揭須至揭帖者右具揭帖順治玖年拾月日兵部尙書兼都察院右副
都御史祖澤遠

廣東巡撫李棲鳳揭帖順治九年十一月二十六日到本揭對同

欽差巡撫廣東等處地方提督軍務兼管糧餉鹽法都察院右僉都御史李棲鳳謹揭爲塘報州縣城池淪陷并叅失事官員仰祈聖鑒事本年捌月貳拾柒日據協征連陽副總兵都督僉事茅生蕙報稱捌月貳拾日未時據高良下水地方黃陳漢報稱據連山逃走百姓言稱捌月拾玖日有馬賊已破連山縣誠恐黑夜出州伏乞發兵堵禦又據高良下水地方甘明報馬賊拾捌日扎宜善司拾玖日扎上吉水貳拾日已占連山其吳知縣被軍寮猺官請入猺崗謝中軍不見下落妻小被馬賊擄去等情又據差官張敏往星子探聽報稱臨武縣殷將官順曹賊是實今曹賊進縣傳說有犯連之信今賊探馬到順頭嶺各等情到職看得曹馬二賊因廣西失陷搖惑人心甚爲猖獗今臨武連山二縣俱失連州孤城曹馬二賊兩路犯界萬分喫緊等情捌月貳拾捌日又據副總兵都督僉事茅生蕙連州知州崔思唯爲塘報事稱本月拾玖日連山失陷縣官被擒已於貳拾日具文飛報矣職部下官兵陸柒月間病倒伍百餘名不意捌月內瘟疫大行又病倒貳百餘名所存精壯者不過貳百人日夜統率防守孤城盼望救兵急如星火不料貳拾貳日午未時分馬賊帶領廣西叛兵共數萬又勾引連山猺官房壯猷沈大業等誘出猺人萬餘四面蜂起漫山徧野而來共逼州城又兼土賊彭鳴輸馮國荐等鼓煽溫水羊旗一帶叛黨徧插白旗互相擊應職此時奮兵死戰則賊寇四面互攻萬難分身應敵欲併力守城則城中原無百姓原無倉庫錢穀止存空地荒城即使職等擡命一死全軍俱沒終何益于朝廷又何濟于社稷只得同知州崔思唯護守印信暫出城外屯軍于連陽交界處所扎營高阜以待添兵勦蕩等情玖月初陸日又據平藩下令委駐鎮連陽副將馬泗汗署連州陽山縣知縣屠洪基稟稱本月貳拾叁日茅副

將同連州崔知州帶印帶兵於本縣北山立營貳拾肆日職等會請入城將茅副將家眷安插住居城內將東西二門公議茅副將兵馬守禦等情玖月貳拾叁日又准援勦廣東地方總兵官郭虎手本爲塘報事稱本鎮遵奉王令救援陽山于本月拾肆日師抵浚光因見水淺灘高恐遲時日遂令馬步官兵陸路兼程前進所謂清遠英德官兵我兵未到先已進城本鎮于拾陸晚卽抵清遠司離縣止叁拾里隨詢地方鄉民俱稱拾肆日有新到一枝兵馬內見象肆個是廣西來的賊勢甚衆等情據此本鎮于拾柒早一面差星子司巡檢陳玄玉帶領營丁四名從山間小徑親至縣城後山瞭望賊兵虛實情形去後一面同各將領商議計于本日撲進賊營政在束裝起馬隨據陳玄玉等回稱馬賊扎三大營盤圍住縣城其河南一帶復扎有大小拾營俱係藍白帳房身等回營時見城中火起縣已失陷等情據此本鎮復令哨探已的隨撤兵回至大灣地方當有巡兵撞獲賊營逃出兵丁張有功姬成郭福朱元四名到營口供俱係線馬二鎮舊屬營丁因在梧州被賊擄去今隨賊營來至陽山因拾柒日開縣身等隨出打糧卽行逃脫等情據此隨將張有功等四名解赴兩王外本鎮兵馬暫回清遠駐劄擬合塘報等因到職該職看得連州及連山陽山二縣壤接廣西懷集及界楚之臨藍民猺雜處從來易動難馴近因廣西告陷臨武併失唇齒之勢旣孤曹馬之窺日急職已屢行該道移檄守將茅生蕙赫馬厲兵加意嚴防不謂賊焰日橫連州連山相繼失陷副將茅生蕙連州知州崔思唯卽督官兵帶印共入陽山協守王遣總兵郭虎率師往救我兵未集而陽山復先陷矣卽今英德清遠一帶勢切震鄰漸致延蔓職恐此賊未除廣州南韶諸郡未可一日安枕也所幸瓊州已復靖南王耿業已班師回省與平南王尙訂籌決策迅發官兵馳勦恢復有期若連山知縣吳道岍濫叨司牧不能先事網繆竟與城印俱失或稱逃入獠窟或稱已

被賊擒尙須查確另議副將茅生蕙知州崔思唯始因連州之失移入陽山與署令屠洪基分派城守竟爾淪陷其人與印信之存亡尙未可知又連州委署吏目汪大綺連山縣委署典史張君明陽山縣委署典史李昂均屬同城各有巡捕之責存亡亦尙未聞又副將馬泗汗奉委駐鎮連陽失事是其信地但未聞下落應俟查實另議至總兵郭虎奉有王令救援陽山兵未至而城先陷雖無逗遛之咎亦應責令恢勦以效楡收分守嶺南道參議陳贊廣州府知府王庭雖州邑失陷屬其經管地方第道府遠居省會未免鞭長莫及均應策勵以圖後效廣州府署捕盜通判周憲章亦有守禦之責但本官原住省城近以冗員議裁委往佛山鑄銃似應免議若職以菲材濫竽雖殫力申督而重寇莫支相應席囊待罪請別選補賢能免悞地方謹會同靖南王耿平南王尙巡按廣東監察御史楊甸瑛具題伏祈聖鑒勅部覈覆施行爲此除具題外理合具揭須至揭帖者順治玖年拾月日右僉都御史李棲鳳

吏部題本

吏部尙書固山額真臣朱馬喇等謹題爲狡逆襲變非常分土捐軀莫及亟懇轉題恢勦以震國威以奠危疆事考功清吏司案呈奉本部送准兵部密咨該廣東巡按楊旬瑛題前事內開順治玖年捌月拾貳日據廣西分守左江道趙胤翰分巡左江道汪繼昌潯州府知府胡順忠南寧府知府葛天驊太平府知府黃中通等會詳前事切照粵西道府州縣荷蒙朝廷不次受職感戴之私捐糜莫報自隨定南王師由楚入粵櫛沐數載幸荷皇靈赫濯粵西諸郡漸次蕩平各官亦漸次赴任竭力招撫靡不仰戴聖德幾致太平不期逆賊猖獗湖南又乘定南王師分屯各府省城虛弱遂爾躡入全州隨於柒月初壹日蒙定南王飛檄調回各路兵馬離汛入援一應文職諸員盡帶齊行齊至梧州駐劄印信暫交總鎮以防疏失俟勦逆後再圖恢復令諭如此迫切不得不星馳就道本道胤翰率同潯州府知府胡順忠同知唐崑啓通判王瑋推官孫獻台桂林縣知縣王業成署平南縣知縣袁良陞署貴縣知縣楊銓并府縣首領教職等官俱於前月初柒日仰遵王諭卽隨副總兵馬化麒於初拾日到梧矣本道繼昌率同南寧府知府葛天驊同知王國祥推官汪衡宣化縣知縣孫日強新寧州知州吳鳳翔隆安縣知縣趙士修橫州知州羅昌齡永淳縣知縣嚴度署上思州知州張登雲太平府知府黃中通養利州知州雷應時左州知州平世賢除永康州知州孫如蘭崇善縣知縣江中柱病故外其府州縣首領教職等官卽隨線提督俱於前月貳拾柒日到梧矣所有潯州道府縣印共計伍顆當交潯梧副將馬化麒收貯訖南太兩府道府州縣印共計壹拾叁顆全交線提督收貯訖方謂急救本根則外府不難再整詎意職等至梧而初肆日省城已陷矣定南王殉難在省各官俱各被執輸等號天大慟自國家開創以來未有如

今日之挫辱者也此讎誓不共戴現今在鎮將合兵奮勦誓必滅此朝食願賊勢踞勝披猖必得大兵協攻方出萬全翰等進不能挾寸刃以助敵懷退不能循舊職以撫殘黎空懷忠憤無路叩關兩粵一體伏乞俯念各官忠悃准賜題請速發大兵掃蕩餘逆庶定南王之忠魂稍慰而各官亦得以未死之軀圖報於萬一矣等因到臣該臣會同廣東撫臣李棲鳳看得粵西道府州縣等官因奉王令掣任繳印齊赴梧州固非私離職守者行至中途始聞桂林失陷定藩盡瘁今諸臣印既總繳地方全無間關播越客守蒼梧相對不免饑饉合詞籲求代題迅勦恢克情殊迫切除請兵事已經臣與撫臣連疏懇求皇上命將出師外所有粵西諸臣蒙難及亟望恢復事情謹據實上聞干係封疆謹密疏馳奏伏祈聖鑒施行等因順治玖年拾壹月初貳日奉聖旨該部知道欽此密封兵部密咨到部送司除武職聽兵部議覆外案呈到部該臣等議得粵西道府州縣等官奉王檄調離任應候事平查覈功罪定奪已經臣部覆平南王疏內奏明無容再議恭候命下臣部行令遵奉施行緣係狡逆襲變非常分土捐軀莫及亟懇轉題恢勦以震國威以奠危疆事理臣等未敢擅便謹題請旨順治玖年拾壹月拾陸日吏部尚書固山額真臣朱馬喇侍郎臣土賴臣佟代太子太保都察院右都御史管吏部左侍郎事臣孫承澤右侍郎兼內翰林弘文院學士臣成克鞏啓心郎臣甯古里理事官臣杭愛臣巴党喜臣楊雀祥臣鍾有鳴副理臣額一兔臣鎮尼考功清吏司郎中加從肆品臣梁清遠

(殊批)是

陝西巡按王佐題本

巡按陝西試監察御史臣王佐謹題爲馳報鄰封賊情事本年拾壹月拾柒日准鎮守興安總兵官趙光瑞塘報本月拾壹日據白土路遊擊白守榮塘報本月初捌日戌時據探丁回營准湖廣鄖陽府竹山縣手本本月初貳日有秦口胡家寨王蜀良報稱川賊連營由房入竹營頭割有伍拾餘里勢甚猖獗見今攻打胡家寨此信至的原係緊急賊情相應移會等因准此卑職卽撥塘丁偵探俟回營另報等情到鎮據此爲照川賊連營由房入竹密邇白土關勢切震鄰本鎮卽差塘丁赴竹谿地方偵探俟有的情另行飛報等因到臣准此該臣看得興安一隅壤接楚蜀其間層巒茂林寇易竄伏邇惟逆渠孫守金糾黨盤踞紫陽山境鎮臣趙光瑞督兵進剿黨已漸削正取元兇而川寇又震鄰矣在該鎮設奇堵剿自不遺力但恐北擊南遞蕩掃無期必須楚兵協力夾剿則賊可計日而淨也旣經塘報前來相應具題伏乞聖鑒勅飭施行緣係馳報鄰封賊情事理臣未敢擅便爲此具本專差快手王全齋捧謹題請旨順治玖年拾壹月拾捌日巡按陝西試監察御史臣王佐

(硃批)兵部速議具奏

兵部揭帖 順治九年十二月初三日到本揭對同

兵部題爲亟定戰守之著以取收服之效事該陝西總督孟喬芳題前事等因奉聖旨著確議速奏兵部知道欽此密封到部該本部看得督臣孟喬芳議請以保寧爲駐兵之地平西王駐鎮漢中與保寧相爲犄角固山之兵暫撤以舒秦民運餉之勞此三議者皆進戰退守固圉制勝之要著也但案查本年十月內本部議覆四川撫臣李國英按臣郝浴疏內奉有令平西王固山額真墨勒根蝦等同文武各官暫回漢中之旨今保寧大捷督臣復有此議事關重大本部未敢擅便相應恭請聖裁勅下本部遵奉施行除具題外理合具揭須至揭帖者順治九年十一月日

吏部題本

吏部尙書固山額真臣朱馬喇等謹題爲確查鎮將靖州失事情形兵馬數目謹據實上聞仰祈聖鑒事考功清吏司案呈奉本部送准兵部密咨該兵部題覆續順公沈永忠奏前事內開案准兵部咨爲賊勢燎原鎮將失利謹據實密陳仰請大兵合勦莫楚卽以關滇黔事內開該臣奏前事奉聖旨速議具奏靖州失事情形着確察兵部知道欽此欽遵密封到部該本部議覆奉聖旨是依議行着速發大兵進剿欽此密封到部備咨到臣時臣方控遏賊寇食息靡遑荷蒙聖恩勁旅一到軍聲克壯稍得片時寧帖確查失事之由臣有不能爲總兵張國柱諱者當賊陷沅之後勢益披猖情形詭祕靖城告急臣無不援之理隨挑選滿漢官兵併黔會各營防兵以及靖城主客官兵共計八千有餘悉付國柱總統一應聽其調度相機堵剿原行之文可按也臨行復諄囑持重非哨探明確不可輕進國柱於五月初四日督兵啓行初七日卽已抵靖臣方喜其有城可憑矣十三日據國柱報稱哨得賊有三千已過江東大河一營住樓子一營住遠口一營住遠洞本職歇馬數日卽行進剿等情隨牌行國柱云賊果三千正其授首之日當卽相機撲剿毋容滋蔓去後又據國柱報稱本職擬於十六日督同滿漢官兵(阿)打哈哈番徐朝官等併撥防沅州副將卞世龍遊擊羅光先等兵馬進剿矣其發報不知在何日十九日方到軍前臣卽於本日卽遣纛章京馬進功領兵策應臣亦繼進行至楓木嶺而敗績之信已至隨收集殘兵找尋國柱下落於二十二日始踉蹌奔回臣探之輿論按之塘報乃知國柱原未調集各會各營兵馬一味粗心猛氣不先哨明不審衆寡不察地利輒愴然進戰深入重圍致墮賊計衆寡不支遂致覆歿靖亦繼陷後雖潰圍而出其輕率寡謀之罪安可追乎此進戰失事之確情也又查得在陣力戰身死者

臣旗下則有一等阿達哈哈番徐朝官牛景任景貴代子韓思禹等三員左路鎮下則有右營都司署遊擊黃鼎鉸左營守備署遊擊高成功二員千把王吉祥等五員凡係劄委不敢概錄姓名以瀆宸聰外是皆忠勇性成捐生奮敵節烈可嘉者又透圍而出者則有阿達哈哈番王希賢噶把什章京張友魁遊守千把則有周國明朱必泰等十五員今俱在營領兵亦不敢概錄又在陣力屈爲賊所執者則有防沅中營副將卜世龍後營遊守羅光先楊貴庫中路後營守備陳啓雲等肆員又靖城失陷生死未明者則有新任右路副總兵一員楊國勳併關防一顆守備子起龍李華等二員千把趙民從等二十一員黎靖守備署參將事一員馮先併關防一顆靖州知州一員沈一恆併印一顆臣旗下陣折滿兵一百零三名馬一百六十九匹中路鎮下陣折兵丁六百六十八名馬一〇三十六匹左路鎮下陣折兵丁六百四十六名馬二百三十八匹防沅隨戰兵丁陣折九百五十一名馬一百匹又陷靖右路兵丁一千三百零四名馬二百五十九匹家口一千五百一十五名口防沅陷靖兵丁一千名馬四十三匹黎靖陷靖兵四百九十一名馬三十三匹又查得在陣先奔陷賊者則有中路右營遊擊王家棟聞風率兵投賊者則有署右路前營遊擊閻廷桂二員此進戰陷官兵馬匹之確數謂非國柱喪失可乎夫臣以待罪之身何敢報顏律人第時方用兵若不據實上聞恐無以昭勸懲而示將來至若臣任將罔効禦寇無能雖蒙聖恩垂鑒兵單食缺而臣實無地自容除束身行間靜聽嚴譴外其張國柱近益頹靡不振應作何處分併將備員缺作何推補臣未敢擅便事關軍機冒昧密陳字涉煩冗統祈鑒宥勅部議覆行臣遵守施行等因順治九年十一月二十一日奉聖旨兵部速議具奏欽此欽遵密封到部該臣等看得湖南失事凡係封疆之臣自難辭咎臣所參張國柱應令圖功自贖候事平之日奏請定奪其死事各官亦俟事

平查明另議所有將備等官員缺應令續順公具報定遠大將軍敬謹親王聽就便選委臣部仍查取履歷覆請實授給劄可也恭候命下遵奉施行等因順治九年十一月二十八日奉聖旨依議行欽此密封兵部密咨到部送司除武職已經兵部議覆外案呈到部該臣等議得靖州失陷知州沈一恆生死未明併印信下落應勅該督撫按確查具奏再議恭候命下臣部行令遵奉施行緣係確查鎮將靖州失事情形兵馬數目謹據□上聞仰祈聖鑒事理臣等未敢擅便謹題請旨（下缺年月銜名）

（硃批）是

江西巡按張嘉題本

巡按江西監察御史臣張嘉謹題爲恭報連恢貳邑仰慰聖懷事准巡撫江西左副都御史蔡士英會藁內開本年拾壹月貳拾捌日准提督江西總兵官劉光弼手本內開爲塘報恢復安福縣城楚賊踉跄奔退再令官兵疾擊情歸以全收大捷事照得楚賊入犯江右而永新安福兩縣相繼失陷道將府縣嬰城而守郡城本提督親統馬步官兵抵吉因賊勢鴟張乃日發撥丁遠偵確探始則稍遏其鋒繼則剪其羽翼我兵知賊虛實日每相對賊仗頗窮我因得乘其隙以圖恢剿拾壹月貳拾壹日本提督選發撫標右營遊擊岑應元提標右營遊擊王之任領兵官任仲良郭定遠以及各營中千把總帶領材勇親丁前往安福進發本提督同分巡湖西道僉事鮑開茂吉安府知府楊可楹吉安營參將羅映怡固守城池至貳拾叁日據遊擊岑應元等差兵塘報於貳拾貳日已刻到安福縣地方離城貳拾里下營探見賊營列於縣城拾里之外我兵奮勇往擊賊遂潰走追斬百餘活擒數拾名據活賊口供賊皆劉京之賊楚賊在永新連日起營陸續往湖南奔走我兵遂復安福縣城等語本提督當令提標左營千總范之玉持令箭速催各營將領盡挑精銳馬兵先行步兵隨後星夜撲往永新賊旣思退情歸可擊且聞劉京賊衆與楚賊未起營者盡屯永新城內官兵務期馳進因剿去後俟有情形另文再報所有恢復安福縣城理合先行報聞等因到臣又於拾貳月初壹日准提督江西總兵官劉光弼手本內開爲塘報恢復永新縣城官兵奮勇追殺大捷事拾壹月貳拾陸日據撫標右營遊擊岑應元提標右營遊擊王之任領兵官任仲良郭定遠等塘報前事內稱本月貳拾壹日職等奉令堵剿楚賊於貳拾貳日恢復安福縣城併陣斬情形業經塘報在案因擒活賊口供賊衆尙在永新連日起營退轉湖南復奉本提督

令箭催令官兵急擊情歸職等於貳拾叁日帶領兵馬以及本提督聽用官材官親丁內丁星夜兼程前進於貳拾肆日辰時抵永新縣是日大霧迷天對面不能認人職等親自先行將抵城門只見鄉民奔走遂拏一二名審問乃云楚賊連日扯哨往湖廣昨貳拾叁日午時收後精兵起營劉京隨去職等再問行了若干路乃云楚賊一日只行叁拾里職等隨即商議挑選披甲有馬材勇親內丁及各營有馬官丁馳追追過古城將近茶陵追及賊尾我兵分股追殺賊貳拾餘名我兵縱馬又追又殺伍陸拾名山高路險雨大天晚隨收兵轉割要口查陣得賊馬伍匹陣獲僞坐纛壹桿銃拾貳門刀貳拾口弓箭柒副長鎗百餘桿各營兵丁輕重傷叁名陣傷馬壹匹貳拾伍日欲再往追探賊去遠隨回永新縣城安民併將賊示懸掛於肆門者盡行洗去今除將陣獲器械留營改用外所有陣獲賊馬伍匹坐纛壹桿相應解驗再貳拾貳日安福陣擒逆賊時在行營且帶重傷難以押解比時於營前梟示訖理合塘報等情據此該本提督看得楚賊之入犯江右狡志初謀匪細幸大兵驟至長沙賊遂遲疑回顧我兵乘其有隙得擊情歸雖楚賊漸退追斬爲數不多而劉京羣衆亦已膽寒矣至吉安郡城危而復安金湯無恙安福永新兩縣相繼失而旋復皆賴貴部院威靈巡西道僉事鮑開茂吉安府知府楊可楹以及將領戰守所致若本提督實俱因人成事也又何敢居功哉除馬匹留營騎征外所有僞坐纛除報解總督部院查驗外相應移會各等因到臣准此該臣看得逆賊乘犯湖南之勢驅其象馬大股西來其志意頗爲不小又兼土寇劉京歷年爲江省巨害潛相勾引習熟路徑臣到任之初卽慮幅員廣廓距省甚遙恐其狡逞當發撫標遊擊岑應元統兵堵禦屢節彼中道弁多方設防又商提督鎮臣劉光弼遣提標遊擊張曾顯王之任前往扼剿無如岐路甚多湖西袁吉貳府其屬縣在在可通湖南江省兵力有限分守不支防此則

漏彼禦彼則失此是以狡賊先設疑兵於袁州之插嶺關勢欲進窺而陰以大隊突犯吉安以致永新安福永寧龍泉等處相繼淪陷縣令防將兩被執去更耽耽於吉安府城思圖併力極攻臣屢據道府營將塘報壹日之間警信狎至臣一面移會提督鎮臣劉光弼親統兵馬疾趨調度堵剿一面飛授各將方略且戰且守又一面嚴節各縣清野保聚(飭)臣同撫臣率孤旅彈壓省城安輯人心使賊進無所攻旁無所掠師老計窮狂謀頓戢又會移江南督臣馬國柱挑發援兵復貳次分調潯師併移會九江總兵官楊捷駐劄省會大張聲勢通行牌諭賊故莫測我兵虛實咸驚疑沮沮各無固志適幸王師迅抵長岳風行霆擊湖南巨寇鼠竄兔逃披靡潰亂吉安之賊愈加膽落故提督鎮臣率彼中將領選銳直前道臣鮑開茂籌度行間乘其惰歸追而擊之賊遂無暇顧後捲地疾奔雖擒斬無多而前此已失之永新安福貳縣盡復故土矣臣急檄各將乘我師破竹之勢合力恢永寧龍泉正在驅剿料賊勢既潰亦指日可定耳俟有捷音另行飛報總之此一捷也皆我皇上神武不揚用張天討故將士憤擊恢復成功俾江省一隅之地危而復安所藉以保境安民者惟荷我皇上之威靈耳今准捷報前來合先具疏上聞以慰聖懷其失事與恢克功罪因地方初定見行查覈必俟彼中道府回文至日再細勘情形另行奏報外相應具題伏乞聖鑒施行緣係恭報連恢貳邑仰慰聖懷事理未敢擅便爲此具本差快手宗正齋捧謹題請旨順治玖年拾貳月貳拾日巡按江西監察御史臣張嘉

(硃批)兵部知道

戶部題本

戶部尙書固山額真臣噶達洪等謹題爲陷城確有可據荒亡已經察明懇乞皇仁蚤沛以蘇舊困以急新賦事山西清吏司案呈奉本部送戶科抄出兵科給事中王廷諫題前事內稱竊惟國家足賦之道在安百姓而欲百姓之奠安先去百姓之疾苦夫疾苦在水旱凶荒多寡不同輕重各別必須踏勘而始見疾苦在賊劫城陷方陷之始某州某縣塘報已明及陷之後某官某罪招詳最確此不待再察而卽知晉自闖寇蹂躪災荒頻仍已望倒懸之解至於陸年疾苦尤有不忍言者緣姜逆作亂土賊蜂起所在城池告陷其房屋倉困之焚燬者不知凡幾婦女財物之擄掠者不知凡幾百姓之死鋒鏑溝壑者不知凡幾死僞官之吮脂吸髓非刑拷打者又不知凡幾以致父子不相見兄弟妻子離散哀號萬狀鄭圖難繪已久在聖明照臨司農洞鑒中矣今將陸年拖欠並柴捌玖年額賦一時併徵臣知必不得之數也切思民之辦賦全恃農事陸年腴田化爲戰場今歲平地盡成澤國安能迫待斃之子遺包死賠荒乎有司卽痛加敲扑強剜心肉以完陸年逋課然千瘡百孔將柴捌玖年額賦又成拖欠矣臣垣中見撫臣劉弘遇有災黎血枯等事壹疏爲民請命目擊必眞業於拾月初陸日奉聖旨戶部速議具奏欽此小民方十室九空呼籲無門一聞速議之旨深山窮谷莫不舉手加額欣然相告曰疏朝上而澤夕下屈指可竢也嗟嗟民之望君也固殷而君之念民也尤切如鄉民王本原去荒存民壹疏自爲控陳我皇上猶恐下情難達勅撫按代奏豈撫按入告者反不軫恤恩膏上屯哉但呼吸存亡勢難久待且時值歲終考成在卽伏乞勅部速覆將陸年拖欠盡行蠲免柒年以後未報災傷者上緊追徵則皇仁蚤沛一日卽百姓蚤沐一日之賜舊逋蚤清一年令有司蚤完一年之額民困與國課相關臣所爲過計而

直陳也字稍逾格惟聖鑒施行等因順治玖年拾壹月貳拾肆日題本月貳拾柒日奉聖旨該省寇禍最慘深可憫惻著速議具奏以恤窮民該部知道欽此欽遵抄出到部送司奉此相應議覆案呈到部該臣等看得錢糧固屬軍需而請蠲總爲民命臣部前據首撫劉弘遇題爲災黎血枯壹疏及平定州民王本原奏爲去荒存民壹疏俱經覆奉俞旨行令該撫按確查地方被害輕重情形去後今據科臣王廷諫疏稱晉省陸年地方被姜逆叛亂蹂躪獨慘腴田化爲戰場今歲平地又成水澤待斃子遺安能並徵柴捌玖年之額賦請照晉撫所題陸年逋課盡爲蠲免查科臣所奏與撫臣前疏俱屬一事應請勅下該撫按遵照前旨速查該地方被害輕重情形前來以憑彙題請旨定奪者也既經該司案呈前來相應覆請恭候命下臣部轉行遵奉施行臣等未敢擅便謹題請旨順治玖年拾貳月貳拾肆日戶部尙書固山額真臣噶達洪尙書臣車克少保兼太子太保尙書臣劉餘祐（下缺）

（硃批）是

湖川總督祖澤遠題本

欽差總督湖廣四川等處地方軍務兼理糧餉兵部尙書兼都察院右副都御史臣祖澤遠謹題爲地方遼闊宜戒前車明派汛守以鞏疆圉請駐滿兵以消反側仰祈聖鑒俯賜採擇事照得湖廣幅輳倍於他省武昌據江西江南上游荆襄一帶楚蜀咽喉湖南數郡當雲貴兩粵之衝山洞苗蠻負固窺伺更爲緊要前設官定制省中則有督撫并提督矣卽陽則有撫治又有卽荆兩鎮矣湖南則有偏沅撫鎮暨辰常鎮矣且郡邑邊徼各設副參遊等官列汛陳兵可謂有備無患也奈賊入湖南卽肆蹂躪歸巴恢復尙爾未遑朝廷勤南顧之憂特移公旅特爲翰屏而壹萬陸千之衆歲費金錢不下數拾萬乃孫逆披猖望風遠遁遂成燎原若非廟算淵微先發陝兵扼岳則全楚誠有不可知者長江以下寧不震動哉今王師恭行天討自然立奏蕩平正宜乘此速計安排臣肩重任夙夜圖維昨因料理大兵糧餉船隻於拾壹月初壹日由武昌馳至岳州不特諸凡完備而地方情形向屬揣摩者今半得之目擊矣臣以前車作戒不得不亟爲陳請合審大勢首在湖南巡撫以文臣獨禦偏沅無益於事宜將總兵楊遇明仍駐沅州而轄靖州要害之區允當專設壹鎮但靖州兵單戰守不備宜增參將壹員添兵壹千辰州應接沅靖地係前鋒今鎮臣徐勇遭陷急宜推智勇有夙望總兵壹員令其星馳任事整理城垣補招額旅仍駐辰州而管轄常德等處撫臣金廷獻宜移駐寶慶居中調度統轄偏沅靖州辰常聯絡衡永長沙而原設兵將所當照舊分防者也至寶慶見有都司壹員兵肆百名應添兵壹千貳百名改設副將壹員以爲城守若郴州之宜章地接廣東原有守備額兵貳百已經改設參將添兵共有壹千捍禦可資不必再議矣若九溪衛曾設守備并兵叁百今亦宜改設參將增兵柒百成壹千之旅以固溪蠻界限禮

州逼九溪連常德地當孔道止有守備與兵叁百宜改設參將添兵柒百足壹千營制以爲九溪後勁岳州左近洞庭爲湖南衝隘荆襄武昌交會於此前改制兵柒百令參將并任防湖之責誠難兼顧宜增兵叁百名合成壹千以陸百名管城守肆百名仍作水師專管洞庭防禦次在鄖陽撫治有秦豫分壤之責宜仍駐襄陽以捷呼應而總兵鄭四維仍駐荊州鎮守荊州安陸等處總兵張士元宜移駐鄖陽鎮守鄖襄等處與治臣列鼎足之時若彝陵一州係四川通衢今歸巴正圖恢復原設遊擊額兵肆百名遵部議添兵陸百已足壹千之數又無庸再議者也自湖南鄖陽而外在武昌矣既設巡撫復設總督提督意欲居重馭輕未免詳此略彼如撫臣遲日益有全省責任應居省會臣膺湖川簡命豈宜近駐武昌俟四川大定當再商移鎮而提督柯永盛湖南北均屬統率誠宜移駐長沙蓋長沙爲南北適中之地提臣駐此庶可掉指臂而作四應若漢陽參將則可裁也地邇省城有警則省兵可撥宜改守備壹員留兵叁百名以資防衛其參將與兵貳百應那之澧州如此更派庶汛守明而疆圉少鞏矣臣又有說焉蓋湖南數經賊陷么麼隨地竊發人心風鶴無所恃以爲安羣盜鷓鴣張無所懼而思逞向使早設滿兵一旅鎮防斯土豈致屢遭決裂頻動王師大與士馬而浩費芻糧耶爲今之計宜急設滿旅駐劄長沙適中之地與提臣共處一城爲湖南保障以壯全楚聲援况江南陝西較此地少爲寧靜尙駐滿兵收茲成效而殘破已極之區不早定議恐一悞不堪再悞故就往事而論與其留公兵百莫若得滿兵壹也如虞糧餉不敷公師月支餉貳萬陸千零陸拾餘兩米捌千玖百壹拾餘石豆草尙不與焉有如許銀米豈獨足供滿兵即各處增設官兵之俸餉皆可取足矣臣議駐之長沙者緣南北便於兼顧而水陸不難輸輓耳其長沙副將并兵壹千捌百則宜改設武昌以司城守而提標伍營應撥壹營官兵爲長沙城守餘肆

營同滿旅作四應戰兵可也如此則滿兵聲振而羣醜反側潛消實封疆千載之利而非臣一己之私衷也臣在岳州時曾與沅撫金廷獻提督柯永盛面籌大略回省又向撫臣遲日益南北按臣李敬聶玠等再三商酌復移咨治臣趙兆麟咸有同心謹繪圖備陳如果芻蕘可採伏乞皇上勅部速爲議覆更派汴守換給專勅照依江南陝西之例准設滿兵鎮防俾文武各思（下缺）

（硃批）著議奏該部知道

[Faint, illegible vertical text columns, likely bleed-through from the reverse side of the page.]

平南王殘揭帖

(上缺)城奔□□□□□□□□之中難以追獲即收兵下營本日申時忽有賊逆數百自城北而來直抵城下職同中營遊擊王之道千總董伯文周應祥把總夏應魁帶兵從西路截殺管噶撥什守備王自福千總劉英才把總李有功左翼千總王九朋右翼守備姚明彌勒章京下代子潘起龍帶兵從東路截殺兩股官兵奮勇齊上陣獲偽參將壹名張應龍搜獲委牌壹張殺死逆賊不計其數餘賊四山逃竄時值天晚昏黑不便遠追即收兵回城當審僞賊張應龍供稱廣西省城有僞宗室安西將軍朱喜三駐扎職等因見餘逆未靖不便拘押即將僞逆張應龍梟斬懸竿等情塘報到職職等據報即率催水陸官兵星夜兼程前進於本月拾伍日大隊俱到陽朔拾陸日自陽朔起營水陸並進拾柒日至地名大墟離省城叁拾里忽報逆賊數百前來攔路職等即令中軍遊擊戴成功中營遊擊王之道管噶撥什守備王自福左翼鎮下千總王九朋右翼鎮守備姚明等迎頭直進賊衆披靡陣擒僞副將壹名朱亨叔獲馬壹匹陣斬賊逆不計餘賊奔走過河池死殆盡時值黃昏又因河水阻隔即收兵安營至拾捌日黎明忽報僞安西將軍朱喜三周星茂覃相栢等領率賊兵千餘前來對敵職等即令中軍遊擊戴成功中營遊擊王之道把總夏應魁杜長青等帶兵從中道而進管噶撥什守備王自福千總劉英才左翼鎮下千總王九朋帶兵從左路夾擊千總董伯文周應祥右營旗鼓任忠厚右翼鎮下千總姚明彌勒章京下代子潘起龍帶兵從右路截殺三路官兵奮勇當先陣斬副將壹員糜成氣生擒僞總兵壹名覃相栢活擒賊兵伍拾叁名大旗四面鎗刀器械拋棄遍野大隊官兵四山圍裹而進賊逆大敗我兵乘勝追至桂林城下見我兵緊追不敢入城遠城奔竄職等即分撥官兵堵守四門令中軍遊擊戴

瓊州總兵高進庫揭帖順治十年四月二十四日到本揭對同

鎮守廣東瓊州府總兵官高進庫謹揭爲海外殘疆初離湯火謹陳顛末情形仰祈聖鑒以豫綢繆以固邊徼事職進庫小弁末流謬爲平靖二王薦拔荷蒙皇上特恩除守瓊南職卽殞首碎身亦未能仰報知遇殊隆之萬一也職自順治玖年柒月貳拾捌日恭接印劄到任受事隨察瓊郡叁州拾縣孤島海環其在陸也則有雲路山旻大小五指等山爲生熟黎岐之老窠土宄峒官之深窟也極惡窮兇挾招要賞久居奇貨及王漢諸賊與夫負隅殘寇盤踞東西而全瓊百姓土一流九間稍驚者非食明糧卽授僞劄以爲護符狐假虎威髓吮良善以致春夏石米百金善死惡生十之七八慮罪貫盈則嘯聚深山加之投誠官杜永和張月等部下逃脫悍將強兵此類不少然在海邦初降招之貳疑不出勦之人心動搖寬之勢聯決裂是在陸之大費預防者也然猶寇在目中未謂變生意外其在水也四通八達萬派千流如瓊城之命脈則在海口之白沙港諸州縣之咽喉則如文昌之鋪前之清瀾崖州之三亞之保平感恩之恩萬州之東澳之那樂樂會之博敖儋州之新英臨高之博頓昌化之英潮等港在在示瑕縱多船兵此備彼寡無所不備則無所不寡環洋倭寇對閩諸鄭風波出沒叵測變生而水妖乘隙登岸作賊沿海遍處時時竊發尙屬尋常加上新降水師恐不諳紀律指臂不靈是在水之大可危慮者此也且海天窮島兵火之後加之饑荒饑荒之極加之瘟疫子遺將盡安從措糧糧既不足安從集兵制器脩城置船以防水陸是又水陸之師之糧餉大費設處者此也今職於兵則且調且募務精務足仰遵經制預定職鎮下防陸官兵貳千員名分爲左右二營其左營遊擊壹員官兵壹千員名中軍守備壹員千總貳員把總肆員則以職中軍官都司徐登雲守備岳世隆千總馮得成王伏廷李自伏何汝

孝李奉雲閣一宰等領之右營遊擊壹員官兵壹千員名中軍守備一員千總貳員把總肆員則以職下參將張自臣
守備王魁都司喬吉順白光才千總田文魁吳顯綱張茂英曹英等領之水師參將壹員官兵壹千員名中軍守備壹
員千總貳員把總肆員則以投誠官張化豸等暫領之鎮標旗鼓壹員則以職下旗鼓官守備枝成領之儋州副將壹
員官兵壹千員名中軍守備壹員千總貳員把總肆員則以職下副將牛希才守備閻芝傑千總王國順吳才苗一龍
閻芝儀劉記先王應虎等領之萬州遊擊壹員官兵壹千員名中軍守備壹員千總貳員把總肆員則以職下參將馬
正龍守備陳邦仁千總時國用王合楊志英喬蛟騰張光耀員雨等領之崖州遊擊壹員官兵壹千員名中軍守備壹
員千總貳員把總肆員則以職下參將馬可任守備高魁千總楊文科李九齡毛德文馬驪黃虎盧德等領之內除新
投誠官張化豸外其餘皆屬久奉經制部劄復經平靖二王題請外隨奉靖南王軍前牌委而佈置之仍候兩王再題
請旨定奪應給勅書關防者統候給賜至職戎旗下官毛鳳翥汪天聖楊丙辛劉三將楊夢龍趙起鳳劉一鳳高安張
有才陳舉郝進忠路天衢杜名宗楊元劉應貞周豹張奇道李舉蘇名會郝進山張奇勝王虎張一虎張名余國棟張
伏熊國瑞侯允智員應科張永劉成張國起王進喜陳虎王興楊成玉張士益李若瑤宋德隆李友功李復輝周文盛
蔣成名朱國選曹大義等皆從職出山同下江南恢復廣復高收廉定瓊萬苦千辛百死一生血戰功勞著匪朝夕
其諒加職銜者多出諸王督撫伏懇皇上憐恤量各給劄旌其舊績鼓以新猷庶微弁免生有功無賞之心而與執戟
臨□□□其水師兵船雖經接到降人船隻權爲佈□□□□合無照依平靖二王暨廣東巡撫臣李題爲粵中
甫定分禦宜先等事內請設瓊州府水兵壹千名外海船肆拾隻儋萬崖三州各水兵壹千名外海船各貳拾隻於順

治捌年柒月拾壹日題奉聖旨依議行欽此欽遵外伏乞皇上照依題請部覆准給外海船共壹百隻就勅二王撫按設處分撥或動何項錢糧俾蚤一日脩造則蚤得一日之預防也至於兵糧則依靖南王所議以海南所有以養海南之兵權宜區處而美意良法則有司存若夫以寇滅寇因黎撫黎固命脈以通咽喉周內安以防外侮因時制宜因地制□□□□務令海波不揚則職必誓竭鴛鴦以上抒我皇上南顧憂也然職猶有請焉職既守瓊則凡專鎮事宜與夫職左右二營水師并防守儋萬崖三州一切大小官俸每月某員該支若干其每千兵或該分馬兵若干戰兵若干守兵若干其馬戰守三項兵丁每月該給口糧若干并某官該養騎坐馬匹若干或炤腹裏粵中或在海外比照邊上事例各官兵馬俸糧等級多寡數目并責成節制等務應給勅書令牌以及每年奏齋三節表箋并奏報軍情年例繳報兵馬文冊恭遇特典謝恩應用勘合火牌等項統乞兪允下部照例頒發不致掣肘獲展心力以仰報浩蕩於無暨也緣係海外殘疆初離湯火謹陳顛末情形仰祈聖鑒以豫綢繆以固邊徼事理未敢擅便除題請旨外擬合具揭須至揭帖者順治拾年正月貳拾壹日揭

[Faint, illegible text columns within a rectangular border]

廣東巡按楊旬瑛揭帖 順治十年五月二十日到本揭對同

巡按廣東兼管屯田鹽法監察御史爲馳報恢廉大捷事順治拾年貳月初玖日據署分巡海北道胡曰恭參將修宇章京崔承科吳廷桂張勇白汝松王國棟知府楊模聖通判張于盤新委署合浦縣知縣羅國治等塘報前事稱職等前奉王令相機恢剿于去年拾貳月貳拾日起兵貳拾叁日進取永安屯扎新墟候糧已經塘報外本年正月拾柒日挑選各營馬兵壹百柒拾名步兵壹百捌拾名議以參將修宇牛泉張勇王國棟等卽晨統領前去至開口劈柵數層把關賊兵奔潰星夜馬步前進拾捌早五鼓到城下僞官衆賊尙未開門有僞兵部李鍾璵等帶賊扎在西關外有嘯叭什千總王國棟帶甲兵伍拾名自西關追殺至大河邊斬賊無數參將修宇領千總何永盛把總陳應高代子胡有富等馬兵伍拾名步兵陸拾名圍困南門牛泉張勇領千總劉得功代子高顯登范文仲馬兵柒拾名步兵陸拾名圍困東門隨後卑職同知府帶領馬步親丁捌拾餘名前到城下同千總王國棟把總李若龍等圍困西門查得嘯叭什生擒僞監紀壹名廖魯男僞守備壹名盧陞得獲小馬拾匹僞兵部李鍾璵細查未見下落所騎之馬已獲再問城中僞道鎮將在內守城卽差人飛調章京崔承科吳廷桂府廳縣等官千總周奎張弘宣等督催老營兵丁星馳齊到一時分困四面會議拾玖早黎明先攻東南兩面俱未得上各營共製雲梯玖架貳拾早自西面齊攻兩個時辰賊用大石火砲將雲梯打壞卽刻又整雲梯壹面用火將西門燒燬暗傳西南兩面雲梯齊豎大兵一時俱上登城先斬僞總兵曾仲弘衆賊奔命跳城周圍趕殺無數城內衆賊盡被各營生擒除將賊兵當時斬訖外所有生擒僞太僕寺卿王道光僞海北道周騰鳳僞監軍御史管廉州府事喻虬僞副將黃文鎮僞合浦縣盧延震僞縣丞王禮傳等得僞銅印

肆顛僞錫關防柒顆木關防壹顆僞勅叁道僞劄付拾壹張馬捌匹婦女伍口其各營陣傷兵丁數目查明另冊開報此雖文武奮勇悉皆仰仗方略獲此大捷除將僞印關防僞勅劄付具啓解赴兩王外所擒各僞官王道光等職等未敢擅斬或解或就本地方梟示等因到職該職看得廉郡失守文武官兵退扎高州府之石城縣近稍進屯新墟候糧進勦職屢從該道塘報中趣其鼓厲將士相機恢復近出巡高州正月拾壹日廉州知府楊模聖自新墟來謁職嚴諭其傳語道鎮及行間官將作速奮勇開疆圖功贖罪隨出火牌壹面立遣高州府署通判時際昌星夜押解糧米接濟兵食隨據該府稟帖具稱將卒一見糧餉感奮鼓舞兵氣百倍卽於拾柒日起程貳拾日攻克府城從此欽州靈山不難旦夕底定皆賴我皇上天威遠振海澨荒徼復睹天日而靖南平南兩王指授有方讎叛俘僞膚功足紀除欽靈侯捷音至日另行奏報外謹會同靖南王耿繼茂平南王尙可喜巡撫廣東提督軍務都察院右僉都御史李棲鳳具題外理合揭報須至揭帖者右具揭帖順治拾年叁月初玖日監察御史楊旬瑛

江西南西總督殘揭一

(上缺)副將叫他發兩營或一營兵馬從黎樹杖由南漢來田燹堵路截殺其餘省兵進扎南漢地方堵路截剿卑職兩營兵馬過璜陂進小富追殺賊必由原路而出有江省兩路官兵截殺必盡根株但賊近六關不知江省有兵馬堵截否若江省有兵馬堵截死賊必無去路卑職方移營進璜陂過小富追殺若江省官兵不來卑職斷不離田燹路口恐賊兔脫理合塘報等情據此於捌月初肆日據副將賈熊爲稟報事照得積寇楊大總蕭都等已來南漢田燹林池一帶地方扎營本月初玖日守備管文魁高尙義等領兵先進拾貳日大破賊營退敗南漢卑職於拾陸日統師兼程進剿拾玖日領兵前進南漢賊巢賊敗入小富山中卑職已於貳拾日差人移文江省各副將約他發兵來南漢田燹合兵進剿卑職往璜陂進攻等情去後已於貳拾日呈報外貳拾伍日未時准江省各副將許世昌等移覆前事回稱卽遵貴府移文堵扎逆賊原路准備截殺其南漢田燹似屬貴府所轄本府兵馬不便過界恐防騷擾等語到職准此該卑職發撥探得近日賊寇楊大總副刀總九龍營宋朝宗番天王丘都蕭都洪都駱都等寇不下數萬俱屯聚小富璜陂楊礫山中聚賊之地在兩界之間但江省官兵駐扎層山大根竹已離賊營百拾餘里卑職兵馬駐田燹離賊營不過叁拾里已會二次江省各副將未來合兵會剿復差千總李天培熊子輝於貳拾陸日前往江省各副將商確派定某營官兵居左某營官兵居右某營官兵居中某營官兵截殺分爲幾路議定妥確方得盡剿根株以完合剿之局俟貳官回日另文再報等情據此於本月初玖日據副將賈熊爲稟報事本月貳拾陸日差千總李天培熊子輝前往江省各副將下營處面陳賊情會剿機宜去後已經呈報外貳拾捌日千總李天培熊子輝回賈江省各副將許世昌

李萬年王之任劉見龍手本移覆前事內云逆賊狡謀遁藏山窟貴府進剿之議但賊出沒尚無定踪似難驟動莫若困賊之計敵營兵馬屯扎黎樹竹橋嶺兩處其貴營兵馬亦屯要害無使脫兔以待地利躡熟再行進剿等語到職據此理合稟報等情據此本日據副將賈熊爲捷報事柒月貳拾捌日午後據兩營撥丁陳學等探得小富賊衆仍在小富將路徑空斷豎立柵木數層貳拾玖日早發撥哨探途中拿獲宜黃鄉民壹名到營審問係賊營逃出口稱逆賊今日去攻瓊陂走安福等情到職據此竊賊若攻黃陂走安福離縣不遠恐縣不測即刻起營離田焚往瓊陂堵剿本日戌刻到瓊陂委拾日五鼓發撥丁前探隨卽發前右兩營官兵守備管文魁把總熊子輝王三聘領兵往都府楊霽一路卑職帶領千總高尙義李天培李興領兵往小富一路分爲兩路進剿逆賊見我兵至齊出迎敵官兵奮勇撲命殺進賊皆大潰追殺二十餘里殺死逆賊二三百餘活捉賊百十餘名因山高竹立兼以小路羊腸未敢窮追至未時收兵回小富下營隨將所捉活賊審明斬訖賊連老營敗走竹橋嶺下過往興國永豐等處界卑職於初一日早帶領兩營官兵尾賊往興國永豐等處追殺俟有情形另行再報等情據此於本月十三日據副將賈熊爲塘報事本月初一日卑職帶領官兵往永豐興國等界尾賊追殺已經塘報外隨於初一日早從小富起營尾賊追剿自楊礫走麻林畝地方六十里下營賊離營不上三十餘里因夜黑路險未能追上於初二日五鼓起營天明追到賊下營處逆賊當夜打火把又起營宮走往竹管洞裏因係永豐界內未敢深入就在竹管洞外上田下營初三日早拏獲活賊四名審問口供賊分三路逃竄一股九龍營宋朝宗等賊奔往興國衣錦鄉逃走一股老四營頭等賊進竹管洞過樂安一股洪都駱都丘都仍從竹橋嶺下奔往南漢林池走東韶等情竊林池東韶又係寧都相近只得撤兵初四日出山由山塘吊

峰下營初五日往林池東詔追殺俟有情形另行再報等情據此於十六日據副將賈熊爲塘報大捷事本月初六日卑職出山從山塘吊峰一路追賊到林池下營未時卽有賊衆數千從南漢四山齊來隨卽掌號站隊官兵分爲五路守備管文魁把總熊子輝王三聘分爲三股卑職帶領千總高尚義李天培李興分爲二股齊出迎敵官兵奮勇殺賊大潰四散奔竄至夜黑收兵仍在林池下營初七日三鼓賊由間道從塘坊求田一帶奔往水口等處地方五鼓時有鄉民報知卑職卽刻起營自林池追殺二十里趕上死賊見我兵到由水口盡棄鎗鈹四散扒山大潰追殺五十餘里過大羅嶺姚山因夜黑路險不便窮追收兵大羅嶺上下營當陣斬獲不計奪獲馬二匹大旗十五桿鎗鈹無計初八日早差兩營撥兵前探至苦竹地方拿獲活賊二名審問口供逆賊兩日被大兵殺散餘賊奔往廣昌地方去訖爲此理合塘報等情據此於二十三日據副將賈熊爲塘報大捷事本月初六日自林池剿賊尾追至大羅嶺斬級奪獲俱於初八日塘報外初九日據林池練總李肇基報稱又有賊數千聲言要衝我營直過福建卑職隨於初十日領兵回永洛下營隨發兩營兵丁前往南漢偵探的確未見情形于十一日午時兩營瞭高兵丁楊守志等望見南漢山中果有賊衆數千分爲數股齊衝前來隨卽將官兵分爲四路守備管文魁把總熊子輝王三聘領兵往林池二路卑職帶領千總高尚義李天培李興領兵往東詔二路齊出堵殺賊之旗幟遮天砲聲振地官兵奮不顧身與賊對敵自午至酉凡十餘仗賊始大敗當陣斬殺三四百餘活捉僞副將五員僞參遊十一員活賊一百餘名奪獲馬騾驢四匹頭大旗拾伍桿鎗鈹無數僞劄五張兩營兵丁輕重傷者三十餘名陣亡兵丁十一名砲傷死馬二匹追至南漢口子奈賊皆退奔深山因夜黑山路危險未便深入至戌時收兵仍回永洛下營隨將所捉賊寇審問口供前月三十日因我兵

追至小富賊疑合剿兵馬齊到望風倉皇逃入竹管洞裏本月初八日因山野人攻殺利害復奔回南漢擬星夜闖過東韶走廣昌其賊首惟溫都洪都蕭都丘都等賊其餘逆賊四散與國零都各處去矣所獲逆賊僞官本應解驗因賊勢逼爾本營兵單經守無人恐生叵測只得斬訖卑職隨於十二日領官兵往水口洛口四面設伏堵剿俟有捷音另文再報等情據此于二十四日據副將賈熊爲塘報事本月十一日卑職統兵剿賊大捷已經塘報外十二日領兵往水口洛口一帶地方設伏堵截尾賊追殺皆奔入深山當日未有情形拾叁日隨發兩營撥丁前往吳村一帶地方偵探哨見賊在井灣劉家嶺開元一帶山中與南豐宜黃廣昌寧都四縣界地之中相聯未知去向皆係溫都蕭都駱都丘都洪都等賊俱被我兵屢次追殺從間道盡奔東邊一帶老山惟九龍營宋朝宗四營頭等賊仍在永豐與國界上一帶山中相聯未從過來卑職意欲領兵進剿奈緣山險路嶮樹木叢集兵單未便深入本日仍回水口居中下營堵賊去向即發千總高尙義領馬步撥丁前在吳村哨探堵賊出路發前營把總熊子輝領兵往後在永洛堵賊來路使賊不犯寧界於拾柒日已經移會江省各副將外俟再探的實相機進剿另文再報等情據此於玖月初肆日據副將賈熊爲塘報事本月十三日隨發兩營撥丁進山前往吳村一帶地方偵探哨得賊在井灣劉家嶺開元一帶山中與南豐宜黃廣昌寧都四縣界地之中相聯未知去向俱係溫都蕭都駱都丘都洪都等賊俱被我兵屢次追殺從間道盡奔東邊一帶山中於拾捌日已經塘報外拾玖日據小田鄉民蕭英蕭雲傑報稱有蕭都營內將官謝才王棟帶領家眷兵丁貳百餘名口先已披剃今願投降等情到職卑職見係鄉民言語未足憑信隨發諭帖與蕭雲傑帶去准投誠將官謝才等如果真心投誠着令自己來營投見後於貳拾壹日謝才等帶領兵丁拾名到營投見卑職審問前情

據云係瑞金縣等處人氏先年被賊擄去在蕭都下領兵今因大兵追殺甚急四散逃躲小的帶領家眷人等亦避深山預先披剃願投誠隨營効用等語卑職見其來意誠心准其投誠隨差千總高尙義熊子輝帶領兵丁前往白樹下山中將投誠兵丁併家眷小子被擄鄉民共貳百名口馬貳匹於貳拾叁日引領出山到營官給衣帽兵丁犒賞內查有壯丁肆拾餘名婦女貳拾餘口小子叁拾餘個被擄（下缺）

江南江西總督殘揭二

(上缺)戈亂□□官兵□□圍住陣斬數十名生擒數名內有賊兵曾瘦仔供報生擒偽副將徐孔賊頭目曾曲二何健一等四名解赴會審正法陣□鳥鎗二桿刀三口存營竹鎗當即燬壞餘逆逃竄□亦不□□萌矣等情據此二月二十日又據參將陳□塘報稱卑職于本月十一日進剿新淦縣之本源擒賊情形已經塘報押解外但宋朝宗狡計奸謀百出且踞巖山深谷爲巢人跡未常到者然而東剿西奔此遁彼出聚衆爲寇有年荼毒數縣不小若終日督兵追擒不無勞兵斃馬未免見兵此進殺敗由彼而退深藏亦難計日剿除故職在六關揚言班師回省便剿新淦之士寇原使逆賊爲兵退而復出也十二日據撥兵在永豐鄉回稱探得渠魁宋朝宗屯聚樂安永豐寧都宜黃四縣交界之大徑竹梨樹嶺一帶開耕聚衆狂逞等情到職是晚聞報當即新淦起營至樂安復准樂安縣移稱塘兵黨正張五二譚雲六報稱宋朝宗金子襄廖士龍等屯聚芳草等處明言入樂蹂躪等因准此星夜兼程兩宿一晝連夜進發行三百里倏至誠謂出其不意勦其無備至三源地方將官兵分爲四路撥中營千總劉文忠把總楊明石得勝率兵由芳草前進又撥千總孫應薦把總孫守義張鎮率兵由引水進發又撥千總郭一合把總胡谷郭名玉寇進羅李玉志龍紅旗李文芳率兵由半萍前進卑職親督馬步官兵由招攜進發至十四日黎明至梨樹嶺地方果見賊兵四出迎敵我兵奮勇衝殺陣斬逆賊不計其數生擒偽太子太保左軍都督宋朝宗偽中軍副將會大勝偽監紀吳瓊一偽守備郭勝等四名大旗九面獲小馬一匹刀五口鳥鎗二桿又鈹不計當查帶傷兵丁十八名跌死官馬四匹於十五日收兵回扎招攜暫息今將陣擒僞官宋朝宗等四名大旗九面差兵押解聽候會審施行等情據此該本職于二月二

十一日公同撫按兩院與司道會審三次所擒解到渠魁宋朝宗及僞逆方信二等共計一十七名內除謝毛仔起解放于中途曾曲二押解到省身故二屍已驗明浮埋袁立仔王匡二皆幼小出於脅從釋放歸寧其宋朝宗曾大勝吳瓊一郭勝曾瘦仔徐孔何健一方信二李貴清劉明二劉夏仔劉萬七劉落一等壹拾叁名審明正法訖所有旗劄理合解驗等情又於三月二十四日據該提督塘報爲再擒渠魁大捷事本年二月十八日據本標中軍參將陳陞塘報稱卑職搜擒六關小約賊寇已經會同永豐縣審解復准該縣移勦興平鄉十一都十四都等處賊寇俱經報明外隨據生員袁開先等公呈請勦并送鄉長李培一鄉導李添四袁統二李坤二李鄒三袁相十李奎等二十名到職隨詢逆賊屯踞何處據稱見扎白石貫前樂安之界山望田麥坑等地卽於初七日發兵撥前營千把總郭一合羅玉李志龍帶領兵丁從高坑村前進發又撥左後兩營把總寇進郭名玉胡谷帶兵由楊源進發卑職帶領本營千把等官及馬步兵丁由鹿江進發至未刻齊至白石見賊數千列旗佈勢吶喊拒敵我兵衝上賊用火砲鳥鎗箭矢抵拒官兵卽四面夾攻賊卽退走界山望田官兵乘勢衝開陣斬逆賊數十名生擒二十餘名陣獲小青馬一匹大旗五面鳥鎗九桿弓四張箭四十餘條刀二口鈹叉竹鎗不計獲牛十一頭追至二里界山望田乃樂安永豐交界之地復有賊兵百餘接應見勢窮潰敗當卽收兵扎營于白石隨將陣獲賊寇喚集鄉長鄉導面鞠審問內有僞遊擊徐挺十僞都司黃賢七周明三殺人王陳毛仔先鋒易鳳五韓英仔聶長子葉逢三談六龍曾言三俱係蔣英標官廖思六總統興平一鄉賊寇以上僞官十一員審係永豐人應移永豐縣審明轉解其思六親任廖定三係蔣英前營副將有子定八係蔣英之戎旗遊擊二賊敗逃樂安未獲據陳奉五供報有賊頭劉建五鄒賤保劉望六鄒貴陳興子陳橋八俱被官兵殺

敗仍逃樂安之地止活擒賊頭羅敏四李生春卽賊首李先春之胞兄陳尙四卽橋八之父親劉振五係專窩賊頭之首惡以上五名審係樂安人氏應移樂安縣審明轉解外有被賊逼從小約數名審係無辜當交鄉長李培二釋放各賊供報樂安之界山寶塘麥坑望田石陂及永豐貫前白石南山貴川等處小約勾連爲害勦此遁彼窩藏賊寇結黨聚會名曰六寶會崇德會同里會集衆插血稱戈拒敵謀爲不軌已移兩縣查緝并將僞官徐挺十等十一名大旗五面解押永豐縣審明轉解賊頭羅敏四等五名移解樂安縣審明轉解理合塘報等情二月二十五日又據參將陳陞塘報稱本月十二日奉蔡撫院憲牌爲塘報事內開二月初二日據樂安縣報稱正月十五日據原任太常寺典簿董昭扎報五日前賊一枝於宜黃大名地方殺盡男婦二百口止逃七人卽屯筍此地一枝在小田開市耕種大名隔嚴塘十里隔望仙三十里等情到縣據此理合具報等情到部院據此爲照逆賊殺戮慘之極矣該將駐師豐樂之間地方如此荼毒何以未見進兵且開市耕種目中已無官兵合亟飛飭爲此仰該將照牌事理卽便挑發馬步勁旅星馳大名嚴塘等處剿滅賊氛奠安生靈毋致慘害人民也仍具進剿情形飛報查考等因奉此該卑職查得宜黃大名相隔永豐之貫前新淦之木源有三百餘里萬不能週顧亦不能一時盡絕若果附近敢不仰體上臺除魁安民之心安敢逗遛也然永豐六關興平等都小約賊寇方得略可畏靖頃據塘報宋逆潛踪已星馳擒解矣兵未憩息馬未離鞍復于十六日據報宜黃大名黃竹屯扎有九龍營鄧逆聚衆荼毒出沒于樂安嚴塘清濠溪等處卑職在招攜商問原任典簿董昭據云宜黃縣大名黃竹在萬山之中高險不可言者不惟路小而且挖斷矣止可扳藤扶葛而進故踞以爲堅固相持等語當撥鄉導引路于十七日酉時分撥官兵登山踔嶺十八日黎明齊至大名賊已預備迎敵自辰時

至西方得攻襲陣斬僞王副將等百餘名活擒逆賊吳勝李火仔鄧汝奉董太三等四名大旗六面烏鎗一杆三眼鎗
 一杆馬叉二把賊婦十一口餘賊數百四散遠竄因大雨滂沱當即收兵仍扎招攜卑職看得豐樂峽淦吉宜等縣皆
 被渠逆宋朝宗勾連小約土寇助糧需餉招亡納叛聚衆稱戈荼毒各邑國賦空懸已有年矣卑職奉令在峽江之流
 源征勦宋逆活擒僞將新淦之海源生擒王令子永豐十五都之牛山撫順小約進□豐鄉追勦宋逆活擒僞官陳福
 宰等因勦僞□將□楷二等□撫上鄉十六洞□個都分僞監軍道審思八等仍進六關勦擒多逆俱移永豐縣轉解
 復勦興平鄉十一十四等都陣擒徐挺十等亦移永豐縣轉解仍進木源剿陳哨四等生擒徐孔等聞報宋逆潛踪活
 擒追勦宜黃大名黃竹鄧逆遠遁他州陣斬百餘□至□陣斬不下千餘生擒渠魁逆賊數十□□□今宋朝宗
 授首各縣稍可寧謐今一面□□官兵駐劄招攜偵探餘逆略有復聚即行勦□等情三月初二日又據參將陳陞
 塘報爲塘報活擒渠魁以絕亂源事內稱卑職擒斬賊寇節□□矣但宋逆□□□□陣敗率□□根
 株未□□□□□□未向化僞稱掛平胡大將軍印開化伯此惡□丁亥年十二月破永豐縣戊子春破崇仁
 宜黃兩縣又破興國殺蔡知縣庚寅破石城縣數郡諸縣受害非渺□矣復被兔脫終爲釀患故在□□再四思維
 務必勦除密差偵探去□□□據撥兵報稱金子裏復聚敗逆屯□□該地屬寧都永豐樂安之交界退則
 寧□□莊土莊止有楊梅庵及窩蓬數十座若要□□有一百五十里皆是高嶺深崖其路險不可言等語據此隨
 喚集各營官目面商此□□□必各挑□□□□□□丁悉留□□□□□□
 □□□□千把總劉文忠□明石得勝內丁□□□精兵二百名又撥千把總孫應薦張鎮孫守義投誠總兵吳

榮副將孫光宗張一虎司光明□精兵□百名又撥前營千總郭一合李□□□文芳帶兵一百五十名又撥左
□□□帶兵五十名協助前營又撥後營□□□郭名□挑帶本營兵丁一百五十名中□□五十名協助
後營卑職帶馬兵步行接□□兵丁俱帶三日乾糧於二十日午刻起行當晚至大徑竹各喫乾糧連夜進發二十
□□□嶺賊已□□□□□嶺周圍□□□陣斬數十活
擒□平胡大將軍開化□□偽旗鼓汪長卿賊材官楊得勝陳得勝大旗三面偽劄一張今差役解赴聽候會審
施□□小馬□匹存營理合塘報等情據此案□□□起解不二月初七日白□□□徐
挺十與賊頭羅敏四等□□面該□就行間之便已分送永豐樂安□□審應聽其解赴撫院發落二月十八
日□□方活擒逆賊吳勝李火仔鄧汝奉董太三等四名大旗六面據該營解到本職於三□□同□按兩
院□□□莊地方□□□汪長卿偽官楊得勝陳得勝等四名
□□偽劄一張該營解赴撫院衙門於三月初五日會審將汪長卿等三名正法訖留偽開□□簡臣□書招
撫餘孽在案該本職看得□□□假借偽命開藩稱爵擁衆□□□問匪朝伊夕矣雖屢爲官
□□渠魁□山尙爾結聚頃仗威靈二月十□□擒宋朝宗賊復膽寒謀爲奔遁我兵歷□□分途以進二
月二十一日再擒金簡臣則累年戎馬一朝勦捕地方從此可有安枕□□□各到職□□□
□□□簡臣等聚衆倡□實爲渠魁出沒于□□焚村掠縣爲害已久向因兵臨則遁兵退則出是
以視息游魂未就戎索職知此輩狡□□分派□將陳陞帶領官兵駐于永豐樂□□□徐圖專辦此賊

茲官兵果□□□□□□□□成擒再戰而簡臣就獲以□□□□之狡□相繼授首而豐樂崇宜等處大□□靖
 疆宇以快人心則陳陞等功誠足敘□□參將鄭德等搜勦于南豐等處報有擒斬勞亦可紀所獲賊犯□金簡臣
 撫臣留之□□□□□□朝宗方□□□□□□□□□□江西撫□□□□□□□□□□光
 弼同司道等□審明正法訖解到□□□□相應咨送兵部職據塘報前來理合具題伏乞聖鑒施行□此除具題□
 □□□揭須至揭帖者順治拾年肆月日

戶部題本

戶部尙書臣車克等謹題爲咨送僞王人口事廣東清吏司案呈奉本部送戶科抄出兵科外抄該兵部題准廣東巡撫李棲鳳咨前事內稱順治玖年捌月貳拾日准平南王咨開准靖南王送到招撫瓊州投誠僞西平王母子到藩准此案照本年柒月初貳日准兵部咨奉有上傳凡各直省有故明親王郡王流落地方者該督撫察其投誠實情有無功次併將伊家口起送來京分別畜養之旨欽此欽遵合行咨送煩爲差官護送一省交送一省咨部毋致疎虞等因計開僞西平王兄弟貳人婦女叁口跟役貳名准此合就咨送爲此合咨貴部煩將遞解來後開僞王家口查收畜養施行計開僞西平王兄弟貳人婦女叁口跟役貳名等因到部送司案呈到部該臣等看得僞西平王朱聿鏗先據靖南王題爲恭報恢復海南情形等事一案內開繳勅印來歸臣部於玖年拾貳月內議以朱聿鏗是否明宗應覆查明確另議奉有俞旨在今據廣撫李棲鳳將僞西平王兄弟貳人等咨送前來審據李氏供稱夫主原係河南周藩宗室遭難身亡遺下孤男朱聿鏗於順治柒年間被亂兵擁稱西平王爲賊李成棟逼死見在幼男朱鸞朱西在瓊州攜西平王勅印赴雷州投誠等情查係明季宗室竝非親王郡王旣經該撫咨送前來應將朱鸞朱西竝母李氏家人邢文英僕婦孫氏小子富兒使女呵祿共柒名口勅下戶部酌量收養可也恭候命下遵奉施行謹題請旨順治拾年陸月拾壹日題本月拾貳日奉聖旨是欽此欽遵抄部送司奉此相應議覆案呈到部該臣等案查順治捌年閏貳月叁拾日欽奉上傳故明親王郡王流落地方者該督撫察其投誠實情有無功次併將伊家口起送來京分別畜養其自鎮國將軍以下不必起送各照原籍編氓樂業令其一體輸稅當差之旨今故明宗室李氏攜幼子朱鸞朱西及跟僕

那文英等肆名口投誠粵撫咨送來京既經兵部疏稱審明係明季河南周藩宗室並非親王郡王如遵奉前旨應發河南原籍編氓當差如照今兵部題准事理臣等酌量應發河南巡撫收養恭候皇上裁定勅下臣部轉行遵奉施行臣等未敢擅便謹題謹旨順治拾年閏陸月初玖日戶部尚書臣車克削去宮銜貳級仍供尚書原職臣陳之遴左侍郎臣畢里克兔左侍郎臣祝世胤左侍郎臣孫廷銜右侍郎臣耳得右侍郎臣馬鳴珮右侍郎臣王弘祚啓心郎臣李迎春啓心郎臣任和尙額者庫臣和善廣東清吏司副理官臣党五里廣東清吏司署司事主事臣秦才管

(硃批)著遵前旨行該撫令地方官照原籍安插樂業

臣等未敢擅便謹題謹旨順治拾年閏陸月初玖日戶部尚書臣車克削去宮銜貳級仍供尚書原職臣陳之遴左侍郎臣畢里克兔左侍郎臣祝世胤左侍郎臣孫廷銜右侍郎臣耳得右侍郎臣馬鳴珮右侍郎臣王弘祚啓心郎臣李迎春啓心郎臣任和尙額者庫臣和善廣東清吏司副理官臣党五里廣東清吏司署司事主事臣秦才管

陝西總督孟喬芳揭帖 順治十年七月二十七日到本揭對同

欽命總督陝西三邊等處軍務兼理糧餉太子太保兵部尚書兼都察院右副都御史孟喬芳爲酌議選調堪戰將兵以期剿撫奏效事順治拾年柒月初肆日准兵部咨題覆經略輔臣洪議調陝西鎮將兵丁緣由題奉欽依備移到職除轉行撫鎮挑選催發外但陝西非無事之地緩急關係有不可不萬分慎重者職曷敢嘿嘿處此而不上陳耶如咨內所云調出官兵職銜營伍自應照舊官不出缺兵不招補職謂在關遼宜大或可在陝西則不可也蓋陝西幅輳遼闊伏莽未淨原設通省戰守之兵節次裁汰數多又經職抽調屯種之兵肆千見在兵數已覺其單若更調出不容招補倘遇有事何以資捍禦乎至於寧夏壹鎮地方險阻人情囂悍喜亂易動屢見於明季之時所恃以鎮懾彈壓者全在總兵之威望幹略耳如上年調發劉芳名援川甫至臨洮卽有王元馬德之變巡撫被殺地方騷動幸仗皇上洪福旋就撲滅然非速撤劉芳名還鎮搜索姦宄收合人心能保不爲故明劉東揚之緒哉况近因撥調四川換班之兵准寧撫孫茂蘭咨云寧民一聞調兵遂爾人心惶惶匿帖訛言隨即閔起等因觀此不惟劉芳名難容輕調卽寧夏之兵亦不宜多調也再如蘭州控扼黃河西卽甘鎮地方向來逆獮之變蹂躪遠邇使有重兵夙將據河堵禦豈能飛渡耶職因征剿至彼駐劄數月見係險要之地增兵壹千改設副將員缺以王平任之倘遇河西有事旣可就近應援亦可憑險防堵良有深意况今塘報土魯番要挾求貢銀定王子謀犯地方情形俱屬叵測職相距隔遠方飭行王平在彼偵防尙慮兵力單弱豈可調去多兵更調該將哉又如固原係職舊日及總兵駐劄之地最爲要區兼之叁捌營李旺堡柒監一帶壤址相錯伏莽實繁全賴重兵彈壓自職移駐西安總兵移駐平涼已駸駸然多事職因議設參將壹

員增兵壹千以曹志任之今已數年幸保無虞良由本官實心任事兵民無擾遠近懾服耳第因征川屯種調去額兵數多見在之兵寥寥無幾豈容更調其兵併調該將哉以上鎮將參員誠爲重地攸關即使推補面代猶恐人地非宜難以勝任况調去不補寧免悞事職忝封疆之寄不敢不據實上陳除孤山副將高萬里定邊副將高謙洮岷參將楊相紅水遊擊白士元併應調兵馬職俱轉行催調外其劉芳名王平曹志誠不可輕離地方職亟知輔臣經略伍省剿務重大調用兵將難容輕緩但陝西重地在在可虞誠不可不萬分慎重者况輔臣舊用夙將甚多不啻如雲如雨自足以供調遣而奏剿撫之効又奚必此區區數員哉敢望聖明俯念重地所關將劉芳名王平曹志參員留任免調併奏員名下原調兵馬量調壹半用別將統領赴經略輔臣軍前任用其調去各兵名糧仍即募補庶於剿撫重地兩無所悞微職幸甚封疆幸甚相應具題伏乞聖鑒勅部速議施行爲此除具題外理合具揭須至揭帖者順治拾年柒月拾伍日

平南王尙可喜等題本

平南王臣尙可喜靖南王臣耿繼茂謹題爲亟需經制鎮臣事順治拾年柒月拾玖日准兵部咨前事內開該平南王尙可喜靖南王耿繼茂題前事等因該臣等具覆平南王尙可喜等題肇慶缺經制總兵請勅該藩就近選補速奏等因本年肆月貳拾叁日奉聖旨是欽此移咨到臣准此該臣等看得肇慶府統轄壹州拾縣兼制羅定壹州兩縣爲兩粵咽喉重地高雷廉瓊門戶今經制總兵員缺必得才猷茂著心膂可仗之人始克勝任臣等備查標下各營將領俱經簡別題補而此壹員缺實難其人伏乞皇上勅部甄選良材授之專閫卽給與勅書關防星馳赴粵庶干城有賴牖戶攸寧而臣等亦幸邀夾介之助矣緣係亟需經制鎮臣事理未敢擅便謹題請旨順治拾年捌月拾玖日平南王臣尙可喜靖南王臣耿繼茂

（硃批）這鎮臣員缺著擇堪任的作速推補該部知道

兵部殘題本

兵部尚書固山額真臣噶達洪等謹題爲叛首就縛謹恭報捷音仰請聖裁事職方清吏司案呈奉本部送兵科抄出該直省總督馬光輝題前事內稱竊照膠州逆鎮海時行全軍謀叛臣聞警追剿節經具奏竝塘報兵部訖於玖月貳拾伍日准山東撫臣夏玉咨爲密奏塘報事奉有膠兵鼓譟着該督撫作速相機撫剿之旨欽此臣親統官兵渡黃河追至睢寧縣西潼郡集據報叛賊苗頭已向徐州又聞難民言稱賊欲由永城亳州一帶奔六安山等情隨令沂鎮張大治等由徐尾賊追襲臣督兵自靈璧宿州赴永城抄撲至靈璧縣西有總督漕臣沈奎亦親統官兵截殺又檄徐州營副將陳一貫與沂鎮合剿臣隨與漕臣督兵同往叁拾日據張大治陳一貫各報稱在永城縣西北拾里地追賊後哨對敵微有斬獲臣同漕臣連夜進兵於拾月初壹日至洪河集西柯家莊臣與漕臣兵分左右兩路攻殺叛賊馬步排連分頭迎敵臣一面督戰一面令濟南守道何啓圖遵旨豎旗招散脅從我兵鼓勇鏖戰從午至戌連衝數合殺斬甚多賊遂披靡大敗因天晚收兵賊勢窮哀鳴求撫臣仰體皇上好生之意令其解甲自縛歸降逆首海時行將賊中偽將軍師李進文陳謨等斬首率其弟海時動子海起龍竝舊營將韓啓元等於初貳日早赴臣等軍前投撫泣陳爲悍兵譟變迫挾實非得已臣同漕臣審明將時行與子弟營將竝各妻孥俱羈候聽旨該臣看得膠州逆鎮海時行身居大帥荷國厚恩不思捐糜以圖報軫敢謀逆以無倫臣聞警即調集將兵追剿幸仰賴皇上天威官兵用命一戰遂成底蕩之功不然萬或竄入深山不知又費幾許收拾矣其當陣斬過叛賊得獲馬匹器甲及行間有功竝傷亡官兵統俟查明另疏具奏海時行等應作何發落伏乞聖裁以便欽遵施行等因順治拾年拾月初叁日題本月拾壹日

奉聖旨據奏該督及漕督沂鎮道將等官追剿膠叛夾攻戰勝斬獲數多賊敗歸降具見勇略在事有功人員著察明敍錄傷亡的速行議卹海時行海時動海起龍韓啓元等勢窮就縛前後情罪確議具奏該部知道欽此又該漕運總督沈文奎題爲仰仗天恩飛報叛帥就縛大獲全勝事臣自聞膠兵叛變以來卽嚴飭各屬設防備禦隨報自高密莒州而北不意忽復折入宿邊過河臣料其必西走衝突卽挑選標下精銳并飛調各處官兵嚴檄沂鎮臣張大治併以手書移咨會三省督臣馬光輝統兵馬至宿州會合臣一面介馬星馳迎截去路不論本境鄰境誓必滅此朝食已經具疏在案幸不出臣料官兵俱集於宿州仍令投誠人余科募間諜趙一路密諭賊營令其自相疑貳三省督臣與臣同日至靈面會商定機宜叛賊果至宿境聞風前遁永城西南劄營臣以兵貴神速卽於叁拾日貳更聞報奮不顧身立刻夜馳飛趨壹百柒拾里初壹日蚤至永城西南柒拾里橫河西柯家莊地方臣同督臣馬光輝分遣沂鎮總兵張大治徐營副總兵陳一貫爲兩路夾擊賊衆迎敵兇橫異常臣等躬冒砲矢當陣指揮幸各官用命直前撲殺無不一以當百喊聲震天斬獲馬步併生擒精壯數賊橫尸徧野賊始披靡大敗乞哀求撫臣等遵旨豎旗令其自縛渠魁暫休兵力次日有海時行同韓啓元康廷泰劉成功李成恩將賊中僞軍師陳謨李榮武元謀王廣生李進文斬首活綁獻王媽媽茹元贊率其弟海時動子海起龍於初貳日蚤赴臣等軍前投撫併繳中軍關防壹顆泣陳爲悍兵謀變持挾情非得已臣等將時行及弟時動子起龍并降將韓啓元等妻孥羈候恭聽聖裁其行間用命有功將士及傷亡官丁馬匹盔甲器械與各事宜俟查明另疏具奏外此皆仰仗皇上如天威德廟堂諸臣指授方略臣等僥倖成事實生靈之幸也相應密奏伏乞睿鑒施行等因順治拾年拾月初叁日題本月拾貳日奉聖旨據奏該督用間招降身先剿

賊具見真誠任事深可嘉悅在事有功人員著察明敘錄傷亡的速（下缺）

（The main body of the document contains several columns of extremely faint, illegible text, likely bleed-through from the reverse side of the page. The text is too light to transcribe accurately.)

工科左給事中魏裔介揭帖 順治十年十月十三日到本揭對同

工科左給事中魏裔介謹揭爲叛首就縛國法宜明並糾撫臣縱賊殃民之罪仰乞皇上大奮乾斷急賜處分以彰法紀事職昨辦事垣中見三省總督馬光輝叛首就縛一疏不勝舉手加額竊慶二督臣肅將天威親冒矢石賊首海時行自縛軍前河南江北之間得免荼毒紓我皇上南顧之憂矣乃職詳觀疏內於海時行不能無痛恨焉伊受國家大恩使兵未交刃棄甲來歸以明悍兵逼迫不得已而爲之猶可恕也今兩次拒敵敗挫狼狽計無所出始殺陳謨等以就撫此與兵未交而投順豈可同日語哉確查情罪在部臣自有的議而職以爲寧嚴勿寬則國法伸矣至於山東撫臣夏玉者旣不能銷變未萌一聞賊變卽當捲甲疾驅滅此朝食乃奉有督撫相機撫剿之旨而縱賊出境未聞一矢相加二督血戰成功撫臣尺寸無効雖任節鉞之重實負巾幗之差使人盡效尤則逍遙坐視以鄰國爲壑其遺害可勝道哉前職同官張王治參玉謂其養亂有由禦變無術部覆地方平定之日確查功罪今賊已就縛督臣之疏昭然可考並無撫臣一級之功其何辭於逗遛畏怯縱寇殃民背旨失機之罪耶國法軍法典刑具在難爲撫臣寬矣仰乞勅下吏兵二部嚴加處分俾封疆之臣以後知所懲戒不敢遺誤地方雖然職更有所請焉賊之臨陣被誅者其婦女自應給賞有功軍士至於膠州一帶及沿途搶擄民間男婦孰非朝廷無辜赤子死傷流離情實可憫更懇天慈降旨督臣卽行逐名清查釋放各歸寧家此又綸音一沛萬方均頌皇仁者也統乞聖鑒一併施行爲此除具題外理合具揭須至揭帖者順治拾年拾月日

直隸山東河南總督馬光輝揭帖順治十年十月十七日到本揭對同

欽命總督直隸山東河南軍務兼理糧餉併巡撫保定等□提督紫□□關兼管天津海防兵部尚書兼都察院右副都御史馬爲再報剿撫叛逆情形並有功官員仰祈聖鑒事切照膠兵謀叛微職統兵追剿而逆鎮海時行就縛業將捷音具疏奏聞矣今將海時行並弟海時動子海起龍中營守備劉成功被擄原任膠州知州鄭朝鳳與各家口羈職軍中中軍遊擊韓啓元右營遊擊康□泰守備李成恩並各家口羈漕臣軍中俱候旨發落海時行將賊中元謀僞將李進文王廣生僞軍師陳謨李榮武斬首來獻又活綁茹元贊王媽媽孫璜季應武王九職等審係主謀之人卽斬訖韓啓元繳出中軍關防壹顆海時行供稱該鎮勅書原領糧單俱藏於膠州本衙住房牀上關防埋於後園池內又供遽遭兇賊之變殺旗鼓張思選箭傷將官康廷泰搶行家產一空一起亡命之徒今除剿撫外因追襲窮迫陳奇策祖明善等有沿途乘夜帶馬潛逃者職已移會江南河南督撫嚴緝逃賊山東撫臣察取膠鎮勅印糧單外察得投撫兵丁捌百貳拾陸名隨帶棉甲貳百身鐵甲陸百貳拾陸身馬壹百壹拾貳匹長槍貳百叁拾杆腰刀叁百伍拾柒把三眼槍陸拾伍杆察獲賊營銀伍千壹拾叁兩駱駝大小陸隻救出山東江南難民難婦壹千陸百肆拾肆名口職統領各鎮道將領當陣斬殺叛賊約有捌百餘名得獲馬騾貳百壹拾壹匹頭鐵盜甲壹百捌拾頂副弓壹百伍拾肆張箭貳千捌百伍拾肆枝三眼槍叁拾壹杆大旗貳拾陸面長槍貳百伍拾杆撒袋壹百貳拾壹副腰刀壹百叁拾肆口牛驢柒百叁拾陸隻頭又□□陣斬及逃賊家口婦女捌拾貳名口此職躬擐甲冑親督官兵剿撫逆賊之情形也隨職征剿者職標右營遊擊鄭伯真守備朱志麟田勝千總李登起姜超把總孟守法仝得勝張希閔金國鼎于安邦孟彪董

奇策職內司領兵千總郭世秋丁國柱把總鄭洪謨李顯標下隨征聽用官李垣孫繩□白羊古孫大振張胆王廷太馬有成鄧國明龐澄黃建中王應甲艾成鳳汪得海徐志美李昌祚孫世慈朱志鳳隨萬成花上錦彭宏郭維順張奇猷馬應彪王業大邵祚祐曹振孫虎張邦治唐益又有廩生孫繁祉情願自備鞍馬自裹餼糧攜帶壯丁叁拾人隨職剿逆山東撫標中軍管左營遊擊事張應武中營遊擊張友才右營中軍守備尹充中營千總趙起龍張維堪左營把總王希舜鄭起鰲中營把總楊天德右營把總馮國柱沂鎮總兵張大治親統標下中軍陳國隆左營遊擊陳俎豆中營中軍守備莊文高後營中軍守備唐進金中營千總李起龍右營千總郭一升後營千總武進孝左營把總沈應福右營把總齊天才後營把總高應祥唐希舜楊進常臨鎮中軍管中營遊擊事吳成鳳左營遊擊許國璧署中營守備鄭玉臨鎮聽用劉印學聽用千總王定邦張進孝把總秦鳴鳳范縣營守備孫維統濟南守道兵備何啓圖親領中軍守備趙維新把總趙得勝青州營中軍守備孟騰蛟把總宋世芳武定營千總高名崗把總張□光高唐營千總趙世初把總白應舉河南撫標守備徐才千總王福把總王武臣劉成□署歸德營都司李孟夏千總朱衣把總張□□以上鎮道將領千把□□等官或衝鋒攻戰□撫輯著勞此皆有功之將吏內如張大治臨陣先登何啓圖孫繁祉決策制勝仗義殺賊尤功之表表者又察各營陣亡千總壹員郭得功兵丁張來山等叁拾肆名帶傷兵丁梁化龍等壹百玖拾名陣斃馬貳拾柒匹帶傷馬叁拾□匹以上傷□官兵已將所獲賊中銀物照例□別賞恤訖□總漕標下官兵所得功次聽漕臣另行具報該職看得膠逆之叛變出倉卒職聞警恐山東兵力單弱不足以制賊之死命隨調集兵將親馳策援追戰於貳千伍百餘里之外使數千不逞之狂徒剿撫於一旦此皆仰仗我皇上之威靈廟堂之勝算與

夫漕臣沈文奎弘猷遠略戮力同心奏此膚功也除海時行並所降文武官弁另候旨發落其就撫降兵及所帶家口職等再四商酌仍還之於膠州□與膠民有不共之讐恐彼此不能相安於無事若散之□□□棲食無所□□別生變端因而（下缺）

[Faint, illegible text columns, likely bleed-through from the reverse side of the page]

甘肅巡撫周文燁殘揭帖

(上缺)鄭文貴重傷兵丁王思忠□□□□□□□□兵丁卜言漢李多木解貴殷圻答烏槍打死蔣興等馬五匹鎮海營重傷兵丁楊廷輕傷兵丁張啓才陳永道吳守祿威遠營重傷兵丁肖尙義黃果名輕傷兵丁唐真北川營重傷兵丁楊六輕傷兵丁何端張友亮所獲馬六匹牛五十六隻驢二十頭婦女大小三十六名口寄養乞請明示定奪外監收廳王纘曾自備紬四疋梭四十疋平西王下買馬梅勒甲喇章京張光祖趙時振王一柱崔可顯張大經劉應祥自備紬一十五疋梭一十疋掌印朱聖武自備梭一十疋煙五十包本協自備紬二十疋梭一百疋銀五十兩銀牌一百面俱賞給官兵回民訖謹備細具報目今功罪雖明驚魂不定恭候檄下量行獎勵俾善類知勸其所獲邪教妖人三名口出病狂喪心之語最易驚亂人心除已嚴加監禁候批示正法庶人心有恃以無恐而地方亦賴以永清矣等情同日又准甘肅鎮臣張勇手本移同前事等情各報到職職因初報孫家寨回民打白旗殺鄉民往後子河接見千歲次報賊目癘海山等撲敵官兵今報攻剋後子河止報斬僞總兵僞軍師並未言及孫家寨又未明言僞千歲及賊目癘海山等有無擒斬及剿殺斬邵二溝逆回亦未分晰明白未敢遽瀆天聽隨批該道查明報職具題又恐軍機時不容緩即據道將塘報已報兵部及總督臣訖今於本年十二月初四日據莊浪帶署西寧道副使朱衣助回稱屢准狄副將回報後子河回民聽信已經綁獻妖人張見龍張虎頭因伊素有撒砂成兵之術故逆僞稱沙千歲於十月初六日煽惑作叛有孫家寨回民五六家俱挈家投入後子河始報孫家寨打白旗殺鄉民原係北川守備許全忠差人高閏賈一茂口稟誤報至初七日狄副將領兵直抵後子河死賊頭目癘海山鎮四陳一龍等撲敵官兵有本道提兵

至西大通屯駐給諭帖治國柱率領回民同狄副將官兵至後子河攻圍於十三日逆回將妖人父子綁獻下堡至十五日將後子河攻破斬獲賊首二百三顆所獲馬六匹牛五十六隻驢二十頭婦女大小三十六名口斬獲偽總兵二名王起受馬文仁諸爾巴偽軍師一名陳一龍皆係妖人口稱此係白日占拒堡樓當面殺死故得辯其面目知其姓名至癘海山鎖四查得三更火發堡破一概混殺而海山鎖四或被殺死或被火焚或潛藏草地無從認辯其孫家寨准狄副將回報安堵如故不用剿撫至於豬爾溝卽斬家莊在此居住因稱斬家溝准郭遊擊回稱有斬邵二溝與後子河相連不遠聽信妖人密謀會同於初六日同叛搶殺人口牲畜有半入後子河逆回馬正魁馬正徒馬成奇馬應龍馬那台斬光顯及兵馬攻破後子河之日有剿無撫惟交鋒砍殺不知死亡名數其在堡回首馬惠馬木沙兒鐵海等郭遊擊於十一日直抵邵家堡攻圍對敵砍殺賊首馬惠等八名俱已斬首其潛逃有無未見的實未入叛黨回民俱已安撫訖今將查確斬邵二溝情形備細具報所獲邵家溝驢牛七隻大小羊七十隻郭遊擊已賞有功軍丁所獲三眼槍三杆長槍五杆盔甲一頂副候示給本營備禦所獲見在哇子婦女三十口老驛馬二匹小馬駒子一匹小驢騾駒子一頭并後子河所獲馬六匹牛五十六隻驢二十頭婦女大小三十六口伏乞裁酌分別次第賞有功并傷亡官兵以示鼓勵至於妖人張見龍同子張虎頭并祁教准狄副將回稱於十月二十日解赴總鎮於二十七日正法訖其牙固子有總鎮行文狄副將姑從寬宥仍發廳交給治國柱收養理合具報等情據此看得從前甘肅涼莊四郡逆回雖羣起爲叛及大兵一臨盡成齏粉惟西寧一處回民守分因得安享太平此卽順存逆亡之明驗矣不意突有梟獍之徒以妖人煽惑聚結後子河橫肆劫殺又倡言交通海彝同謀作祟職竊以爲海彝久震國威未必敢助此鴟張

也故前據道協報內有彝魯從東關門入境徑奔後子河及乞慶黃台吉與逆回持呪同謀等情職疑爲風影之言祇經彙報兵部不敢冒入疏中今副將狄應魁率領官兵圍攻賊寨鎮臣張勇親統大兵居涼州適中調度莊浪道朱衣助統莊阿鎮三營官兵移駐西大通接壤之處與中協副將劉友元犄角策應賊膽旣裂縛獻妖人隨即剋堡滅賊事已平定亦未見有海彝別情凡此皆仰仗我皇上聲靈之所致也狄應魁郭俊等擒斬著勞洽國柱効力剿逆均屬可嘉所當與傷亡營兵回民分別敘賞以示鼓勵者也所獲盜甲器械發營備用婦女頭畜分賞有功其擊獲妖人張見龍張虎頭逆回祁敖已經鎮臣審明正法訖逆回之子牙固子鎮臣審係孩幼交給洽國柱收養矣旣經該道查報前來相應具題伏乞聖鑒勅部議覆施行爲此除具題外理合具揭須至揭帖者順治十年十二月日兵部右侍郎兼右副都御史周文燁

兵部殘題本

兵部尙書固山額真臣噶達洪等謹題爲大寇乘潰宜剿乞勅專兵以淨根株事該廣西巡撫陳維新題前事內稱竊照黔寇向分三股蹂躪封疆一股僞秦孫可望見在武岡敬謹親王專意剿殺指日可平一股僞撫南劉文秀流毒四川平西親王殲滅殆盡立見清寧一股僞安西李定國自沅靖發難從武岡寶慶湖南以至粵西民生塗炭已極若非敬謹親王衡州大戰之捷迄今又不知如何狂逞矣繼而敗走廣東攻圍肇慶爲時叁月有餘標掠村縣又不知其幾耶今柒月貳拾壹日突犯廣西省會臣久以身許國誓死力守以守寓戰捐賞以鼓奮軍心幸保孤城否則不幾又蹈去年之轍矣今以孤軍仗皇上如天之覆大挫兇鋒死傷賊衆獲象寨旗幸中之幸也迺賊雖喙嚙尙盤踞於平樂之間搶殺於粵西之內喘息定氣糾結猺獍土寇以思復□若不乘此潰敗之時亟勅勁旅專剿此股之賊倘俟其休息則是養癰貽患矣且柳州南寧係貴州雲南之門戶賊得此路進退可以有恃剿蕩更費兵力也臣欲亟圖滅此朝食奈臣標經制之兵去年失散無存線全兩鎮之兵僅顧省會不能分發臣所以孜孜爲（下缺）

（硃批）依議速行

兵部題本

兵部尚書固山額真臣噶達洪等謹題爲塘報事職方清吏司案呈奉本部送兵科抄出平南王尙可喜靖南王耿繼茂題前事內稱六月二十二日據廣西梧州原定南王下左翼總兵官馬雄啓前事內稱本月十三日據左營領兵參將李應詔報前事內稱卑職奉領上河堵禦初十日午時卽灣船宣洲本日未時分卽令把總李有成陳九志領快船十隻前往藤縣上下撒探賊信不意十二夜有僞逆龐太監李水師僞總兵陸盈乘廖鳳等督領賊船二百餘號沿兩岸河邊衝下將李有成等撥船邀截竟撲到卑職灣船處所將哨船數十號把住河口卑職率所領戰船奮勇衝開河口賊哨船伍六隻將職所坐船隻圍住砲火齊發職拌死衝殺至天明時賊勢莫支職率戰船追至藤縣奪獲賊船七隻獲活賊九名交烏鎗十一杆解赴軍前卑職未便深進仍率戰船回劄宣洲等情到職據此看得逆賊乘艦順流勢莫可遏本將以死拒敵賊衆潰還今職一面嚴令駐劄原處慎加堵禦別遣後營領兵遊擊安邦火器營副將劉觀朝中軍楊國榮滿進貴前營千總羅仲高張九桂領旗羅守信張德川藺冬馬剛等督率官兵戰船直撲平南俟有捷音另行再報所解活賊當同蒼梧巡道彭巖府江道周永緒及各府縣等官審明正法訖等情同日又據啓稱爲塘報大捷得獲僞印事本月十八日據防守昭平領旗守備雍尙仁報稱本月十四日三鼓時分據思勤江撥探兵丁陳奇等回報有逆賊龍五龍四李昌李可奇韋鏡等率領逆賊數千恢取昭平卑職聞報卽於五鼓時分親督官兵堵剿行至江口果遇逆賊蜂擁抵敵我兵奮勇研殺陣斬數百淹死不計活捉肆拾柒名陣斬僞都督李昌身上搜出盪虜將軍銀方印一顆旗幟刀鎗拋棄滿地潰賊四山逃走因山路崎嶇不便窮追隨卽收兵回縣嚴審活賊據供盪虜將軍印

(研)

原係徐俊交伊門子帶出不期僞都督李昌將門子殺死奪印掌兵今來恢復昭平等情但所擒活賊不使遠解審明正法謹將銀方印一顆解赴軍前等情到職據此看得銀印一僞篆耳然以此號召烏合刺刺不已今既搜獲無復信符或所云斬草去根也今將僞印謹差官解赴王前等情到臣據此該臣等看得梧州爲兩粵要衝總兵官馬雄痛念桂林之夙誓篤忠貞思以報効朝廷并雪定南王地下之憤是用朝夕薪膽激發將士罔不用命前驅既逐龐監於藤縣復敗龍賊於昭平兼獲船隻器械并僞銀印等項其志略誠有足多者伏乞皇上矜念孤臣竭節推恩優敘用獎前勞益鼓後効俾凡列戎行者莫不聞聲感激競奮同讐庶粵中多事之會可幸底績於蕩平也銀印另行彙繳外等因順治十年八月二十三日奉聖旨馬雄竭忠勵士捷功可嘉著議敘具奏該部知道欽此欽遵抄部送司案呈到部該臣等看得僞逆龐太監等聚衆作祟總兵馬雄督率官兵斬殺多級勞績誠有可嘉應與紀錄以策後效所有外委李應詔雍尙仁把總李有成陳九志各有臨陣擒斬之功相應一併紀錄陣獲器械留營充用所獲銀方印一顆應解臣部轉送禮部所有守備安邦滿進貴外委劉觀朝楊國榮羅守信張德川蘭冬馬剛千總羅仲高張九桂據疏內稱督率官兵直撲平南俟有捷音再報應候題報到日另議可也恭候命下遵奉施行謹題請旨順治十一年正月初五日兵部尙書固山額真臣噶達洪尙書降一級臣王永吉右侍郎臣科兒坤臣李蔭祖左侍郎臣衛周胤左侍郎管右侍郎事臣杜立德啓心郎臣介山臣屈和尙臣劉斗職方清吏司理事官臣達來臣馬呈禎副理事官臣馬兒奇哈郎中臣楊原澄

(硃批) 依議行

刑科左給事中孫珀齡題本

刑科左給事中臣孫珀齡謹題爲重臣委任既專調度相應從便敬陳末議仰候聖裁以慎封疆大計事臣辦事垣中見經略輔臣洪承疇疏奏偏沅巡撫之缺有袁廓宇才地相宜遵勅諭一面調補一面奏聞等因奉聖旨偏沅巡撫已有旨了該部知道欽此臣愚竊謂經略任大責重東南半壁悉付仔肩惟慮其不肯擔當游移瞻顧推委內廷耳今以湖湘險要毅然請用節鉞政輔臣之悉力肩任爲地擇人可抒皇上南顧之憂者也其疏中一則曰以本官推補偏沅員缺剿撫必能奏効二則曰必得此真才乃可同心共理應手分猷三則曰若候會推交代往返必兩叁月恐一誤不堪再誤四則曰已檄委本官前往料理營房催辦糧草預計剿撫之著其委託之專決事機之迅速有萬分自信絕無猶豫者矣乃今因已推之成議命馮聖兆前去交代夫聖兆才略允稱堪任但程路遙賒計非刻日可到而袁廓宇聞知當局有人自必灰心謝責則兩叁月之巖疆誰任其廢弛之咎乎且輔臣旣不允其請而信聖兆之心未必其如信廓宇後來機宜調度間儻稍不能得心應手在聖兆處此固難而輔臣亦得有所藉口矣臣前讀皇上遣輔臣聖諭內有云陸轉調補悉從其便吏兵貳部不得中制此從古帝王命將出師之要著苟其中制斷少成功今兵馬錢糧無不任其調發獨此巡撫鉅任未免掣肘何以信綸音而鼓任事勸軍前効命之文武乎至於馮聖兆俟別缺改用原於會推之典未有礙也臣忝在言職封疆大計不敢不冒昧披陳伏乞皇上鑒納芻蕘周謀遠慮裁奪施行不勝惶悚待命之至緣係重臣委任既專調度相應從便敬陳末議仰候聖裁以慎封疆大計事理臣未敢擅便謹題請旨順治拾壹年正月拾叁日刑科左給事中臣孫珀齡

靖南王耿揭帖 順治十一年三月十九日到本揭對同

靖南王耿揭爲遵旨回奏事案照本藩奉命往征潮逆尙久旋師回省于十年十一月初三日途次大陂接得兵部咨文一角爲聖明圖治方殷天下望治最切二王兵占官署文武占居民房流離失所(謹)僅請旨嚴飭以安地方事職方清吏司案呈奉本部送兵科抄出廣東布政司左布政胡章奏前事等因奉聖旨這本內事情着靖南王平南王自行回奏胡章作速到任不得借占署稽遲該部知道此本比式稍長着飭行欽此欽遵抄部送司案呈到部備咨到藩遵照旨內事理查照具奏等因准此本藩閱之不勝悚懼自宜靜聽處分不應瀆辨因奉有自行回奏之旨輒敢備述始末逐款剖明爲我皇上陳之一胡章所言翰林婦女爲兵丁擄去當是時官兵抵廣省城堅壁(壁)抗拒九閱月凜風宿雨砲擊鋒傷不知凡幾城開之日奮勇之心卽食肉寢皮未足以洩其恨其爲所俘獲者豈止陳彩一家矣且祖宗舊制剿逆撫順自非本藩始彩以從逆漏網事在七年十一月內九年方入翰林烏得藉口爲現任翰林之家眷耶比時城中皆爲賊黨卽果屬現任翰林倥偬之際玉石誰分况我朝以仁義興師拯民水火方切來蘇之後而章乃忍以擄字加之能不貽譏後世乎此不獨謗本藩實以謗朝廷矣一言兵占官署官占民房此其事始入城時有之其後因兵民雜處未便稽詰奸宄恐生事端當與平南王尙商酌以北城駐兵馬南城住百姓一應文官分住南城料理民事至若布政衙門仍存作布政司公署安得謂兵馬久占致章到任無所耶况查各省俱有另築滿城之例地方初定豈忍勞民傷財故因兩城而權宜分住其何以爲占也至于委署一事向者本藩父奉命出都會有缺官暫委之命旨及廣省旣克一切料理需人除欽選外所有懸缺卽以隨征著勞及倡先投誠者咨院行司考補俱已會題恩准實授在案一

言本藩等勒司詳院時加凌辱無籍棍徒賄賂鑽營章何不直陳其事直指其人而乃揣摹于千餘里之外捏此無根之論欺罔皇上耶况本藩隨父節次從征行間事宜習之已久豈敢妄越以負朝廷此本藩可矢諸天日者也本藩捧讀綸音旨內有胡章作速到任不得借占署稽遲中間規避之情與含沙之射早已爲我皇上洞燭無容本藩之預奏以瀆宸聽也更可異者本藩于十年七月內遣蝦楊之義李朝務前往湖廣探問故臣定南王孔有德之女彼其舟次吉安與胡章俱船泊府河不過水手爭鬪竟將二蝦各責三十板本藩思蝦乃上賜之官而敢怒責則其人之狂悖可見矣本藩因共事地方已相忘于不較茲因回奏而并及之如以本藩爲飾詞巧卸伏乞皇上勅部一併從公查奏以明是非如章屬誣誑則應按以造誑欺君借端規避之律庶本藩犬馬愚衷得邀聖鑒使大小臣工恪遵國法永杜奸欺之弊矣爲此除具奏外理合具揭須至揭帖者順治拾壹年正月二十九日

靖南王耿揭帖 順治十一年三月十九日到本揭對同

靖南王耿揭爲臣子年已長成乞恩准令擇配以成婚禮以廣皇仁事本年正月十四日准禮部咨題覆本藩奏前事奉聖旨着議奏該部知道欽此該臣等議得靖南王特蒙聖恩封王鎮守廣東雖子俱已長成不敢擅行議婚奏請理合應許其王母率王子到京於各大臣中女擇配若欲與某大臣結親仍行奏請候旨舉行奉聖旨依議行欽此欽遵備咨到藩該本藩捧讀綸音荷蒙我皇上高厚之施有加無已真有頂戴世世於不盡者矣伏思本藩母年及耄夙疾時發遂先令藩子遵旨赴京但京師住房乃係先藩荷蒙聖恩賜爲館舍使其進京□止者值本藩連年在外無人照看多有傾圮又本藩母子將聚族而處未免窄隘難以久居伏乞皇上勅部查給得藉寧處迺可擇吉議婚用昭天寵于弘被矣爲此除具題外理合具揭須至揭帖者順治十一年正月二十九日

靖南王耿揭帖 順治十一年三月十九日到本揭對同

靖南王耿揭帖○恭謝聖恩事本年正月十四日准禮部咨該廣東巡撫李棲鳳題爲懇恩詳請援例設科以廣士進事奉聖旨著議奏禮部知道欽此隨該部覆議得平南靖南兩王藩下欲考試者應附廣東廣州府儒學於原額外各進生員十五名各取舉人壹名各廩生四名各增廣生四名每年各出貢壹名其中有係新漢人非係兩王藩下舊人及包下奴僕俱不准考等因奉聖旨是○議行欽此欽遵備咨到藩該本藩等恭設香案望闕叩頭謝恩訖但○思本藩等家世俱習戎馬卽藩下諸人鮮克知書恭際我皇上文治聿興儒教弘彰爲父兄者敢不勵其子弟說禮敦詩以仰承樸棧之化獨是本藩等子弟身逐行間僻處遠地莫由觀光於輦轂而聖恩周及不遺詩非使猶得隨遠方諸士之末以與賓興之選本藩等惟益加勉勵造就羣材雖未敢云濟濟多士王國○楨但小子之有造庶不虛壽考作人之意耳爲此除具奏外理合具揭須至揭帖者順治拾壹年正月二十九日

陝西平慶西鳳等處總兵李茂揭帖 順治十一年五月初一日到本揭對同

欽差鎮守陝西平慶西鳳等處地方總兵官都督僉事李茂爲恭報拏獲謀反逆擊事順治拾壹年貳月初柒日據職
□兵丁胡四首稱道士劉性德向四說稱今有天啓太子□在草峯原欲要尋訪好漢等語四伴言依允誘哄性德□
出僞劄壹張內填胡國泰字樣不是四名四接劄密首到職驗係訛言僞劄上寫甲午年月給安國公等語職卽差人
當將劉性德拏獲審據性德招稱德係故明宗室本名朱朗鑠在草峯原彭三陽家遇一僧人與德相見問德是何人
出家德言是明朝宗室僧人卽說我是天啓太子□名遊方我封你軍師你在外訪夢好漢與他劄付招他□與胡四
劄付是實職領官兵王懋德左重暉等當夜前往草峯原拏獲彭三陽招稱亦係故明宗室本名朱謨□□幼居士出
外遊方遇一僧人請至三教堂供養日久□□說是天啓太子改名王道真年叁拾叁歲遊到此方欲要恢復故業同
謀捏寫僞劄招搖惑衆是實問道真何在陽稱在隆德華亭地方已住肆年今被武印秀武寅送去□德縣地方孫家
山職卽領官兵王懋德王登魁王順宗左重暉陳天性等分發兵馬齊出四路向裏擁圍逼行躡拏逼急蘇石匠稟報
隆德縣拏獲首逆王道真到職同分巡關西道僉事楊三辰會審王道真長揖不屈稱孤呼皇大肆欺侮隨要紙筆當
面親書朱應龍天啓東宮太子本□慈媿等語所供妄詞與前僞劄語意相同隨將謀反首□王道真等并搜獲小木
印叁顆木圖書叁箇王道真親筆草字肆軸仍在彭三陽家牆壁內掏出稱臣投願率兵□忠等語李天智等投詞捌
紙內書均係謀反僞語其□□真假職難確據一併解送陝西巡撫馬之先審實具題外仍會知撫臣具疏緣係拏獲
僞逆謀反情形字稍逾額伏祈聖宥除具奏外爲此理合具揭須至揭帖者順治拾壹年叁月貳拾伍日總兵官李茂

延綏巡撫董宗聖揭帖 順治十一年三月二十六日到本揭對同

欽差巡撫延綏等處地方贊理軍務都察院右副都御史董宗聖爲恭報延屬節年脩過城垣工程并脩復縣治官民業已入城仰祈聖鑒事竊照職屬延安一府爲明季逆闖李自成起首發難之區蹂躪殘破凋敝已極自我清朝定鼎而後正在休養之際不意又遭王永強倡謀叛亂而人民之殺戮廬舍之焚燬城垣之傾頽所在蕭然益非昔比職奉命撫延莅任之始時王逆雖已授首而高友才尙踞府谷大兵圍困需餉方殷彼時人心風鶴瘡痍之民悉皆深藏遠遁職日夜孜孜(改)招集殘黎僱運糧芻惟期軍需無悞而地方一切廢墜不暇脩舉嗣幸府谷恢復賊孽悉平而平西王固山額真侯墨勒根蝦大兵于順治八年正月內出境之後凡關地方一應事宜職始從頭料理次第舉行查得鎮城城頭懸樓鋪房與夫角樓柵欄被賊拆毀大半兼遭雨水淋漓城垣雉堞砲臺甕城等項率多坍塌傾圮而外路各屬則城垣鋪房樓臺以及衙宇公署倉廩等房亦皆坍塌拆毀尤爲不堪至如延南之宜君中部甘泉三縣較之他處殘破更甚城內鞠爲茂草絕無廬舍居民自明迄今已二十餘年未經脩復故二三小民向皆棲息堡寨之上其部餘職官亦隨民而居焉竊思固圉封疆首重城池若城廓不完根本不固將何賴爲保障哉職用是嚴飭道府等官令各設法脩葺無素時值匱乏苦不堪動銀兩職身任封疆重寄又不敢坐視任其傾圮隨與鎮臣哈喇庫商議倡率闔城大小文武各官共相捐輸覓匠鳩工先將鎮城緊要工程次第脩葺仍檄飭各屬亦各量力輸金將各緊要工程脩葺去後計八九十三年鎮城節次脩過城垣堞牆水濠共約一千二十餘丈脩完懸樓砲臺角樓柵欄共二百餘座城頭鋪房共一百五十餘間甕城馬道水洞四處立水濠九道外路各營堡八九十三年節次脩過城垣堞牆共約六百六十

餘丈大城城工水道水濠甕城二十餘處城樓砲臺角樓官廳共七十餘座城洞門房鋪房衙宇廩房營房共一千四百五十餘間以上脩過工程各處多寡不等大都出自各官捐輸不煩勞民傷財日積月累數年之間則從前之頽垣敝基亦復堅固矣至于宜君中部甘泉三縣事關從新脩復頗費籌畫先是督臣孟喬芳因見宜君縣地居扼要故題設叅將一員駐劄其地協同該縣官脩葺城垣招集士民復業副據該營都司僉書管叅將事劉國玉報稱脩完本縣城垣并蓋完門樓鋪房五座察院一所兵丁瓦房草房六百六十間其縣官衙宇未經脩完等情據此仍檄行作速脩葺催令縣官進城去後順治十一年二月十六日又據中部縣知縣彭聖培報稱本縣週圍城牆十損其半縣基莽然無存卑職捐輸脩理完固并蓋本縣後宅一座廂房數間二堂一座吏書房六間至于倉監皆已略備卑職于十年十月二十二日率僮僕數人進城居住時相隨進城者有鄉民李中式等三十餘家因隆冬地凍未便起蓋房屋先打土窰三十餘處暫爲居住今方春時和正在招集百姓起蓋房屋事關進城大事理合具報等情據此再查甘泉縣行催日久尙未報至仍一面嚴飭設法脩葺完日催令官民進城與夫宜君縣各報至另疏題聞外所有前項節年捐助脩過工程及中部縣官民進城復業事關地方情形除備細造冊咨送兵工二部外相應據實報聞伏乞聖鑒施行因述脩過工程字數溢格併祈聖宥爲此除具題外須至揭帖者順治拾壹年叁月日右副都御史董宗聖

戶部題本

戶部尚書臣車克等謹題爲請祈會師夾剿以除邊患事准兵部密咨前事內開該山西巡撫劉弘遇奏前事內稱順治拾壹年叁月貳拾壹日准兵部咨該直隸巡撫王來用題前事本部覆議看得逆賊高鼎盤踞晉省深山流毒地方已久自當速行會剿以靖餘孽應勅晉撫挑選兵將同直隸撫臣王來用同心協力訂期夾剿務期掃蕩餘氛等因具題順治拾壹年叁月拾貳日奉聖旨是依議速行欽此密封到部移咨到臣准此除飛檄屬平道副使柯臣寧武營副將胡來觀東路營叅將劉曰善北樓營叅將申宏諭及臣標左營遊擊苗成龍馳赴境上聽候夾剿仍一面移會直隸撫臣王來用督發彼處官兵訂期協力會剿外惟是狡賊高鼎雖係五臺縣人自占踞南陀寨臣於順治捌年拾月內親督各營官兵攻尅巢穴已傾而高鼎遂敗逃於直隸地方矣臣於接壤要隘處所設兵防堵備禦嚴密至今叁載未敢窺犯復據於晉也今高賊見在真定地方襲破阜平大肆猖獗閔鎮臣魯國男手本內云逆賊高鼎盤踞西山神堂關外畿晉相鄰此剿彼逃自非兩省會剿不能殄滅者而撫臣王來用疏稱賊之巢穴處於晉省萬山之中必得晉撫就近選調將兵訂期主剿等語似與鎮臣移會不相侔也臣惟督發道將官兵秣礪以待相機會剿但調度機宜必須主帥諸將聽其指麾山西原無總兵雖有副將胡來觀等不過偏裨將耳安能主帥三軍况賊踞神堂關乃直隸地也相去五臺肆百餘里出疆會剿紀律須嚴應飭總兵魯國男統率兩省各將視賊向往無分畛域協力夾剿務盡根株庶將令一而成功亦易也至於會剿之兵師行糧從如兵馬入直隸山西地方協剿皆於附近州縣彼此協濟糧芻免致臨期互相諉悞統祈勅下戶兵貳部覆議施行臣更有請者臣已奉旨降調束裝候代雖一日未離地方一日不敢

弛肩然將去之身恐號令不能施於道將併乞勅部速催新撫臣星馳前來受事料理軍務地方幸甚微臣幸甚等因順治拾壹年肆月初壹日奉聖旨該部速議具奏欽此密封到部該臣等看得逆賊高鼎盤踞□晉地界此追彼遜今奉旨兩省官兵夾剿候代撫臣劉弘遇疏請飭總兵魯國男統率指麾前來查總兵魯國男已經解任聽勘應勅直隸山西各督撫挑選謀勇副將壹員統率夾剿無分畛域務期淨盡根株至於協濟糧芻若不早行直隸山西附近州縣速爲預備勢必臨期諉悞應勅戶部作速議覆其□速催新撫臣星馳赴任事關吏部應勅吏部作速催促赴任可也恭候命下遵奉施行等因順治拾壹年肆月初柒日奉□旨是依議行欽此密封到部爲此密咨貴部煩爲查照旨內事理欽遵施行等因密咨到部准此相應議覆該臣等看得會剿高逆應用糧草先准兵部咨會該直隸撫臣王來用疏請預備緣由臣部已覆請勅下該撫確查各調官兵若干應用行糧若干責令附近州縣動支正項錢糧作速辦運接濟奉有俞旨轉行直隸山西撫臣遵奉去訖今准兵部咨會復該山西撫臣劉弘遇題請前來合再請勅下直隸撫臣山西撫臣各照所轄州縣酌量應用糧草作速預備以資接濟毋致匱乏可也相應覆請恭候命下臣部轉行遵奉施行臣等未敢擅便謹題請旨順治拾壹年伍月初貳日戶部尙書臣車克太子太保尙書臣陳之遴左侍郎臣龔鼎孳右侍郎臣海爾圖右侍郎臣王弘祚啓心郎臣祁徹白啓心郎臣李迎春啓心郎臣任治國額者庫臣和善

(硃批)依議速行

宣大總督馬鳴珮題本

欽命總督宣大山西等處軍務兼理糧餉兵部左侍郎兼都察院右副都御史臣馬鳴珮謹題爲恭報招撫賊情事本年陸月初貳日據鴈平道副使柯臣塘報伍月貳拾肆日准寧武副將胡來觀會稱遵奉新軍門憲示相機剿撫於拾柒日至菩薩頂面會喇嘛僧中峯宣布招撫德意令各賊洗心投誠如有遲疑即便進兵圍剿拾玖日據民人張辛報稱董三狗子等感誦恩德情愿歸降乞命等情貳拾日據偽副將董景祿卽董三狗子帶領賊夥白祥賀登仕等貳拾柒名各帶隨身弓箭鳥鎗什物齊至白頭庵剃髮赴營投誠隨經公同宴犒外并節次招撫散賊賈伏等伍名劉起銀等拾壹名口趙相等叁名一并會報到道准此查得招撫頭目董三狗子正名董景祿原屬高鼎妻弟向爲賊營牙將誠與高鼎同力相附者也茲因會兵剿撫貳人相離日久今奉招安憲示情愿率衆先行就撫求得免罪全生本道仰體德意准與來投其賊首高鼎俟有確情另報謹將董景祿等解送到臣卽將董景祿等親行詰審據供景祿同高三等在山非安心爲盜已聞知朝廷屢頒恩赦免死招撫之洪德憫恤百姓好生之仁慈奈前文武官以殺掠爲得意以暴虐爲邀功使賊畏死不敢歸順投誠今聞新部院到任寬政徧施出諭徧示爲朝廷宣揚恩詔屢赦免死條款探知有實心招撫我等得此生路所以放心投見新部院改却前非願爲良民感朝廷招徠浩蕩之恩盡窮力報答不殺之命竭衷隨撫各處賊衆以免前愆此小的等實話等情供吐到臣該臣看得高鼎等久爲臺代之孽屢年窮兵搜剿尙未能靖其株蔓臣甫到任時以此邊政爲第一重務開誠示信徧行曉諭隨檄該道將州縣等官嚴諭並施剿撫之策雖賊無所歸實感聖恩詔赦免死之例仰體皇上好生之仁俾使高鼎黨羽聞知向化革心歸順今伍月拾柒

日隨有高鼎之妻弟董景祿率領夥賊白祥等貳拾柒名信諭投誠情詞真切又供高鼎意切投誠歸順向化臣卽賞景祿袍帽花紅銀兩遵奉恩詔赦宥并贍黃詔款給以免死信牌就令董景祿齎執同鴈平道中軍常道明差標官蘇龔霖前赴五臺協同鴈平道招撫高鼎俟有就撫情形另疏報聞伏乞聖明垂照施行因敘原文字稍逾格併祈鑒宥緣係恭報招撫賊情事理臣未敢擅便爲此具本專差提塘官陳素蘊親齎謹題請旨順治拾壹年陸月初叁日總督宣大山西等處軍務兼理糧餉兵部左侍郎兼都察院右副都御史臣馬鳴珮

臣等謹將高鼎等情據實具奏伏乞聖明垂鑒施行謹此具奏

原定南王女孔四貞奏本

原定南王女臣孔四貞謹奏爲恭謝天恩事竊念臣父奉命南征本欲削平雲貴救民塗炭何期父命不辰功未成而身先殞雖堅微勞於湖粵猶未盡展其生平至今猶雁朝廷宵旰之憂諒臣父九泉之下亦必拊膺而長嘆者也茲乃過蒙皇仁優卹種種殊恩有加無已臣撫躬知感涕淚交集惟是宸聰寵渥成命難回設醮誦經拾捌晝夜擇地造墳惠及枯骨願臣父何人臣亦何人堪此非分之榮復荷蒙賜給臣父拾年拾壹年分俸銀壹萬貳千兩在皇上則爲憐臣孤苦不次賞賚而臣以草木之微謬蒙天地洪施總碎首以爲期卽捐生其莫報但臣身係女流不敢趨赴午門陳謝謹率同官蝦恭設香案望闕叩頭頌聖天子之萬年以丕承帝天無疆之眷命而已至於官蝦兵丁老幼均沾雨露人人感泣聖澤旁流不棄一夫而臣敢有冒干天聽者牛泉章京臣閔天俊向係臣父劉委管提塘事歷盡艱辛清勤篤孝經綸布置氣量過人足稱任使不容泯沒辦事迄今未蒙實職懇祈勅下該部查勘如果臣言不謬願賜少加優擢以彰勞勩其粵西殉節官蝦有無嫡嗣容臣逐一開報以聽皇上鑒察字稍逾格伏乞聖明鑒宥施行臣不勝感恩惶悚之至爲此具本謹具奏聞自爲字起至本字止計肆百貳字紙貳張右謹奏聞順治拾壹年柒月拾捌日原定南王女臣孔四貞

(硃批)知道了該部知道

叔和碩鄭親王跡爾哈朗等題本

叔和碩鄭親王臣跡爾哈朗等謹題爲請給蒙古兵力以奠巖疆事該兵部覆平南王尙可喜等題前事內稱竊臣自先年航海原隨官兵計壹千捌百員名繼蒙朝廷恩養幼丁漸長比入廣來又增有柒百名共計貳千伍百員名之數日事征剿且炎方水土多不相宜具邀聖鑒不敢復贅雖臣多方招募未免皆遊蕩之徒非殷實者比未可倚爲心膂卽極力撫養終無實益遇有賊息欲請大師援剿往返動經半年師行萬里仍須休息未可遽藉前驅况師來賊遁終無濟於緩急茲臣計無復之不揣冒顛仰祈皇上矜臣亟切至情獲從蒙古歸順之內准撥叁千員名到粵庶與臣一心可藉臂指之用臣願竭身家生計捐給器具一以代朝廷之優養一以資封疆之捍衛旣無遠調跋涉之艱又省長途供億之困用俟地方大定旋議撤還或亦善後萬全之一策也伏惟皇上俯垂鑒察等因順治拾壹年柒月拾壹日奉聖旨兵部確議具奏欽此又該靖南王耿繼茂題爲請發蒙古兵力以固封疆事臣自奉命恢粵以來東西馳驅廣東拾郡馬足殆遍苟臣力之足支無不竭力以從但臣部下兵馬蒙恩調足壹萬額數其原自遼東帶來官兵實止貳千叁百員名各處征戰不無損傷難以招募頂補率皆南人俱非經戰之輩連年西賊鴟張兼土寇四處竊發兵力多不可恃以致頻煩廟算徵撥援剿勞師動衆供億浩繁乃大兵雲集賊已望風遠遁及大兵回汛賊又乘機肆突是援剿之兵頻請頻回徒勞民力封疆何由得靖臣思口外蒙古歸順者實繁有徒若得一二千發入臣伍庶殲滅羣寇緩急足恃爲此謹會同平南王臣尙可喜督臣李率泰撫臣李棲鳳冒昧顛請伏乞皇上俯賜俞允封疆幸甚等因順治拾壹年柒月拾壹日奉聖旨兵部確議具奏欽此俱密封到部該臣等看得平靖兩王疏稱原隨官兵止有貳千伍百

員名其餘招募遊蕩之徒未可倚爲心膂遇有賊息大兵往返萬餘里師來賊遁無濟緩急題請撥發歸順蒙古各貳叁千員名入伍殲寇前來兩廣正在多事二王確查逆賊情勢思爲善後之計題請蒙古深屬有見但事關重大臣等未敢擅議恭請聖裁等因順治拾壹年柒月貳拾日奉聖旨著議政諸王內大臣確議具奏欽此欽遵該臣等會議得平靖二王疏稱每遇逆賊窺犯輒請大兵路途遙遠無濟緩急請將投順蒙古撥發各貳叁千員名入伍剿賊誠爲封疆起見但邊外投順蒙古各有部長不便調發應請勅兵部自今以後凡外省解到蒙古不得仍送理藩院但查照送到數目平分咨送兩王入伍効用仍令兵部通行各督撫凡該管地方蒙古作速嚴查送部以便轉送平靖二王編兵入營者也謹題請旨順治拾壹年柒月貳拾叁日叔和碩鄭親王臣跡爾哈朗和碩承澤親王臣碩子世子臣季度多羅信郡王臣鐸尼多羅安郡王臣岳樂內大臣拔突爾公臣黻拜伯臣索尼議政大臣臣哈什屯臣賴兔庫臣巴哈兵部尙書臣孟明輔右侍郎臣科兒坤啓心郎臣介山

(硃批) 依議行

直隸山東河南總督李蔭祖揭帖 順治十一年八月二十九日到本揭對同

欽命總督直隸山東河南等處軍務兼理糧餉兵部尚書兼都察院右副都御史李爲遵旨會問事順治拾壹年捌月貳拾日據通密道兵備副使劉餘璫呈蒙職憲票准吏部咨該本部覆考功司案呈議得兵部尚書鳴達洪等迎定南王喪馬匹人夫及迎接官員不整齊預備怠慢玩忽大不合理奉有着議處具奏吏部知道之旨察得侍郎柯爾坤係宗室臣部不便擅議應勅下宗人府同臣部議覆其通州未接官員無有職名難以懸議應勅督撫限期確察職名速奏以便議處具覆等因順治拾壹年陸月初拾日奉聖旨依議行本內清字落寫遵旨會問事着補正飭行欽此欽遵備咨到本部院准此除移咨直隸撫院外擬合亟行爲此票仰該道察照部咨遵奉聖旨內事理文到即將通州未接官員職名確察明白立刻具詳馬上差人馳報本部院併撫院會題施行速速蒙此遵即備行各部分司並協守通州察取去後今准管理坐糧廳戶部郎中王鏞會稱本廳受事於糧運初至之時比因口袋未置船隻未脩夫役未備兼各閘河道淺阻以致糧艘滯阻本廳星夜請銀措置日每馳驅於務關灤縣張灣一帶親身往來料理價僱寢食不遑而定南王喪到之日緣部司非地方之官無有通行知會之文是日本廳正在張灣拿回空之糧船裝載入廣兵丁並未在通亦不知定南王喪到等因又准管理草場戶部主事胡希聖會稱本部所轄通昌往來料理於伍月貳拾陸日據昌平催餉官王有德報稱催到兵餉銀兩隨於貳拾柒日赴昌收庫於陸月初玖日散完初拾日回通料理今准前因擬合回覆又准管理大運西倉戶部主事馬雲龍會稱察得定南王喪到之日本倉偶感風寒臥署不能動履故爾未曾迎接又准管理中南倉戶部員外秦仁管會稱察得定南王喪過通州本倉正感時疾臥床不能管事呈奉督部

准假調理在案又未先經傳知致失迎接又准管理通惠河工部主事楊榮胤會稱察得本差於陸月拾壹日接管通惠河事而定南王喪至之時本差尙未抵任及察前任主事韓之俊告病不能理事已經具題在案今准前因相應移覆又准協守副將張惟一會稱定南王喪由通經過未奉傳示迎接是以在城大小官員有公出差遣者實實不知察本協是日伍鼓忽報采育一帶新河等處有馬賊截劫本協帶領親丁隨往躡緝離通伍拾餘里驟報王喪抵通飛馳前來業已無及其營衛各官有聞報接遲者有公差原未在城者今准前因擬合開覆各等因到道據此該本道察得是日通州在城文武各官（俱）經失候迎接定南王靈但內有會稱本日因公事遠出未回者相應於開送職名下註明緣由具揭呈覆計呈送文武職名揭帖壹扣計開除戶工貳部分司驗文開列外通密道副使劉餘璣通州知州師佐州同邵汝賢州判何獻祥通州儒學學正杜玄培訓導白啓蒙潞河驛驛丞馮捷和合驛驛丞缺通流開官陳懷道署通州吏目事通州左衛經歷崔雲翀以上俱接遲道標中軍都司周景松本日道差往密雲放餉協守通州副將張惟一本日往采育新河等處帶兵緝賊通州左營遊擊魏廷讚已故中軍守備姚焜護送銀鞘千總岳世忠伏路把總尹國儒未接把總韓弘胤送餉通州右營遊擊王道顯接遲中軍守備缺署中軍千總羅喬林防漕把總樂成功接遲把總楊若挺防漕通州左衛守備黃石下屯徵糧左所千總李起龍接遲中所千總張斌接遲等因呈報到職該職看得王靈爲國殞身蒙聖恩垂念宏勳尙隆優禮何物通州各官竟慢泄從事推無傳知失候迎接怠忽之罪百喙何辭職接准部咨奉旨確察職名職隨卽嚴限期頻行檄催前後共計拾次該道今於捌月貳拾日始報到職卽據報繕疏會同撫臣王來用合詞具題伏乞聖鑒勅部察核議處施行爲此除具題外理合具揭須至揭者順治拾壹年捌月日

偏沅撫院袁咨文 九月二十六日到

偏沅撫院袁爲萬分緊急賊情事本月十七日申時准許總兵送到奸細一名張□四川長壽縣人久在賊營先是本日張勇趕赴彭將官處投糧彭將官見其單人疑惑即同中軍周國明審問明白送院該本院當堂親審供稱身在靖州滅將軍下于八月二十八日有僞南府姓張自貴州經天柱縣來到靖州自帶兵丁有壹萬肆伍千馬有二叁千匹先差二十□□赴寶慶打探今差身等三人於九月初二日自靖州起行打探俱到紫陽河僞巡檢處先差身徑到寶慶投糧便爲根底後二人就到在於東關會合□尋前貳拾五人只打探寶慶有多少兵馬有無滿洲兵馬併城守事宜不時陸續即報僞南府已與滅將軍調集兵丁約有貳萬以上馱載火砲一一齊備要隨後即來寶慶打帳(戰)是的本院即傳副將王平遊擊周國明再加細問一一是的該本院看得寶慶逼近賊穴時值秋涼正各賊入犯之時雖時有僞牌僞示及獲奸細俱不足信未敢塘報今奸細張勇所供曲折情形再四盤問要犯寶慶甚是的確又審各賊已自靖州起身隨後前來又另據塘報紫陽河馬兵甚多似已起行至武岡上下恐即見苗頭寶慶西兵見在患病十有七八許鎮兵丁獨力單薄城垣低朽不堪守禦今差人馬上晝夜馳報伏祈貴院部煩請一面即會滿洲各固山大人立刻馳援一面將渡船飛駕至湘潭伺候或先發某枝兵星夜馳赴湘鄉以張聲勢以救緊急此皆萬不得已本院即夜間會提督選差馬兵馳探若有消息再即飛報但一見苗頭再報發兵恐致往返遲悞事關萬分危急幸勿刻遲須至咨者順治拾壹年玖月十七日戌時

山東巡撫耿焯揭帖 順治十一年十月初七日到本揭對同

欽差巡撫山東等處地方督理營田提督軍務都察院右副都御史耿焯爲請移萊道以去膠鎮速變賊產以杜亂源併勅察卹死節道刑各官以慰忠魂以勵將來事順治拾壹年玖月貳拾日據山東布政司呈稱順治拾年拾貳月貳拾日蒙巡撫山東夏部院案驗准吏部咨文選清吏司案呈奉本部送吏科抄出該兵科給事中晉淑軾題前事等因順治拾年拾月貳拾壹日奉聖旨這本內事情着詳議具奏該部知道欽此欽遵抄部送司案呈到部該臣等議得除變賊產裁膠鎮聽戶兵二部議覆外萊州道應否移駐應勅該督撫詳酌妥確具奏再議至萊州道徐大用署膠州事推官李煌科臣疏稱死難可憫應併勅該督撫確查死難情由具題臣部議覆可也理合覆請恭候命下臣部遵奉施行等因順治拾年拾壹月初拾日奉聖旨依議行欽此欽遵抄部送司相應行咨案呈到部備咨到院案行到司蒙此行間本年拾貳月貳拾肆日又蒙總督直省馬部院憲票准吏部咨前事准此除膠州更設兵將已會疏具題萊州道似未便再移候部覆後另議外爲此票仰該司即將萊州道徐大用署膠州事推官李煌確查各死難情由詳報本部院并撫院以憑會題施行等因併行到司蒙此遵依隨移萊州道確查去後於拾貳月貳拾捌日又蒙前撫夏部院批據署分守萊州道事務萊州府知府萬代尙呈爲勞臣仗節殉身懇恩題恤以昭國典事呈稱順治拾年拾壹月貳拾日據萊州府申據殉難山東萊州道副使徐大用長男徐讓次男徐恭呈前事呈稱竊照讓父出身萊郡拔擢守道居官五載操凜四知當萊城兵焚餘息澤無歸鴻莖有伏莽讓父綱繆晝夜幾嘔心血至若殲淄青之寇壯士投戈銷邪教之萌渠魁授首已經彙叙報部積有成勞茲因叛賊海時行等奉命南征擁衆不發讓父蒙撫院差委躬至膠州督

催起行雖明知逆焰已張終不敢悞憲期苟全也奈海叛已養癰待潰之驕卒竟爲囊血射天之逆舉遂於本年八月二十七日擐甲露刃蜂擁行署逼讓父往從讓父申以國法開以大義剖心碎首誓不與賊俱生遂白刃交下立刻身亡四境童叟若喪考妣斷常山之舌義氣冲天植雷陽之竹哭聲震地哀哉讓父一生報朝廷立名節撫軍民爲國而死誠無憾矣在臣子之誼固守死爲先而朝廷之典惟褒忠爲大爲此懇恩憐念讓父死慘請各部院特賜題卹上昭國典下慰忠魂九原有知讓父雖死猶生矣等情具呈到府據此又據膠州儒學申爲叛逆之猝起不測孤臣之抗死堪矜懇賜轉詳循例請卹以勵臣節事申稱蒙本府批據江南寧國府儒學生員係殉難萊州府推官李煌父李日泰同孫李如玉呈前事呈稱泰次男李煌由戊子拔貢除授萊州府推官歷任兩年飲冰一念各院薦牘通國載有口碑本年柒月內值膠州知州被劾時逆鎮海時行奉調南征督撫道府慮將惰兵驕逗遛王師遴委男煌視事到州之後靖難萊州道徐副使隨亦駐膠苦心商確芻餉供億策備拮据不料兵無紀律乘隙爲盜夜劫民廬男煌偵得其實力舉保甲勸民堵禦方謂稍爾綢繆豈知逆心不軌包禍有素捌月貳拾柒日聲言犒兵登時橫獗男煌聞變初欲詣道請命設法堵拒而賊勢披猖事不可支懷印挺立州堂叱却步賊二三輩頃之逆將陳奇策同馬賊百餘騎闖入劫庫擒男逼降男(厲)聲不屈唯喻以國家豢養之恩往叛覆轍之蹟賊怒益觸舉刀相向男終冠不可去膝不可折碎飲賊刃罵聲不絕暴屍三日圓張雙眼膠人之所共見而捶心者也今大兵雲集諸逆遊魂旦夕授首痛男半世燈窻碎身鋒鏑爲國而死死亦何憾竊見晉豫(姜)江金之變凡封疆殉難諸臣俱邀贈蔭令典於先男死節旣與相符而臨終自抗尤爲錚錚雖遺兩孫一甫十齡一方在襁有腸可斷無口能宣泰因就養萊署由膠旋南同罹酷禍九死一生故得述

其始末濫額俯賜轉詳循例題請倘蒙仰邀恩卹併叨崇典不特使已死之貞魂被榮褒於九原且以勵將來之臣節明大義於千載矣等情具呈到府蒙批李司李死節封疆錚錚可表國家自有卹例仰膠州儒學查具甘結速報等因蒙批到學查得委署州事本府理刑廳李推官於順治拾年捌月貳拾柒日遇變委實慷慨殉難允宜題請恩卹擬合回報等情各申呈到府據此又據膠州申爲公舉死難忠貞節烈不宜湮沒代陳苦情祈請卹典以慰羣心以彰直道事順治拾年拾月初捌日蒙本府批據膠州儒學慶增附生員徐龍徵高弘觀于見龍等呈前事呈稱自傳檄海逆南征屢驅不前萊州徐守道臨膠彈壓於捌月貳拾柒日教場兵叛蜂擁入城執守道於公堂毫無懼色加利刃於項上罵不絕聲猶記當日有寧殺我勿傷百姓之言精忠貫日烈氣干霄閩州聞之靡不巷哭而道悲也未幾而賊進西門復入州衙劫庫放囚搶掠一空殺死署印刑廳李推官兩目圓睜抗顏不屈有光史册無愧君父者也九關有萬里之遙無路可通人心留三代之直有口可訴紳衿士民撞破頭臚裂碎肝腸手不能援身不能代不得不涕淚哀嗚呼天搶地赴陳於前也懇祈垂憐忠烈疏題旌卹以慰忠魂庶朝野風勵士庶尸祝矣蒙批仰膠州卽取該學甘結速查報府以憑據轉蒙此又蒙本府批據本州鄉宦原任通政司通政使今予告張若麒原任內翰林國史院侍讀法若眞原任內翰林弘文院庶吉士張應桂原任禮科給事中法若貞原任吏部考功司主事匡蘭馨原任御史張懋燿原任戶部主事紀騰蛟主事張茂先原任太常寺博士王塚見任行人司行人王垓見任寧菴州知州趙燾見任寧州知州韓魏候選通判紀鏞趙柱明李公植見任蠡縣知縣李世鐸見任將樂縣知縣宋可發見任宜章縣知縣冷開泰見任扶溝縣知縣吳朱禎原任光祿寺署丞高弘商舉人陳墀李粹白高景之朱爾鉉李世鈿宋澄見任訓導高遠王隆已原

任教授莊僑貢生姜士佳高念茲張若騷匡嶽張應甲張懋煌張鑿匡蘭瑞法樓監生高申之呈爲憲司威惠夙著殉難忠烈尤昭懇祈題敘贈卹并聽民情歲祀以慰忠魂以風臣節事呈稱竊照殉難分守海防道副使徐大用者收萊二年秉憲六載惠藹冬日清徹冰壺息事寧人而肺石日霽建威消萌而萑葦夙清迨至彈壓調發尤爲綏輯協中千振備而無形約束嚴而不厲豈意兇豎成謀必思假手爲質見危不辱處變不驚據案危坐足不下堂仗義殞身面不改色誠爲義烈形忠精爽著外者矣時則有萊郡刑館李煌者視篆泱月同心共濟執法無私久著清剛之節臨難不苟獨就從容之義九原應爲同志血食宜從配享但斂萬^(姓)襟贈之資卽成百年俎豆之地伏冀俯順輿情聽其歲時致祭至於贈卹大典國憲原有定例懇祈亟行題敘議贈議諡世祿世官庶可光史冊於來茲勵臣節於後效矣蒙批仰膠州查取該學甘結速報等因批行到州蒙此隨行取該學及廩增附生員甘結二本擬合回報據此看得原任徐守憲政靄春溫威嚴秋肅其蕩淄青之寇羣匿革心消邪教之萌三農鼓腹民方歌爲召父賊遂疾其忠臣仗節不移從容就難推官李煌青年利器方知虎豹咆哮之際欲行鷹鷂搏擊之威爲賊所猜與城俱殞並有光於史冊洵無負於封疆所當照例請賜褒卹以慰忠魂者也等因詳道該署道事萊州府知府萬代尙看得致身者人臣之大義旌節者勵世之大權義明之於見危權示之於論定原任徐守道秉鉞伍年淪恩三郡當淄曹之震鄰屹然磐石撲妖氛於方煽箠若列眉謂津上期兵可指麾而神速乃涇原變猝遂潰癰而莫支甘就死其如歸臨大節之不奪署膠州推官李煌品可式金操實擬玉平反滌冤允矣片言獄折摘奸發伏不止一路風清乃試錯節以太阿遂同封疆而瓦裂僵立飲刃舍生就義此二官者均無愧於綱常洵有光於吏冊况據士民之交口益徵功德之在人自當照例題請仰

膺褒卹以勵臣節而昭懋典者也蒙批仰布政司查報仍候總督部院詳示行繳蒙此隨移萊守道覆查去後續准該道咨據萊州府申據膠州查得徐守道奉委在膠督催海逆官兵起行忽於順治拾年捌月貳拾柒日海鎮官兵譟變擐甲露刃蜂擁入城執徐守道於公堂毫無懼色賊遂逼其往從罵不絕聲猶曰寧殺我勿傷百姓賊怒百刃交加立刻身殞未幾賊衆復進西門入州衙劫搶州庫將署印李推官殺死兩目圓睜抗顏不屈看得此二官者皆得乾坤之正氣允稱社稷之名臣無愧君父者也本當題敘以慰忠魂等因申詳到府據此該本府知府萬代尙看得前任徐守憲歷來伍載爲度百貞雨露雷霆并施張弛競練俱化地方安且肅若士女歌還穆如乃抗節臨膠遽罹逆變孤忠自信不折百回慷慨捐軀血誠報國平原睢陽曷多讓焉其推官李煌署篆膠城苦心撫字拮据兵餉士馬飽騰一旦爲賊所猜身嬰白刃甘死守土誓志靡他此二官者生無愧於君父死有光於史書所當照例請賜褒卹以慰忠魂者也等因詳道據此該本道右叅政田起龍看得原任徐守憲冰操久凜風烈素昭嚴左道之誅民歸正業毓綠林之魄功在人心惶悌與歌保障著頌雖變生叵測惟知朝廷恩重故視死如歸遂使節義常存推官李煌職司咎縣（疑誤）心懷平恕寧失出無失入仁歌京兆罪疑輕功疑重獄頌蘇公矢君恩以靡貳遂援命於見危肝腦雖裂叱咤如轟此兩官者慷慨殉難視死如歸真從容就義殺身成名者所當據實上聞照例題恤以勵臣節者也等因到司准此該本司左布政使陳極新看得原任萊守道徐大用前因奉文調撥海逆官兵南征屢驅不前是以該道臨膠彈壓苦心撫勸芻餉供億策備拮据不料海逆素無紀律倏然譟變而該道挺軀嘗賊仗義不屈遭傷而殞故有同與署膠事務推官李煌譟變難以堵拒賊勢難支挺立州堂指賊罵聲不絕即時二官皆被賊刃同傷死於疆場眞所謂急公殉難情實

慘憫而又復經道府確議無異呈詳前來請賜褒卹以慰忠魂者也等因呈詳到院蒙批仰候會題行繳仍速詳總督部院批示另報蒙此隨具詳呈蒙總督李部院詳批仰候撫院會題行繳等因詳批到司蒙此擬合呈報等因呈詳到職該職看得忠臣義士正氣長存於天地奇節高風公論幸在乎人心副使徐大用執法維堅操守特慎忽遭海逆之變事出意外忠實在心正色觸奸惟申以國家之大義詈言罵賊遑恤夫血肉之微軀視死如歸丹衷可挹推官李煌以一代庖之官遂當鼎沸之難清慎既聞於前績忠貞更見乎危途慷慨就義氣可通天臨危不辱精能貫日此二臣者孤忠自許雙節堪旌勒名碑石能令俠骨饒有餘香榮傳簪筆可使九原復存生氣所當恩卹後裔表揚前烈者也既經該司呈詳前來職謹會同督臣李蔭祖合詞具題伏乞皇上勅下該部議覆施行爲此除具題外理合具揭須至揭帖者右具揭帖順治拾壹年玖月日

直隸山東河南總督李鴻章

□□總督直隸山東河南等處軍務兼理糧餉兵部尚書兼都察院右副都御史李爲膠逆蕩平善後宜周謹陳更移鎮將事宜仰請聖裁事順治拾壹年肆月貳拾陸日准兵部咨職方司案呈奉本部送兵科抄出該本部覆直省總督馬光輝題前事等因奉聖旨該部速議具奏欽此欽遵抄出到部該臣等看得督臣馬光輝疏稱裁去膠州一鎮歸并臨沂州兩鎮籌畫詳明應從所請至於沂州鎮臣張大治移駐萊州臨清鎮臣范瑯移駐兗州查兩鎮兵丁家口安插已久內多本地土著之人所領糧餉僅足餬口若令其拋舍屋宇墳墓遷徙於數百里之外兵必稱苦及至萊兗兩府地方勢必建造衙門添設公館占奪民房又多一番擾累臣部再四酌量兩鎮舊駐地方不必更移惟分沂州壹營以防膠州海口應如督臣之議其餘營制及分防汛地應請勅下督臣會同河臣楊方與山東撫臣查照通省州縣河漕營堡某衝某緩均勻酌派另疏奏聞以憑核覆至於動支銀兩置買缺額馬匹盜甲事隸戶部應勅戶部議覆者也等因順治拾壹年叁月貳拾叁日奉聖旨是俱依議行欽此欽遵備咨到職准此隨移會總督河臣山東撫臣並轉行司道均勻酌派及屢催去後今於順治拾壹年拾月拾柒日據山東布政使陳極新呈詳察看得東省連年土寇相繼授首膠兵譟叛業已蕩平雖曰平復然而意外之變反側之虞猶難期必未雨先繆誠爲至計故當事者乃就地方起見確議善後之策本司凜奉憲行察東省重地河道海口爲衝州縣要害處所次之除海口奉旨准發沂兵壹千防守外至於河道漕運所係地方要害安危攸關非兵無以彈壓切思兵丁向有沂臨膠叁鎮分有汛地鼎足防護客歲膠兵譟變奉旨裁革止有沂臨貳鎮前蒙總督部院馬尚書咨部內開派有州縣汛地部覆令察營堡酌派均勻合無

照臨沂貳鎮駐劄處所議將山東壹百肆州縣東北西南調角平分州縣於某鎮相近分於某鎮統轄至河道營堡并州縣險要處所在於某鎮所轄責在某鎮料理庶稱均勻而護漕防守獲保萬全謹將臨沂貳鎮分轄通省州縣營堡汛地均派衝緩逐一造冊呈詳到職復核無異該職看得山東一省原設有臨沂膠叁鎮官兵分汛彈壓客歲因海逆謀叛膠州壹鎮營伍盡廢復整爲艱前督臣馬光輝疏裁膠鎮不設議將叁鎮之分轄歸併臨沂兩鎮復慮膠海單虛分發沂鎮壹營以扼海口部覆已奉俞旨赴膠官兵姓名日期職已會同撫臣咨報兵部訖惟有兩鎮分汛衝緩均勻行職等查明酌派職准部咨備行確議惟期分轄無偏庶幾責成均當察東省陸府屬計壹百零肆州縣臨沂貳鎮合應照數平分臨鎮應分濟南府屬歷城章丘鄒平淄川長清新城齊東齊河濟陽禹城臨邑長山肥城青城陵縣德州德平平原武定州陽信海豐樂陵商河濱州利津霑化蒲臺泰安州兗州府屬平陰東阿東平州汶上陽穀壽張東昌府屬聊城堂邑在平博平清平莘縣冠縣臨清州丘縣館陶高唐州恩縣夏津濮州武城范縣觀城朝城等處沂鎮應分濟南府屬新泰萊蕪兗州府屬滋陽曲阜寧陽鄒縣泗水滕縣嶧縣金鄉魚臺城武曹州曹縣單縣定陶濟寧州嘉祥鉅野鄆城沂州郟城費縣青州府屬益都臨淄博興高苑樂安壽光昌樂臨朐安丘諸城蒙陰莒州沂水日照萊州府屬掖縣平度州昌邑濰縣膠州高密卽墨登州府屬蓬萊黃縣福山棲霞招遠萊陽寧海州文登等處以上貳鎮各分轄伍拾貳州縣并河漕營堡險要處所各照所分責令貳鎮料理其分撥兵數不便瑣贅逐一備細造冊咨送兵部外再照膠海一派南達江淮北接登津形勢最屬險要封疆大事制宜貴在審時如今歲賊帆突揚京口是又持籌者不及料也鑒彼思此有備斯稱無患非量設戰線恐陸卒猶難盡恃容職等查確另疏條奏職謹會同河臣楊方輿撫

臣耿焯合詞具題伏乞睿鑒勅部議覆行職等遵奉施行爲此除具題外理合具揭須至揭帖者順治拾壹年拾壹月
日

Faint vertical text columns, likely bleed-through from the reverse side of the page. The text is illegible due to low contrast and fading.

定南王下死難各官情由殘揭帖

(上缺)一人應勅下該督撫及提督線國安確查當日各官死難情由並職名及有無嫡親子弟具題以憑臣部察核議覆可也恭候命下遵奉施行等因順治拾壹年捌月拾捌日奉聖旨依議行欽此欽遵抄部送司案呈到部擬合移咨煩照本部覆奉旨內事理欽遵查照施行等因又准兩廣督臣李率泰咨准兵部咨同前事移會內開煩爲查確賜覆會題等因各到職俱經備云咨移提督伯右翼鎮管轄定南王下官兵蝦各一體查照部咨奉旨事理即將九年賊陷會城當日隨定南王下死難各官情由並職名及有無嫡親子弟并有無通賊投賊各官姓名逐一查確開列明白移復以憑覆覈咨覆會題又牌行布按二司即查玖年逆賊陷城隨定南王在城各文官有無死難殉節通賊投賊情由將各職名及有無嫡親子弟逐一查確詳報並行職標署中軍新太參將張可用確查前任中軍李光前旗鼓暢大里當日城陷如何死故情由具報各去後拾貳月拾捌日又准兵部催咨單開一件闔門殉節等事除曹盛祖一案外又有原定南王下二等阿思哈哈番孫龍第孫麟呈爲懇憐伯侄兄弟陣亡俯准承襲等事內稱有兄孫龍領兵守禦全州致遭賊害侄孫延世賊逼省城被賊殺死又侄孫延運不知下落存亡未審例應優卹承襲緣由又據定南王下已故阿思哈哈番胡萬明嫡長男胡光裕呈爲懇恩襲職事內稱父胡萬明係阿思哈哈番柒年病故遺命令伊弟光先襲替吏部查換勅書在案後經桂林之變光先不知存亡請討替襲緣由各到部查俱係定南王下之官應併行該督撫提督查回一併議奏等因復經移催線提督確查速覆拾貳月貳拾捌日准提督伯臣線國安手本內開節准本部院咨前事准此隨奉兵部劄付亦同前事緣由劄行在案本督鎮看得隨王死難各官及有無嫡親子弟彼時玖年

柒月遭變之際本督鎮駐鎮南寧相隔寫遠無憑查核又以多官俱屬王旗下之職官本督鎮難以遙度隨移行管兵蝦李茹春遵照部咨行來事理確查移覆隨據本蝦移覆前事稱順治玖年會城告陷本府先奉差江南公幹一應事實遠不能知及隨大兵至衡幸見郡主始知顛末今據通旗官兵供稱狡逆李定國開寶郡一空星夜間道突入桂林而發援湖南之師已成中斷之勢先王知其兵單力絀孤城莫保回宮自焚一時火焰燭天人人自危咸知先王已殉國矣城內義士節婦相繼而慷慨輕生者甚多城下之時官兵有與賊巷戰而死者有與賊對敵被其所執而不殺者有帶至湖南而殺者有解至貴州而凌剝者他如全州雙橋嚴關皆我師陣亡之地此各官死難之由也若夫官兵不忍悖皇上之恩力奔還國被執而殺與廕襲子弟之不知下落者又不知凡幾矣至有無通賊投賊獻印之說天日在上公道在人有一於此即不共戴天之仇患難餘生寧不爭啖其肉而肯容隱不舉者乎此衆耳衆目共所見聞之事使其有焉彼且畏人之知終身隨賊而暫圖一日之生矣誰願棄生路而就死地也等情據此仍再四公詢反覆密察通旗官兵同詞無異除將查明死難各官職名并阿思哈哈番唐倫開報有無嫡親子弟姓名備開清冊移送請煩查報施行等因到鎮本督鎮細閱來冊開列甚明如曹盛祖之死難本支無人替襲應及於伊叔曹義先此經靖南王題明在案似無容再爲查議者至於孫麟之告替襲孫龍世職據李蝦冊開孫龍有子延齡則替襲應及於其子矣又胡光裕之告替襲伊弟光先今據李蝦冊載內開光先不知去向未明註其死亡合應俟後日之有無確信再議替襲亦未爲晚此皆係王旗衆官會議者也再准李蝦手本爲移明不知去向官員事內開案照本旗死難各官已荷恩勅部行查是九天之雨露亦旣澤及忠臣之骨矣所有不知去向各官及廕襲子弟雖存亡未可同論而與難則一所遺子

弟相應一併開報致應否仰邀一視之仁達部請襲與或再爲守候本府未敢擅專又當移送裁奪併冊壹本請煩查照等因據此除將貳冊註案外合照開列移送查覈會題擬合移覆等因□准右翼鎮臣全節手本移覆前事內稱該本鎮查得玖年賊陷會城本鎮時出征慶遠定南王下在省殉難各官及有無通賊投賊各官本鎮相隔篤遠不敢臆臚混報有係蒞王旗者應聽蝦管包牛泉事查覆有係提督應聽提督鎮查覆至於右翼標員此係本鎮職守所關應當一一查明具移者也如本標死難官左營副將管遊擊壹員何九成原奉題柳慶副將玖年柒月奉調赴梧沿途與賊鏖戰過傷近梧病故嫡子何自揚現存後營副將管遊擊事壹員沈邦清奉題羅河副將管參將事玖年柒月逆賊陷省土賊因攻羅城本官突圍陣亡其子在省亦被賊害並無親弟在粵後營都司僉書管中軍守備事一員張順玖年柒月城守桂林城陷被殺嫡子張應仁現存後營署守備管千總事一員李養成玖年柒月沙鞏陣亡無親族在粵嫡親子弟不知有無後營署守備管千總事一員周雄玖年柒月沙鞏陣亡子弟不知有無後營把總一員張志雄玖年柒月羅城陣亡子弟不知有無至於逆賊入粵本翼標員原無通賊情由所有投賊各官本鎮疏報右營副將管遊擊事鄭元勳左道投逆於拾壹年伍月帶兵回營屢呈年老被挾等情已經經略院部總督部院及貴部院再四行查報明在案有投賊各官尙在賊營者中軍遊擊一員蔡斌右營中軍守備一員王經世右營署守備管千總事一員梁應龍中營中軍守備一員李耀龍甘心投逆尙未回營至於力窮勢迫不得已被賊裹陷者本鎮已具冊呈報內部在案無俟再陳今准前因相應移覆等因到職已經咨移兵部訖續又據布政司回稱依經移行道府及管兵蝦查復今准桂平守道查得玖年賊陷省城盡執各文官將王按院解赴貴州以至殉節至於通賊投賊未聞有人等因又准管

兵蝦移稱玖年賊陷桂林文官概執發監獨以巡按御史王荃可署布政事張星光解至貴州死節至有無嫡親子弟本府不得而知若夫通賊投賊之事詢之通旗實未聞有此事等因移道復司相應轉報又據署職標中軍新太恭將張可用呈稱依奉行查隨據原撫標千總馬以全百總郎太管隊楊天相等夜役李進忠等回稱前任中軍李光前於玖年柒月貳拾捌日在於院前民房病故存有家眷四口係管家徐庫於玖年捌月內帶回北京旗鼓暢大里於玖年柒月初肆日在於南門對敵巷戰當場陣亡其家眷在衙盡行吊死骨骸係管家李喜於拾壹年陸月內帶回北京等情據此理合回報等因各詳報到職俱經批行在案隨又准兵部咨為請定優卹之例以彰勸忠之典事內開該本部覆提督廣西總兵官總國安題前事等因查廣西死難各官先經巡撫陳維新密題為詳查失陷緣由一疏內開在城被難殉節各官有無投賊獻印情由查確再報奉旨在案今該提督所請優卹各官應勅下該督撫確查當日死難情由及有無嫡親子弟明白具題以憑臣部察核議覆可也順治拾壹年拾壹月貳拾壹日具題奉旨依議行欽此欽遵咨移到職就據按察司詳稱奉兩廣總督部院李案驗前事行司移桂林巡道確查隨准回稱查得請卹陣亡副將何九成等各官死難有無嫡親子弟開列甚周無庸異議移覆過司合就詳報等情據此該職查看得順治玖年柒月初肆日逆賊李定國陷城職於拾年陸月到任具有詳查失陷緣由一疏內稱在城各官被難殉節有無投賊獻印容查確另奏等因緣係密題未奉有旨抄傳亦未准有部咨到職今准兵部以闔門殉節等事移咨到職始知奉有俞旨職即移行鎮蝦司道嚴查確報節據回復咸稱並無其人除文職殉難死節有無投賊獻印另本覆奏外查管兵蝦李茹春所云本旗並無投賊之人職查訪得二等阿思哈哈番王允成當逆賊圍城之日射箭傳書於賊登陣示路城破撥

賊保護其家今見隨賊營中此獨非共見共聞者乎其云不知着落多人若舉王允成一論之或皆從賊而去矣使其有焉終身隨賊二語蓋亦莫之能掩耳至若副將鄭元勳鎮臣全節稱其左道投逆今復准該鎮移稱恢永守城功次除另題請旨外他如殺賊陣亡忠勇各官王旗則法一丹你大李養性等武職則副將張士舉何九成職漂旗鼓暢大里等均有殺賊捐軀之念凜凜忠魂可（下缺）

（此處為極淡之文字，內容難以辨識，可能為研究或校勘之內容）

廣東德慶開建州縣等官棄城案殘件

(上缺)西至東所過州縣非止壹處月雖未捐軀殉國罪固難辭然已護印全忠情猶可憫等情又開建縣典史李多聞呈爲懇恩垂原超豁事各赴府投遞致蒙肇慶府知府張之璧審看得德慶開建毗連而居開建之西則爲懷賀其中止隔一潤溪耳貳治僻處層巒素稱梗化卽我師克粵之後錢糧尙未全徵去春滇逆作叛侵犯肇城蹂躪肇屬者皆由土賊羅錦鼎等先爲嚮應故開建德慶不旬日而被陷肇城旬月而被困也今審德慶知州饒崇秩開建知縣李月與吏目成聲典史李多聞此數官者按□□□望風棄城之罪法不當恕但斯時賊勢□□□心攜貳內無堅城可守外無糧餉可繼與其捐生而失印曷若暫避而保全際此危鋒誠難措手况分防各將密奉兩藩曾有相機護印之諭揆諸各官情狀似又不可以不固守之律論也惟饒崇秩李月經奉嚴旨革職成聲李多聞另提奏議恐難槩徵寬典合無請照兩藩開釋之令議將委署知縣李月吏目成聲典史李多聞戴罪降調其知州饒崇秩新任數日卽罹重禍迨賊退之後招撫有功此一官者又當矜恤以收桑榆後效者也具由於拾壹年正月拾柒日解詳按察司詳審蒙批據詳德慶□□□連懷賀逆寇鳴張土賊嚮應州縣城守□□□繼淪陷各官相機護印情似可原然封疆失守無所逃責况奉旨提問究擬國法凜然卽遵兩藩開釋之令亦應按律成招聽候部議奏請裁決非承問者敢輕議也仰府將饒崇秩李月失事情形細加詳鞫有無奉有王令離城確招具詳覆核解詳督撫部院會題定奪至吏目成聲稱解糧到府應有倉收月日可查典史李多聞亦稱赴府補按院考察應有該府起送案稿可據一併查明具詳以憑轉詳具奏另議蒙□□□據吏目成聲典史李多聞到官蒙肇慶府知府張之璧覆查看得德慶州吏目成聲開建縣

典史李多聞俱以失守被劾奉旨嚴查昨據貳官一以解糧公出一以考察未回互相起釁呈報在案今蒙批仰確查隨查得成聲果於拾年叁月拾叁日因解穀里長黎華芳聞警棄船該州就日責其押船代解赴府見有該州續報文書及經收倉官范紹烈給有叁月貳拾貳實收本官解到穀叁百零伍石倉收存據又李多聞原係留守城池官員亦於拾年貳月初柒日來府查經卑府貳月初捌日給文送赴補考見□□□□房均非誣也緣由具由於拾壹年肆□□□日呈詳按察司蒙批據詳成聲解糧公出但德慶州報文范紹烈給有叁月貳拾貳實收今在何處卽備抄繳司察閱李多聞貳月初柒到府初捌日送考開建失城係何月日有無逗遛規避別情一併查確速詳批發回府蒙府復喚崇秩與李月各到官又蒙肇慶府知府張之璧覆審得德慶州知州饒崇秩開建知縣李月去年叁月內各以西賊壓境相次離城護印入肇兩審其由皆供斗大頽城難制數萬之衆且賊前哨犯城俱經血戰開建丁把總未及上船已爲此賊陣殺德慶王副將爭先禦敵又經投□□□秩之與月斯時皆漏刃登舟竝非開風□□□詢有無王令密諭相機護印又據合口供稱王諭者諭王謝二將也諭帖已爲王副將溺失惟崇秩續啓王批見存若責貳官以不死貳官不死者罪也苟貳官已死其印必如廣寧四會貳縣已爲逆賊所有矣再查開建德慶貳治原在西粵之衝城內果無居民可守所怪貳官旣聞此諭離城之日當以此諭報明庶免巡方糾劾夫何偃蹇糊塗不顧自羅失守之科乎姑念貳官復任崇秩則有單騎戡亂招撫金林等寨其功可贖李月亦有勞瘁百般其情可憫合各量擬壹杖聽候覆議定奪蒙將崇秩與李月□□□不應杖罪具招於拾壹年肆月貳拾壹□□□按察司復蒙司批德慶開建州縣相繼淪陷司土各官難逃失守之律饒崇秩李月僅擬一杖殊屬未協且崇秩供稱王諭係諭王謝貳將然查招內德慶

則有副將王成義開建則有守備馮國用千總曹鳳才把總丁宰姓謝一將竝無其人又云諭帖爲王副將溺失惟崇秩續啓王批見存不知此批云何亦無聲說又崇秩招稱王成義奉有王諭又無開明奉到日月至於李月亦稱遵照王諭護印登舟此諭竟不明白叙入未便招覆仰府再將饒崇秩李月當日失事情形細加覆確與奉王諭及□建□□□叙入招內按律擬議確招解詳以憑覆□□□部院會題定奪事干欽案萬勿含糊致駁不便批發回府蒙喚崇秩李月審問崇秩具詞爲懇察前審州縣口供分別賜詳事稱城池一案前蒙審鞫問當日王諭原由崇秩供稱領諭令者同城已死之副將王成義崇秩當日新任赴省謁王院回州在拾年叁月初拾夜維時界連粵西之懷賀貳縣及同屬之開建已失地方警息頻報拾貳日有王諭付王副將內云如賊果薄城即相機護印入肇以固根本崇秩與王副將猶堅守不懈及拾叁夜賊大隊逼□□□防兵何濟於事因遵諭登舟王副將被□□□突逼水身死崇秩斬纜全印前諭雖失崇秩續具請兵啓蒙王諭云儻遇有大寇警息逼近仰即相機上船護印保全批啓號印見存乞恩據實叙入招詳等情連將崇秩原於拾年拾月初伍日具啓爲請明危地情形事竊惟在外封疆自應先省而府而州前聞西警奉令將李副將掣回肇府此兩王固本勝算也但兩王以肇府爲根本然德慶於饒崇秩實非枝葉且州治毗連西省懷賀與本省開建現係賊踞以百名防兵守倍府之寬城官兵且不時風鶴又何怪乎驚魂未定之士民移竄無常錢糧不納□□□警饒崇秩守則無兵出戰不可欲請□□□無及坐以待斃情有不甘在兩王雖有德慶一州二縣難守之諭然在饒崇秩近未奉行合應啓說明白儻賊突犯衆寡不敵使饒崇秩端坐州堂挾印殉身不（選）必有補封疆乎抑護全州印與在州兵馬量敵而進相機以動乎或添兵還將以固吾圉爲郡城守門戶之爲上策乎

統候批示遵行饒崇秩決不敢模糊遇警徒死及不死以賈罪也啓奉平南王批據啓城大兵少惟在該州身先激勵
防守城池以盡職守儻遇有大寇警息逼近仰卽相機上船護印保全此繳啓文壹道赴肇慶府投遞又李月具□□

□□謝繼元順治玖年鎮守開建（下缺）

（The following text is extremely faint and largely illegible due to fading and bleed-through from the reverse side of the page. It appears to be a series of vertical columns of text, likely a continuation of the historical record or a list of names and titles.)

王道真自稱天啓太子案殘件

(上缺)紅簿挨拏前項同謀造反之人獲解正法以靖地方今將搜獲同謀造反投狀稟啓捌紙一併齎送本鎮未敢擅便爲此合用手本前去煩請查照移送李天智等願狀名諱就近質審彭三陽王道真劉性德等將文內有名人犯某係某州縣人籍貫住址某處希行道府嚴令該州縣逐一挨拏務獲正身無遺一擊流毒地方等因并移送李天智等投詞稟狀捌紙到院備牌仰司官吏即將王道真等嚴加訊審取供真情仍密訊續報彭三陽家牆壁內搜獲投詞有名李天智等同謀實情如有住址籍貫者再加確審明白如無籍貫者須詳訊各年貌籍貫住址的確嚴行密拏一併究擬速詳呈報以憑具題勿得波及無辜速速等因併發僞劄供詞驚啓稟帖壹封共拾叁紙木印圖書大小陸箇草字肆軸到司蒙此遵照提審間貳月貳拾玖日又蒙本院在公所面諭本司公同左布政使黃紀分守關內道叅議呂逢春併滿洲肆旗審事各章京會審遵卽同至羈絆處所審據王道真供我卽朱應龍本名慈熾是天啓東宮太子辛酉年劉妃生今年叁拾肆歲了當日教我的是翰林學士雷同係浙江人奶母宋氏我皇叔崇禎坐了將我曾囚禁冷宮自李自成剋陷北京我孤身逃走出家遊方誦念經典先至山東地方又到山西五臺山及湖廣武當山俱住歇庵觀寺院並不記得年月日期後又到南海普陀山回來遊至陝西寧夏地方復到平涼府隆德縣孫家山下約有半年了亦記不得到那裏的日子其時常結交俱是喫齋善人因喫了酒對劉性德錯說了話惹下這禍大小圖書原是我寫草字用他爲記不是假印這一千人都是行善居士因同我在三教佛堂答醮緣簿上有名被牽連了本司復公訊這胡國泰劄付可是你與的否李天智等投詞可是你標的否據供劄付我不知情投狀原是我標的其有名之

人我俱不知他居址原無謀反之事又訊這肆軸草字可是你寫的否據供是我所寫隨給與紙筆即隨手草寫兩句云上有青天爲作證自己失言喪殘生再加研訊惟稱前後俱是實情我寫的啓本卽是我的供語老先生們何必細問反覆詰之竟置不應等情又據彭三陽供小的原是平涼韓府宗室本名朱謨黔小的外祖家姓彭自李賊來陝西就改名彭三陽學道修行種地度日小的前到辛家峽遇見王道真說是天啓太子隨請至草峯原三教堂供養衆人燒香聚會喫齋答醮是實並無謀反的事其劄付乞問劉性德便知端的又訊你可認得投詞內有名人否據供沈天才是箇瞎子朱月樓柴拾多歲了都是喫齋善士明淨是箇女僧俱見在平涼住其餘我都不認識等情又據劉性德供稱我是平涼宗室本名朱朗鏞今年貳拾柒歲了因父母蚤亡出家爲道誦經度日前到草峯原三教堂遇見王道真說起同道問及出家根由小的說是宗室他說是天啓太子遂在一處常相往來有李總鎮家丁胡國泰素日與小的相厚因喫了酒原把朱應龍是太子的話說與他他就詰問小的欲要求見先與小的拜了弟兄小的就寫了張劄付給他誰料他就害了我們這劄付硃紅原是小的標的鸞帖都是我扶的其投詞內人我俱□知他住址等情又據武寅供小的家下有捌拾歲的父親平素念經行善止知王道真是出家道人不曉得是太子不是亦不曾與他同謀不想拏住他將小的牽連等情又據武印秀供小的原在崆峒山靜坐修行今年正月內王道真來到靜室中住了拾日說是道家朋友小的愚人怎曉得他是太子等情據此該本司細閱投詞稟啓內人犯既列有姓名必非遠方之人料係左右人氏隨卽選差的役持文密行關西道設法嚴拏務獲正身不得波及無辜獲日另行究報外該本司會看得律莫重於逆叛法莫嚴於邪教何物妖魔朱應龍假借明宗號愚弄山野頑民儼然以東宮自任稱孤道寡而不

屈殊不思天啓告殂崇禎紹統豈不傳於子而傳於弟哉揆理度情非流蕩匪類盜藉名姓卽狡詐姦徒煽惑人心且彭三陽劉性德以韓府宗裔比姦附和共謀作孽非給劄以招搖則受投以結納叛形固已彰著使非胡四舉首之蚤李鎮擒擊之速則禍延地方將有不可測者矣武寅武印秀乃鄉野蠢氓同惡共濟或透露消息或互相容隱雖強項狡飾希圖倖脫然知情故縱法亦難道均當明正典刑以爲蓄謀不軌者戒也至投詞有名餘擊訊之姦犯咸供不知反覆詰問昂然不理難以追究應俟該道躡緝獲日另究所有審過口供相應呈報等因到臣因各犯家屬財產未明復行按察司確審去後本月初五日據該司呈稱依蒙隨會同滿洲審事各章京同至羈絆王道真等處所逐一覆審據王道真供稱我實係天啓東宮太子自李賊剋京時獨自壹個逃出隱姓埋名遊山修行那裏有父母妻子家產止有隨身所帶鋪團壹箇絨氈壹條花緞被壹床青布道袍壹件藍布道袍壹件舊紅氈壹條被包壹箇伏巾壹件白包袱壹件眼罩壹件布手巾壹件絨巾壹頂繡龍護膝壹雙牙梳籠牙刷抿掠等物并原騎黑桐色叫驢壹頭俱被李總鎮官兵搜獲了再訊有無同謀之人據供我原不曾謀反那有同謀之人時常與我往來的俱是壹夥善友並不記得姓名等情又據彭三陽供我是韓府宗室明朝雖有家業俱被李自成搶掠無遺祖父父母亦皆亡故有壹哥已死肆年了妻張氏亦於今年貳月初柒日死了家中止有黑叫驢壹頭被李總兵官兵擄去原佃種別人田土度日並無家產等情又據劉性德供稱我是明朝壹個窮宗李賊亂時我父母俱都死了止有我隻身壹人出家修行並無兄弟妻子家產及同居之人等情又據武印秀供稱小的父母蚤亡並無弟兄妻子我獨自在崆峒山靜坐修行亦無財產有伯父武得戶伯叔兄武寅各自另居等情又據武寅供稱小的母親蚤亡止有父親武得戶今年捌拾多歲了喫齋念

佛小的有妻張氏生有壹歲兒子再無叔侄弟兄家有大小牛肆隻驢叁頭羊拾隻亦被李總鎮兵馬拏去我住的是土窩種的別人田地並無產業等情據此看得王道真等謀逆之情前詳已悉無容再贅惟因各犯家屬財產未明致蒙憲駁本司遵照票示會同滿洲章京同詣羈所再四研訊反覆追究據各犯所供情雖如是誠難信其一面所當再行關西道就近確查有無隱情並李總鎮兵丁所獲前項牛驢羊隻衣物等件是否的確再爲呈報再照本司接據平涼府縣塘報內列有賀道士陳道士唐居士蘇石匠張應才併子張汝良名諱似皆比匪之徒但查原報云有賀陳武道未見的確張汝良蘇石匠密首引拏等語及訊叁逆亦稱皆係善士當經彼處鎮道審釋所當併行該道確審有無知情共謀是否引兵拏首與原牌有名華亭縣見監隱匿窩主吳仲海任雨及未獲各犯一併究結可也所有覆審口供相應呈報統候憲裁具題等因據此該臣會同提督臣傅夸蟾王一正逐一覆審王道真等所供與前無異看得王道真卽朱應龍自稱天啓太子煽惑鄉愚以致彭三陽卽朱謨黔劉性德卽朱朗鑑附和作姦謀爲不軌若非發覺之蚤流毒地方可勝道哉武印秀武寅通同窩隱均屬黨類所當一併正法以昭國憲除投詞內有名餘孽李天智等賀道士等嚴拏獲日同已獲之吳仲海任雨對審明白并各犯頭畜衣物查確另結華亭縣知縣修希堯并生員阻兵情由已行該道嚴查僞劄鸞帖草字木印圖書投狀啓本等項咨送刑部外相應具題或將王道真等伍犯解京發落或別賜定奪非臣所敢專也伏乞□部議覆行臣遵奉施行緣係恭報拏獲謀反逆孽（下缺）

江西永新等縣失陷案殘件

(上缺)吉安營查報去後催據安福(缺七字)張曾顯一旅奉調策應永寧永新安福至□□侵犯張曾顯一師被圍竟縛楚地餘把總何勇陸孔及畢周貳弁自寇犯之後從無經縣無憑可稽理合回報又准吉安營回稱案查安福失陷事則提標後營遊擊張曾顯同中軍羅士彪皆被賊執去後士彪從賊營逃回則張曾顯下落彼必知之至於永新則係守備米富玉把總張湖同提標後營千總畢汝正把總周鳳位永寧則提標後營把總陸孔及本營把總何勇本府先經奉劉提督行提失守官弁遂將把總何勇解省羈候後復奉本提督令牌併准巡西道移會奉旨著何勇等戴罪剿賊已將何勇見羈在營米富玉亦經巡道羈候在府把總張湖當被賊執去並無下落至於逃回中軍羅士彪及千總畢汝正把總陸孔周鳳位皆係提督標營下官弁其見羈何處非本府所得而問也合就移覆各等因准此該署府事通判陳誠心查得遊擊張曾顯與中軍羅士彪防守安福貳弁被賊執去士彪逃回則曾顯下落士彪必知之確矣吉安營把總何勇原防永寧失守見羈吉營陸孔原屬提標營下畢周貳弁之名卽汝正鳳位也亦係提標永新之失城武職卽永新營守備米富玉也見羈在府該營把總張湖亦被賊擄竟無下落今奉行查合就據實回報等因到道據此該本道僉事鮑開茂查得提標後營遊擊張曾顯中軍守備羅士彪原駐安福把總陸孔何勇係防永寧千總畢汝正把總周鳳位貼禦永新此各派汛地也後以楚賊大隊突來先破永新次陷安福而張曾顯與羅士彪全軍被圍盡爲賊執去今士彪久已逃回張將下落彼必悉知何勇係吉營把總見在羈留隨征餘弁皆係提督標員伏祈就便移查可耳永新縣營守備米富玉見羈在府把總張湖據報亦被賊擄竟無下落照准前因相應移覆等因到司准此當

經本司查得中軍羅士彪及把總陸孔周鳳位等既係提督標弁相應就近移查又復備移於閏陸月初貳日前去劉提督希卽細訊羅士彪當日張曾顯同被執去之時作何情狀厥後有無下落并陸孔畢汝正周鳳位各弁見在何處隨征祈賜晰覆以便轉詳去後拾年捌月初柒日准劉提督手本前事准此柒月初貳日據署提標後營遊擊事黃九疇呈稱遵將把總陸孔羈候本營取有本營千把總收管在案等情又於柒月貳拾叁日據吉安營叅將羅映台呈稱把總何勇仍暫羈候本營隨征辦賊等情又據原署提標左營中軍守備事羅士彪結稱遵奉憲查遊擊張曾顯失守存亡下落等因蒙此竊會顯於順治玖年拾壹月初肆日失陷安福彪同被執押解至衡州府監禁於拾壹月貳拾貳日被僞王將會顯綁出斬訖復將彪發解貴州幸仗王師剿潰逆賊於拾壹月貳拾陸日晚彪乘機得脫奔至衡州投見王爺蒙發回營會顯並無存留情節其把總周鳳位當日未同彪解不知下落中間不敢冒報所結是實等情捌月初肆日又據署提標後營遊擊黃九疇呈稱遵奉前因該卑職轉行中軍孫肇武查報去後今據本官回稱據兵丁張其德供稱小的於本年肆月內從寶慶自賊營逃出投在滿洲白旗下又於伍月內同沈國公人打糧聞得說你後營將官在衡州被賊剿了並不知日期亦係聞得說小的聽見逃回投見卑職轉解赴本提督蒙問據實回稟但不知真與不真小的未見的實供稱到職卑職又查得去年拾貳月貳拾陸日據逃回管隊兵丁史得勝趙天才等背回張遊擊骸骨卑職卽問及骸骨從何而得據史得勝等回稱小的等自賊營逃出投在滿洲各旗下後總發與湖廣柯提督收養聞得張遊擊於拾壹月貳拾貳日被賊殺在衡州城內僞王子門首將尸首拉出城北河沿小的等念其舊主之恩拾貳月初伍日隨稟明柯提督至河沿尋著屍首砍死頭尙未落用柴燒化小的等背負於初陸日蒙柯提督賞給公

文發赴江省將骸骨交付親弟張曾榮並親男張就正收殮卑職前已呈報外今蒙行查張其德稟稱被剽情形遂將前後貳役情由理合回報等情據此該本提督看得永新安福永寧叁縣失守一事官兵陷賊者頗多陸續逃回兵丁所報情形語言不一獨原署標左營中軍羅士彪自賊營逃回供吐近真而遊擊張曾顯爲賊所殺士彪之結似夫有所確據也吉安營把總何勇提標後營把總陸孔行各營將羈候均稱見羈本營至畢周貳弁畢係提標後營千總畢汝正見今保候仍在本營周係提標後營把總周鳳位陷賊之後未有下落今准前因相應移覆等因到司准此該本司按察使李長春看得永新等縣失守武弁一案提標後營遊擊張曾顯始同中軍羅士彪俱於安福失陷之時被賊執去繼惟士彪壹人脫回今准提督移會開據士彪稱曾顯於舊拾壹月貳拾貳日已遭僞王斬訖旋有逃回兵目史得勝趙天才等背回骸骨交付親男張就正收殮則曾顯之死於賊鋒似乎歷歷有據也吉安營把總何勇提標後營把總陸孔駐防永寧賊至棄汛而遁今何勇羈留吉營陸孔羈留提標後營業經兩將取有收管在卷至畢周貳弁一係提標後營千總畢汝正一係提標後營把總周鳳位均禦永新陷賊之後惟畢汝正見存保候其周鳳位則存亡未審者也已上數弁先准巡西道關復前來又經轉移提督確查無異合就據實回報等因到部院據此爲照江右界聯楚地者無如吉安之永新安福龍泉永寧肆邑爲最近之區自去冬西賊猖狂土寇乘機勾引飄突而至一時貼防將弁相繼淪逃律以失守之罪奚辭此貴部院之所以合詞具奏不少寬假也復准部覆有詳察具奏之旨其難其慎益宜凜遵安敢不逐一確查以覆明旨乎今催據該司呈稱提標遊擊張曾顯之有無下落也當時同被縛去原署提標左營中軍守備羅士彪自楚逃回供稱於拾壹月貳拾貳日已被僞王在衡州府將會顯綁出斬訖復據兵丁史得勝

趙天才等尋覓屍骸燒化背負而歸親交其子就正收埋是張曾顯之被戮於賊鑿鑿矣把總陸孔何勇一係提標一係吉營同有永寧防守之責及聞賊至棄汛而逃當其歸營之日卽已羈留聽候發落復於貳月貳拾肆日接准部文一件僞逆賊復破永寧龍泉相繼失陷等事奉有陸孔何勇戴罪剿賊事平另議之旨復令隨征辦賊見今貳弁俱在本營並無他往也畢周二弁汝正鳳位係其的名俱屬提標千把總原派貼防永新自該縣城失之後惟汝正逃回見存保候其周鳳位則亦存亡未審此皆考之湖西失事之地而又察之本營鎮將之推求諒無疑情隱跡於其間耳至應作何處分悉聽部裁議覆可也既經該司呈詳前來該本部院覆核無異擬合咨覆等因到臣准此該臣看得前冬楚寇鴟張潰犯湖西一時遐邇風鶴永安龍寧肆縣相繼淪陷皆因官弁全無固志倡率奔逃臣先經具疏題參續經部覆查遊擊張曾顯有無下落把總何勇陸孔棄城偷生見在何處畢周貳弁護印逃出的係何名臣移該撫臣就近確查今准咨覆查遊擊張曾顯向因調防安福城陷被擒已遭賊殺其把總何勇陸孔原防永寧見賊焰披猖棄城不守帶領兵丁迂道遁避臣見塘報隨行提督劉光弼將貳弁羈候據稱何勇已羈留吉安營陸孔已羈候提督標營後因准兵部咨該江西撫臣蔡士英題爲逆賊復破永寧等事一疏兵部議覆陸孔何勇均應戴罪剿賊俟事平另議奉有俞旨隨遵照復令貳弁隨征辦賊今據稱貳弁俱各在本營並無他往至於畢周貳弁一係提標後營千總畢汝正一係提標後營把總周鳳位向守永新賊至不行堵禦偕縣官棄城奔逃而城亦隨陷今據稱汝正見在該營保候而鳳位則存亡未知下落此查明各弁情形有如此也各弁旣司軍旅職專捍禦封境尺土皆其汛守自當用命辦賊安危與共當楚賊入境雖報勢有（下缺）

山西巡撫陳應泰揭帖順治十二年正月二十九日到本揭對同

欽差提督鴈門等關兼巡撫山西太原等處地方都察院右副都御史陳應泰爲恭報陣殺久叛渠魁仰祈睿鑒事案照滿漢官兵前在開喜絳縣稷山等處地方搜剿殺賊大捷情形該職已經具疏題報外於本年正月二十日據職轄下左營遊擊苗成龍報稱卑職屢蒙本院指示方略一面用間諜密購賊頭張五所藏巢穴一面會同夏縣知縣遲日巽平陸縣知縣崔偉併滿洲張金二章京計議分路進山搜剿間正月十七日晚據夏縣生員楊廷楠密稟有賊一股在平陸縣地方銀洞山馬家溝潛藏等情卑職隨同夏縣知縣遲日巽等會議分兵肆股於十八日二更撫標千總劉文著同哈喇章京併平陸縣知縣崔偉隨帶內丁朱得勝等領兵一股由馮莊安家莊進搜都司舊營把總金國胤領兵一股由交口河進搜百總張一威高尚忠領兵一股由杜家嶺進搜卑職同夏縣知縣遲日巽滿洲分得撥什庫金印納將材官竇之瑞領兵一股由侯家嶺進搜於十九日辰時俱至銀洞山馬家溝果有賊寇一股慌張奔逃各滿漢官兵併夏縣遲知縣內丁陳碧郭四奮勇追趕殺死賊四名用箭射死賊二名內有賊首張五髮長一尺五寸身邊搜獲偽將軍木印一顆合同文約一張上寫永曆八年奪獲張五妻一口朱氏活捉張五親孫一名張喜真兒使喚婦人一口許氏使女一口二娃子得獲腰刀三口長鎗四桿等情據此又據夏縣知縣遲日巽塘報相同據此該職看得叛渠張五嘯聚各處土寇倚恃平陽山窟作害地方已非一日去歲竟架擡雲梯攻圍夏縣又劫掠曲沃縣亦橋村燎原之勢幾不可嚮邇前此道將剿捕不力以致此寇十年逋誅而平水以南將無寧宇今蒙我皇上允職之請發城守章京趙和諾督領滿漢官兵入山搜剿節次斬獲賊二百七十餘名而招撫之數不與焉然而叛首張五一日不得則寇

患一日不除而地方終不得寧今據遊擊苗成龍知縣遲日巽塘報滿漢官兵陣斬渠魁張五於馬家溝髮長一尺五寸搜獲身帶偽將軍木印及合同文約上寫永曆八年又拿獲其妻朱氏併其親孫張喜真兒使喚婦女二口質審真確此皆仰仗我皇上威靈赫濯俾逋誅狡寇一旦授首誠三晉蒼生之福也所有行間剿賊員役如城守章京趙和諾等撫標遊擊苗成龍等夏縣知縣遲日巽等俱衝鋒涉險用間出奇戮力共事功有足錄抑職竊有請者此番賊孽剿殺殆盡而賊渠又誅卽間有一二鼠伏驚逃應責成平陽道將料理殄滅而城守章京趙和諾職標左營遊擊苗成龍亟應領兵回省以鞏重地可也既經遊擊苗成龍併夏縣知縣遲日巽塘報前來除僞印文約俟解到另文封送兵部并叛渠家口候示發落外職謹會同督臣馬鳴珮合詞具題伏乞勅下兵部查照議覆行職等遵奉施行爲此除具題外理合具揭須至揭帖者順治十二年正月日右副都御史陳應泰

兩廣總督李率泰揭帖順治十二年三月十五日到本揭對同

欽差總督兩廣等處地方軍務兼理糧餉兵部尚書兼都察院右副□□□□□塘報事順治拾壹年拾月初柒日准兵部□□平南王尙靖南王耿題前事等因奉聖旨這奏內情形着察議具奏該部知道這等本章以後密奏欽此密封到部該臣等看得平靖兩王疏稱逆賊李定國自廉犯高張月內應迎賊遊擊陳武以兵寡不能抵敵被賊殺死題報前來陳武被難情節應請勅下該督撫詳行確察具奏以便臣部議覆叛弁張月俟事平嚴行緝拏究擬具奏可也恭候命下遵奉施行順治拾壹年捌月初拾日奉聖旨依議行欽此密封到部抄疏密咨前□□□□即會同廣東撫院牌行按察司查議□□□□該司詳稱移准分守嶺西道周公軾關稱□□高州遠在天末逼邇粵西孤懸無援自西逆犯高雷廉化石一帶業已瓦解而守將張月又復內叛遊擊陳武以去歲調援化吳事畢在郡救護官印劄營黃塘叁月初肆日叛將張月帶領賊兵無數追擊該遊親領千把等官奮勇拒敵且戰且退直至黃塘東貳拾里狼韶地方維時賊兵益衆連山漫野圍困甚急該遊奮不顧身衝突拾餘次奈寡不敵衆力戰至死此不獨洪元之口鑿鑿又兵丁曹養心等自賊營逃□□稱該遊被賊重圍逼勒投降該遊奮□□□刃數賊罵聲不絕當爲亂賊所傷身□□□肇慶府抄繳西賊僞示亦有張月始終思□□迎百里同事官陳武不相爲謀卽行追斬等語此其捐生殉節確有可據者也第該遊以寡擊衆爲國忘身雖死敵死綏乃臣子致身之分而臨難不苟血灑沙場耿耿孤忠有光臣節倘蒙轉詳兩院特疏題請邀恩優卹以慰幽魂則該遊忠義不致泯沒抑亦可以激勸將來矣至叛弁張月候大兵進剿擒□□報可也今奉行查合就移覆等因到□□□□本司署司事驛傳兵巡道右叅議兼□□□□看得

遊擊陳武拾年奉調援化吳事畢駐□□郡值西逆突犯知張月素有異志該將於本年叁月初肆日帶兵并道府州縣各官劄營黃塘以圖牽制之舉詎叛弁張月卽反戈追擊賊衆兵寡至狼詔地方力戰被殺不獨逃回兵丁曹養心等威能稱述而且有僞示抄傳此其殉難大節已確有可據矣至叛弁張月大兵進剿擒獲究擬另奪可也合就詳報等因到職該職會同廣東撫臣李看得平藩下遊擊陳武調援高州值逆賊李定國舊年三月自廉□□□將張月叛城相從其時陳武首護道□□□印出城劄營黃塘拒賊力戰誓死不□□□詔地方衆寡難敵致殞厥身孤忠甚烈且有□道家丁洪元脫自賊營吐情最確所當表恤用慰忠魂者也既經該司道查勘前來理合具題伏乞勅部議覆施行爲此除具題外理合具揭須至揭帖者順治拾貳年貳月日

平南王揭帖 順治十二年四月初八日到本揭對同

平南王揭爲飛報大捷事爵等於順治十一年十二月十四日新會一戰李逆敗遁已經具題恭報外隨於十五日滿洲梅勒章京畢力兔阿兒哈蘇章京來塔梅勒章京范達禮海喇圖等統領官兵及爵下副將盛登科甲喇章京劉國保噶叭什章京徐大申等暨靖南王下各章京帶兵追至新興縣賊已去遠因馬匹瘦弱山險道窄未曾追及又一次逃選馬匹撥官兵一半蘇章京東拜等往追追至高州府我兵馬匹瘦弱賊已遠遁廣西又未曾追及不能前追遂于高州府餵養馬匹十五日于順治十二年正月二十五日自高州進發于本月二十七日自廣西扶來地方爵等會議二十九日蘇章京東拜同梅勒章京畢力兔敖拜阿兒哈蘇章京來塔梅勒章京海喇圖爵等下總兵官徐徐（疑行）成功蘇章京呂應學尙之智副將盛登科等統領除每固山留擺牙喇章京一員擺牙喇二十名外其餘擺牙喇章京擺牙喇并滿洲固山蒙古固山烏金超哈官兵一半爵等官兵一半滿洲噶叭什爵等噶叭什官兵蘇章京東拜等率領官兵自扶來前進至北流縣于二月初一日梅勒章京敖拜阿兒哈蘇章京來塔等統領滿洲噶叭什爵等噶叭什官兵八固山擺牙喇章京擺牙喇滿洲固山蒙古固山每固山章京三員兵三十名前進次後蘇章京東拜梅勒章京畢力兔等率領滿洲固山蒙古固山官兵爵等官兵隨後進行至興業縣前四十里外見有賊象一隻馬步賊兵千餘人在道傍擺列蘇章京東拜派令梅勒章京畢力兔蒙古倭攔達阿直兔等率領滿洲固山蒙古固山官兵爵等官兵分頭殺敗殺死甚多獲象一隻訊其所獲之人口稱此賊兵係李定國因僞總兵孫際昌中書楊琳等帶領馬二十餘匹逃往土司何美璜寨內李定國令僞都督吳三省總兵楊成王三才等帶馬兵四百步兵一千二百象一隻往攻

山寨賊兵纛章京東拜隨留爵等纛章京呂應學尙之智等帶兵招撫前後殺敗逃散兩傍各山賊衆如不順者卽行剿滅梅勒章京敖拜阿兒哈纛章京來塔等令噶叭什章京宋我兔阿莫兒兔爵等噶叭什章京徐大申董一奇等率領噶叭什在前噶叭什之後擺牙喇俥攔達牙賴何拜等率領每固山章京一員擺牙喇十名追及賊尾將賊尾後擺列馬步賊兵殺敗其賊老營妻子俱皆衝散噶叭什章京等擒獲賊候梅勒章京敖拜阿兒哈纛章京來塔等到齊訊其所獲之賊云李定國在前遂令噶叭什章京等率領噶叭什在前噶叭什之後前後擺牙喇俥攔達你漢牙賴索達色何拜等率領八固山章京擺牙喇擺牙喇之後梅勒章京敖拜阿兒哈纛章京來塔阿里哈超哈俥攔達巴哈他坤把土魯蒙古俥攔達夢額兔扳地率領滿洲固山蒙古固山官兵追至離橫州江這岸二十里追上李定國馬步賊兵噶叭什八固山擺牙喇阿里哈超哈分頭殺敗殺死甚多獲象二隻馬二百六十八匹李定國過了橫州江將浮橋放火燒燬敗遁而去我兵遂于這岸站住扎桴梅勒章京畢力兔等率領八固山擺牙喇滿洲蒙古固山官兵渡江由橫州城內探看賊李定國去踪行至半路因賊營逃來投誠之人云李定(圖)由賓州連夜敗去南寧府遂帶兵回營據投來賊僞總兵孫際昌中書楊琳等口稱李定國自新會敗出將肇慶府對河原扎象二隻馬兵一千八百名步兵二千二百名守高明縣馬兵四百名步兵八百名原留在高州府象一隻馬兵四百步兵一千收回至鬱林州又將苦途力小子內挑選馬兵者共計萬餘兵象三隻大兵未及趕上我等隨即逃出被殺敗之後不知多少人逃過江敗去到賓州逃回投口賊僞遊擊白長都司王之臣等口稱李定國自興業至橫州江岸又大敗遁去過了江由賓州敗往南寧府去訊李定國帶出殘賊不多因連夜敗遁不知數目南寧府卽係賊孫可望下僞都督朱養恩領兵在彼防守

自賊內投來僞總兵一員副將二員中書二員遊擊三員都司五員守備一員千總六員把總五員知縣一員州同一員主簿一員生員一員共投僞官二十八員所帶來兵伍百陸拾陸名馬柒拾肆匹杏黃大旗一桿將此降來官兵爵等分養候旨其我高明縣被陷總兵官郭虎肇慶府同知白崇周原用雷州副將先啓玉徐聞遊擊洪維新瀾洲遊擊戴榮雷州府知府閔渠黃高州府知府周禮遂溪縣知縣張開魏開平縣知縣吳爾升電白縣知縣陳之秀茂名縣知縣俞心聰陽春縣古良司巡檢劉璉署陽所千總許斌署高州府千總朱子龍署陽春縣教諭黃必春署高州府教授葉登雲俱由賊營內逃回遵勅內不得已降賊者大兵一到卽出投降降者卽皆赦免爵等會議盡尙未究廣東高雷廉三府所屬二州十縣及肇慶府屬六縣羅定州所屬二縣共計三府三州一十八縣盡皆恢復已咨付兩廣督臣李酌量安設官兵廣西橫州鬱林州北流縣興業縣容縣岑溪縣此兩州四縣已經恢復亦咨付兩廣督臣李安設文武官兵今逆賊李定國大敗已逃去逆賊孫可望賊兵所守廣西南寧府且我兵馬匹因急行前進倒斃甚多所存馬匹又皆瘦弱况雨水甚多山險路窄廣西地面人無食糧兼無餵馬之處爵等會議班師于廣東廣州府及肇慶府此二府之內酌量歇養兵馬駐扎候旨爵等伏思李逆鴟張犯我兩粵已非一日今仰仗天威迅發滿師協同爵等進剿自新一戰賊卽望風竄橫州再敗賊僅零星宵遁以數年負固之巨寇一旦勢若冰消此皆廟堂之勝算及靖南將軍籌策無遺滿洲諸將士戮力用命之所致也爵等爰藉手以告成功而已除具題外理合具揭須至揭帖者順治十二年三月初三日

平靖兩王援剿新會高明殘件

(上缺) 邑防剿情形事前來玖月貳拾伍日又據總兵郭虎總統張雷等報稱賊于貳拾壹日進窺四面攻城不利即

取青柴填濠用木牛滾青是夜又來攻城我兵燒燬將木牛并梯子打下至卯時只見賊營慌亂也有那營的也有先

走的帳房盡拆又見他挑馬賊千餘另站步賊千餘隨後不一時有馬拾匹從三洲路上飛行而來馬步賊一齊也從

此處下來各樹林俱有埋伏老營尚有幾處未動光景專聽來賊消息除啓兩王兵馬來時須要防他埋伏詭計但官

兵氣力已竭專望大兵救援等因玖月貳拾陸日又據右翼中軍副將白萬舉遊擊李崇元都司范維傑水師叅將殷

之榮西寧遊擊陳之都等報稱屢著鄉民進縣打聽消息探得有逆賊張叅將督令土賊并老本賊大約伍陸百在縣

駐劄賊船俱在城河下灣泊每船有數賊看守等情到職即與叅將殷之榮李崇元都司范維傑等商議於貳拾叁日

辰時著守備任贊西千總張進忠把總王自成馬仲才張三才楊德鳳共領兵伍百名前去羅旁與遊擊陳之都中軍

陳昇會同聚齊約至叁更時分一齊前進我官兵蜂擁兩股直奔城下壹股堵塞城門與賊對面打砲壹股河內擊船

今見獲大小賊船貳拾叁隻外燒燬打爛賊船伍隻挨次放出河口已即收拾回汛等因拾月初貳日又爲進攻江門

逆賊奔逃事准靖南平南二王咨開玖月貳拾陸日據左翼總兵官徐成功啓稱奉兩王令總統兩藩下官兵于本月

拾柒日伍鼓職親督中軍副將金有賞牛永章京張勇都司陳仲文守備楊載恩千總李景春把總劉效基代子韓得

勝同平南王下中軍副將盛登科都司曹之捷千總謝茂功張國劉光先把總陳茂德李邦奇便委把總張進忠等帶

領大砲貳拾位進攻江門賊船奈江門內河路淺窄逆賊下有木椿數層我兵大船不能進港止挑小哨船拔椿奮勇

明

青

史

科

丙編 第九本

八八七

國立中央研究院

平西王吳三桂等題本

平西王臣吳三桂定西將軍固山額真侯臣墨勒根蝦謹題爲改折萬難遵行兵食所關至重懇乞勅部早爲酌議以全士馬事本年叁月初貳日准督臣金礪備列戶部咨開撥給拾貳年分兵餉內平西王固山額真侯下官兵俸餉家口米石馬匹草料除白米照依冊開價值外粟米料豆每石應壹兩算該督又有不論地方艱苦價值貴賤俱每石撥銀壹兩勢難買供本色則此後惟有盡解折色等語准此該臣等看得米豆一項司餉者照市價召買已非一日卽各兵關支幾歷年所今若每石遽議折銀壹兩其數甚爲有限况漢中係珠桂之鄉較秦邊地方價值低昂大相逕庭各兵安能領此折色以自營生活勢必司餉衙門仍爲發糶但民間市價又復相懸顧何忍聽其減價勒買使民不堪至於失所若不發糶則銀不糶饑夫何異坐而待斃臣等因思該督謂不論地方艱苦價值貴賤俱每石撥銀壹兩勢難買供本色是誠有見於衷而知改折之不宜也明矣兵食大事臣等不敢不冒昧具陳伏乞勅下該部速行酌議庶兵民不致交受其困矣緣係改折萬難遵行兵食所關至重懇乞勅部早爲酌議以全士馬事理臣等未敢擅便爲此具本專差蝦王希賢筆帖式蘇克齋捧謹題請旨順治拾貳年叁月初柒日平西王臣吳三桂定西將軍固山額真侯臣墨勒根蝦

(硃批)該部酌議速奏

兵部題本

兵部尙書臣張秉貞等謹題爲粵西殘苦至極鎮將犒勞無資臣謹據詳文懇乞皇恩支給操賞以示鼓勵事職方清吏司案呈奉本部送兵科抄出五省經略洪承疇□□內稱臣據廣西右翼總兵官全節呈稱竊照欽定武職經費錄內開總兵官每年應得俸薪操賞詳列條款甚明本職順治捌年陸月蒙定南王委管右翼總兵官事隨具題實授於捌年拾貳月內奉旨准以都督同知充右翼總兵官拾年閏陸月內加陞右都督拾壹年貳月內加陞左都督各欽遵在案但自受事以來逐年止領阿思哈哈番俸廩從未領總兵官之俸薪并未請經費應得之操賞蓋因始則開關柳慶繼則恢復桂□戎馬驅馳敬事後食實未有暇刻呈請及再恢復西省時事少寧本職呈部補給隨奉□□劄付爲懇賜開支俸薪操賞事內開該鎮遵照經制呈請俸薪操賞前來查該鎮係右翼總兵所請俸薪操賞銀兩應咨戶部查例酌給□□拾壹年柒月拾伍日准廣西巡撫移會爲遵例請給俸薪操賞銀兩事准戶部咨開准兵部咨據提督廣西總兵官線國安呈請玖年柒月起歷過俸薪操賞等銀緣由又據定南王下右翼總兵官全節呈請捌年陸月起歷過俸薪操賞等銀緣由查得粵西定南王下官兵俱經本部按年撥給各官俸廩卽在其中何以該提翼呈稱捌玖兩年至今俱□支領相應移咨楚督廣西巡撫查明覆部以憑酌奪至操賞□□經本部咨明各督撫凡坐鎮總兵給與操賞其在行間征勦者不准支給通行在案今粵西尚未大定兵制未有成規應候兵部酌定□□議給可也等因移咨到部院轉移到職其□□俸薪本職遵奉逐月開造列明欠數聽候查算補給外止有操賞一項奉部行文間征勦者不准支給竊思總兵官之有操賞所以借朝廷之恩例以鼓舞將士激勸有功補軍費之不足必不

可少者也兼粵西營逆賊之衝逢戰守之會又值玖年變亂□破收拾兵心置辦器械萬分拮据難以備陳□於本職冰蘖自矢□兢守法身理一鎮四□蕭然自難逃□□鑒察□廣西總兵費用較安地坐鎮總兵之費用更繁而本職貧苦較他總兵之貧苦更倍無事太平之兵尙且不可不操不可不賞□□血戰之兵又安可不操不賞蒙本院部軫念粵西兵將催解餉銀糧米源源接濟兵心益堅軍聲益壯而本職身處窮困無以給賞有功無以優厚才勇無以犒勞歸誠順民義士則本職又何能隱忍不言案查經費錄總兵官左右都督除俸薪雜項外給操賞銀壹千兩其從前歷過玖年拾年操賞銀兩本職不敢瀆請補給今見拾壹年操賞銀兩伏乞移會廣西撫院照例給發併具題開銷庶軍中□用有資本職□□矢報□已等因到臣該臣看得總兵操賞銀兩原有欽頒定例經費錄內開載甚明鎮臣全節因係原定南王下右翼總兵官受事之時正值戎務倥偬之日是以從前未經派給至再次恢復西省之後始具文赴部詳□□奉部文凡坐鎮總兵給與操賞其在行間征剿者不准支給此部臣通行事例自應遵行惟是粵西荒殘至極逆賊耽耽窺犯時下戰守并急既爲行間征剿兼爲坐鎮總兵則操練犒賞比之平寧地方坐鎮總兵費用尤爲浩繁今操賞槩未給領鎮臣所稱身處窮困有功無以給賞才勇無以優厚歸誠順民義士無以犒賞皆係真切實情況本朝軍政森嚴凡坐丁占役等項槩爲裁革一兵一馬悉皆實數故於各提督總兵等官設立操賞以資鼓勵今以行間征剿總兵扣除不支是□月止有額支俸廩薪銀等項養廉尙且不□額外勢無所資必至□手因循何能隨心展布是一鎮費用似小而兵事關係甚大且近欽奉俞旨線國安准封叁等伯全節陸叁等精奇尼哈番馬雄陸貳等阿思哈哈番增給糧餉多募兵丁以壯軍威則此時廣西提督總兵及左右貳翼總兵與管轄定南王下官兵

蝦征剿兼以坐鎮與先年屬定南王旗下統轄自是不同儻蒙皇上破格鴻恩將□翼鎮臣全節應得□□銀兩自拾壹年起照經費錄事例補支拾貳年起按月(支)給領用以資煩費而濟困乏軍中實有裨益其提督總兵伯線國安左翼總兵馬雄□管轄定南王下官兵蝦李茹春俱係一體統兵□得同行議給庶足鼓勵□將官兵爲嚴疆□賴臣非不知司農告匱錢糧艱難但親在行間□見最切此項操賞實爲必用之需臣不敢不據實代陳謹會同兩廣督臣李率泰廣西撫臣今候代陳維新合詞具題伏乞皇上天恩勅下該部覆議請旨裁定行下臣等遵奉施行等因順治拾貳年貳月拾貳日奉旨該部議奏欽此欽遵抄部送司案呈到部該臣等案查操賞一項戶部題明各督撫凡□鎮總兵給與操賞其在行間征剿者不准支給通行在案今據經略輔臣洪承疇疏稱粵西荒殘之區戰守并急操練犒賞比之平寧地方坐鎮總兵猶爲浩繁請將鎮臣全節應得操賞銀兩自拾壹年起照經費錄事例補支拾貳年起按月給領并請將提督總兵伯線國安左翼總兵馬雄管轄定南王下官兵蝦李茹春一體議給操賞銀兩前來查右翼總兵全節係拾年閏陸月加右都督拾壹年貳月加□都督提督總兵伯線國安係拾年閏陸月加左都督左翼總兵馬雄係拾年閏陸月加都督同知應勅戶部查照題定□賞額例一體□給又蝦李茹春原題經費未經開載載管牛景支給操賞額例相應不准可也謹題請旨順治拾貳年叁月拾伍日兵□尙書臣張秉貞左侍郎臣覺羅科兒坤右侍郎臣額黑里左侍郎臣李呈祥右侍郎臣黃徽胤啓心郎臣介山啓心郎臣屈和尙啓心郎臣劉斗職方清吏司理事官臣韓崇進副理事官臣馬兒奇哈副理事官臣薩賽員外郎臣葉舟

(硃批)戶部確議具奏

戶部題本

少保兼太子太保戶部尚書臣交羅巴哈納等謹題爲梧州戰守兩難懇設水師以成犄角以鞏巖疆事山西清吏司案呈奉本部送准兵部密咨前事內開該兩廣總督李率奏題前事等因順治拾貳年正月初捌日奉旨兵部議奏欽此密封到部該臣等看得梧州背山面水防堵必需舟師前經鎮臣馬雄動支府庫及自捐銀米已造大小哨船拾隻召募官兵伍百餘名今該督疏稱據該鎮道議再增造船拾隻增募兵伍百名共船貳拾隻官兵壹千員名暫委標官劉陞耀統領練習俟有成效另行核叙均應如議至於水師兵餉事隸戶部船料砲藥事隸工部應勅戶工貳部議覆可也謹題請旨順治拾貳年正月貳拾伍日奉旨依議欽此又准工部密咨前事內開看得梧州府控扼奎江兩粵議設舟師誠屬緊要今據督臣李率奏疏除鎮臣馬雄先經動支府庫及自捐銀米已造哨船拾隻外復請增船拾隻并備砲藥以爲剿禦之需業經兵部議覆相應准從但查該省雖有臣部正項錢糧我朝定鼎以來從未起解該督疏請動支鹽雜貳稅及屯餘銀兩事隸戶部合請勅下戶部議覆可也既經該司案呈相應具題謹題請旨順治拾貳年貳月拾貳日奉旨依議欽此欽遵各密咨到部通送到司奉此相應議覆案呈到部該臣等看得梧州新設水師兵餉最爲喫緊據督臣李率奏原題歲需銀壹萬壹百餘兩米叁千陸百柒拾餘石相應於江南省拾貳年正賦內撥銀壹萬兩解交經略軍前轉發其米仍於江西解到廣西漕糧內動支至於添造船工料砲藥工部既稱該省雖有工部正項錢糧我朝定鼎以來從未起解該督疏請動支鹽雜稅銀及屯餘銀兩應令戶部議覆前來查造船事務緊急請勅下該督撫有工部正項錢糧儘數支用如不敷用准於鹽雜貳稅及屯餘銀兩內動支完日造冊報部銷算可也相應

平南王揭帖 順治十二年六月初六日到本揭對同

平南王靖南王揭爲殘喘幸出寇圍功罪莫逃明鑑仰祈奏請以別涇渭事順治十二年三月初九日據原任鎮守廉雷待罪總兵官郭虎啓前事內稱職自順治七年奉旨援粵以來日事疆場備嘗險阻雖有寸績微勞不足仰答王恩萬一然亦心白意真可上矢天日下諒輿情惟是舊年八月內西寇逼犯肇慶新會等處九月初六日奉王令調職協守高明此時標下官兵預已奉調分防及隨職起行馬步不過數十餘人於本月十一日至高明未及十里賊衆業已困城因探賊勢重大隨退三江口具文亟請援兵至十七日奉調惠州兵叁百名并總督兩廣都院令督陣陳守禮帶馬步百人到營職卽於是夜同衆計議已定惟慮黑夜廝殺印難隨身卽付親丁郭文船上看守至二更時分遂督兵砍進賊圍殺賊奪窰直入城內職卽議令各營將領分門防守時本營官兵分守北門復查在城官兵未及貳千土著過半及詢縣官白崇周糧料不足半月而火藥錢糧紛紛告乏兼之僞賊日衆晝夜攻打於二十二日轟城壹拾餘丈職督官兵奮勇堵截賊雖打退而圍因益迫彼時復加勸賞士卒死守孤城靜俟援兵不期至三十日午時職因無糧之故同縣官白崇周正在商議設處而死賊大隊竟從東門驟入城上官兵盡皆衝散職方拔刀接戰而左右前後俱爲逆賊裹定當斯時也職非不知城存與存城亡與亡惟念朝廷豢養洪恩未展寸報而一腔苦心不得見白於舉都人士死則徒死所以苟全性命實圖乘機報効至十二月初十日僞逆李定國慮職內應卽押發僞總兵汪大捷船上淨海長逝卽隨身帶有四人而賊衆晝夜看守總難見面淒涼之狀言難盡述至本年正月初一日舟次電白地方幸發狂風巨浪賊船遂移泊海口職見離岸不遠計裝腹痛難忍欲投海而死賊衆信以情真隨將小船送至沙洲稍容

安息職復懇求隨身數人燒湯摸腹賊亦并許時賊仍選精壯之徒數十人操戈列刃環侍左右挨至本日二更探賊睡酣即密語隨身家丁奪刀亂砍賊衆披靡就戮者十六人遂覓間道浮海港連奔五晝夜始至陽春縣腿足破爛無復人形嗟嗟當此萬死一生之地職方捨命殺賊求脫虎口則前此含忍不死之心跡夫亦昭然可白至若縣城失守一事則通賊開城及實心死守諸人今日各營逃回官兵并署縣事白崇周咸所親聞可一詢而知者職亦無庸多贅惟祈王恩鑒卑職之苦心定有罪之確案電情奏聞涇渭攸分則卑職雖死之日猶生之年矣等情到爵等據此該爵等看得去年九月間原遣總兵官郭虎帶領官兵策援高明時賊圍甚密虎等衝入城中戮力固守奈因惠州營千總紀大良等通賊入城以致失陷虎爲賊所執猶遣人密通消息於爵等既復設計泊船上涯手殺押送之賊徒步遁回其意良足矜原矣論功論罪恩典出自朝廷爵等何敢置喙伏覩靖南將軍朱嗎喇等原奉勅諭內有先被賊脅從聞大兵一至即時迎降者皆赦之謹此具陳仰祈皇上鑒察其始終一應情節容俟督撫二臣查明題報至於通賊紀大良等現在督臣李率泰拘禁候審另結并同時往援遊擊杜豹張雷等俱爲賊陷存亡未知下落俟容另疏具奏除具題外理合具揭須至揭帖者順治十二年四月二十八日

平南王揭帖 順治十二年六月初六日到本揭對同

平南王靖南王揭爲泣陳勢窮情節用明心跡懇恩垂鑒死有餘榮事本年正月初一日據原任雷州副將待罪先啓玉啓前事內稱玉自叨江西虔院中軍後卽有金王之變保固贛城心枯血盡不敢言勞一點忠肝或蒙垂鑒追隨兩王入粵稟成指授方略親冒矢石極力進攻於萬死之中僅博性命開取省城薄効微績又不庸贅及征下四府奪欽廉防守等處擒李元胤李建捷周朝等賊玉奮不顧身惟盡忠肝此皆靖南王目擊曾無一言假飾其後協鎮雷州王鄧悍逆之徒臨荒榛不關之地募兵足額露肘捉襟長年戰剿日無寧刻雖錢糧未足猶搜括簪珥首飾之類接濟餓兵設法鼓勵已無餘力不意上年六月突有化石之變肇慶之犯中途隔絕聲援不通彼時僞爵鎮周金湯葉標施尙義熊朝佐王翰鄧耀等兵稱數萬玉奮一旅饑兵捨死擁命爲撲滅此時此地與此心自可鑒諸天地豈能逃王電照本年三月初一日玉遵王諭赴省曾經府縣官閱渠黃等具啓苦留鎮壓可爲實據玉以義不可留決意長行出城三十餘里忽聞亂起倉卒迅雷未及掩耳始知石城郭總兵見賊而去高州失守賊隨直過遂溪逼壓雷城較之去歲勢焰不啻天淵玉雖有金城湯池強兵足食尙不能支方張之寇况以孤城餒卒能作天淵之敵乎六月間已密遣土著兵楊喜繞道潛通差官孫國輔備將此情轉爲啓報未識得達王前否惟是玉以未死之身苟延一日實切一日雲霓之望仰賴兩王威福彌隆一鼓而殲此勁賊不但普天同慶卽玉之鬱勤愚忱忽爾頓申旋即收歛餘兵退伏山林靜聽王師至止玉固罪深難贖然而一片痴忠無異嬰兒之望慈母竊計使功使過亦曾見之古人而轉敗爲功玉可圖於今日仰懇垂察勢窮力竭萬不得已之情少寬誅戮勉効桑榆啓玉可勝感激等情到爵等該爵等看得副將先啓

抄白僞恢討左將軍等僞啓

啓國主御前本月十五日接捧令旨一道臣跪拜開讀後卽遵旨差了兩箇辰州不要緊的人名張三佑胡六賞了些路費并將胡茂禎令旨一道囑令他扮作客人密藏在身潛往常德相機密投與胡茂禎看他光景何如就叫他探下面的實消息但辰州這邊通常德的道路難走臣打發他二人從益陽走龍陽過河徑到常德限他一月回報已于本月十八日自辰州府起身下去俟回日看有情形又另具啓九月十九日封進

啓國主御前前九月內奉旨命臣將胡茂禎令旨一道叫人潛往常德密投與他臣于九月十八日差張三佑等密持前去已具啓過因臣有鎮標遊擊薛崇士原係益陽人界連常德臣先打發他回去探聽常德虜情未回時張三佑徑到薛崇士道其情由彼遂與常德唐鄉官議行此事今據薛崇士來報云腿痛難行先發家人鄭國良于本月初三日到辰州府回話備言胡茂禎有歸順之意大略情形俱載報內臣不敢贅今將原報封進御覽以慰聖懷俟薛崇士到營之日再問的實情形另又啓聞十二月初五日啓

啓國主殿下有援剿左將軍臣盧標下遊擊薛崇士所報捧旨招撫常德胡茂禎情由前已具啓過今薛崇士于本月廿一日回到辰州臣等面問情形據云伊姪曹宗伯前捧旨密交與胡茂禎標官劉應祥係曹宗伯姪婿有應祥交旨後隨送薛崇士白驕馬一匹轉託曹宗伯來回話備述胡茂禎云他不會寫字不便回本若叫人寫恐洩漏機關又蹈當日申家黃大廳的故事只待大師到常德我不打仗就順只叫薛副總莫悞了我的性命等語今胡茂禎家眷已接到襄陽不日到常德又探得常德城內楊家名下有兩個姓張姓王的官託唐鄉官說大師一到我就將布吊下城來

歸順只不要殺我就好了如今城內願來者多且下面鄉紳士庶皆有思漢之念常德城內除原舊李楊幾家說又添有六七百兵馬有四五千洪會尙駐長沙兵有六七千馬有一萬常調各處兵馬以張聲勢又薛崇士在下面聯絡些義兵進有千餘只候大師東下便呼集招來以圖策効等語據此啓聞十二月二十二日啓

啓國主殿下今據參將薛崇士名下義將吳孔珍曹宗允黃明選朱元詔等屢報胡茂禎實欲投誠只候大師抵常兼楊遇明奉洪會調去是實常虜只有六七千倘若大師不下恐失此機會等情臣等看得此情如今春水泛漲正是用兵時候以臣等愚見莫若趁此進發臣等一面差鄭國良去討胡茂禎消息一面請乞勅示倘若胡茂禎實有此意懇乞再添武安營正兵前營臣兩人引着各營兵馬水旱兩路並下前往桃源地方離常數十里上觀其動靜只當撤塘一回荷蒙俞允乞再頒溫諭令旨一道臣等差人賫捧前去與胡茂禎臣今差官王佑賫本面啓伏候旨下四月初二

日啓

臣等謹將胡茂禎等情具奏伏乞聖鑒訓示謹奏

臣等謹將胡茂禎等情具奏伏乞聖鑒訓示謹奏

臣等謹將胡茂禎等情具奏伏乞聖鑒訓示謹奏

兩廣總督李率奏揭帖順治十一年六月十一日到

欽差總督兩廣等處地方軍務兼理糧餉兵部尚書兼都察院右副都御史李○粵寇東西並急粵兵單弱難支仰請皇上亟賜裁酌以拯危疆事順治十二年四月初五日准兵部咨該廣東巡撫李題前事奉旨着察議密奏兵部知道欽此密封到部該臣等看得撫臣李疏稱閩賊已到詔安西逆復○高明東西交訖計今大兵抵省應勅兩藩及該督撫會同領兵固山額真等視勢緩急共商方略分援合剿務中機宜共奏蕩平其高明失陷情形文武官印下落仍行該督撫查明奏報可也順治十一年十二月十三日具題奉旨依議速行欽此密封到部密咨前來准此除將○寇情由移會兩王及靖南將軍并廣東撫院○商方略分援合剿外該職會同廣東撫臣李看得去年高明之失今查被陷情形其當日撥守東北窰口者則千總紀大良守南面者則把總呂得勝也及東門竟開賊從而入大良等通逆之罪可勝誅哉既陷之後李逆賞功大良以袍得勝以帽而把總孫國寶與紀大良又講功于李逆之前今據總兵郭虎等供吐鑿鑿其有功于賊則負罪于國情迹固昭昭矣紀大良三犯職即發按察司監候審擬若郭虎者聞城陷之際欲抽刀自刎若非叛將先啓玉急於抱救亦即與城俱亡矣遭○各官被殺者則有叅將張雷遊擊杜豹陳三○拜塔喇布勒哈番陳守禮會大名其署縣印同知白崇周同守禮被賊繫縛所未殺者亦倖耳今見在武職則有總兵郭虎郭正玉張郡文官則白崇周署典史丁旭與聞說逃回見行提審則都司葉得魁也其餘守千把總李光顯楊威徐必俊張龍楊士雄李先勝董學禮朱得功會魁等查俱未知存亡內郭虎原領雷廉總兵關防先付家丁收存繳司因新題高雷廉總兵栗養志領兵進取業發收用其高明印信則署縣同知白崇周呈稱印藏在身被賊綁時已經搶去除將

各官押發按察司羈口外謹將各官職名并印信下落理合具題伏乞勅部覆議行職等遵奉仍懇補鑄高明縣印信
施行爲此除具題外理合具揭須至揭帖者順治拾貳年伍月日

臣等查得該部奏稱該縣印信模糊難辨請行補鑄等因臣等查該縣印信模糊難辨請行補鑄等因臣等查該縣印信模糊難辨請行補鑄等因
臣等查得該部奏稱該縣印信模糊難辨請行補鑄等因臣等查該縣印信模糊難辨請行補鑄等因臣等查該縣印信模糊難辨請行補鑄等因
臣等查得該部奏稱該縣印信模糊難辨請行補鑄等因臣等查該縣印信模糊難辨請行補鑄等因臣等查該縣印信模糊難辨請行補鑄等因
臣等查得該部奏稱該縣印信模糊難辨請行補鑄等因臣等查該縣印信模糊難辨請行補鑄等因臣等查該縣印信模糊難辨請行補鑄等因
臣等查得該部奏稱該縣印信模糊難辨請行補鑄等因臣等查該縣印信模糊難辨請行補鑄等因臣等查該縣印信模糊難辨請行補鑄等因
臣等查得該部奏稱該縣印信模糊難辨請行補鑄等因臣等查該縣印信模糊難辨請行補鑄等因臣等查該縣印信模糊難辨請行補鑄等因
臣等查得該部奏稱該縣印信模糊難辨請行補鑄等因臣等查該縣印信模糊難辨請行補鑄等因臣等查該縣印信模糊難辨請行補鑄等因
臣等查得該部奏稱該縣印信模糊難辨請行補鑄等因臣等查該縣印信模糊難辨請行補鑄等因臣等查該縣印信模糊難辨請行補鑄等因
臣等查得該部奏稱該縣印信模糊難辨請行補鑄等因臣等查該縣印信模糊難辨請行補鑄等因臣等查該縣印信模糊難辨請行補鑄等因

順治拾貳年五月十一日

靖南王耿揭帖順治十二年八月十九日到本揭對同

靖南王耿揭爲藩父旅櫬難安勢須藩母扶歸仰祈睿鑒以廣孝治事竊念藩父自航海歸誠過蒙先帝寵遇叨沐藩封續于順治六年奉命恢粵十一月師次吉安藩父遽爾不祿時本藩哀毀無地祇以王事在身一切喪禮未遑舉行迨粵東粗定始將父柩搬至省城朝夕瞻依少伸孺慕無何疆場多故日事馳驅以致藩父卜葬無期藩實痛之屢擬歸櫬都門恐無隙地因思遼左蓋州地名馬蘭峪者先世之墳墓在焉若得附葬其傍當亦藩父九原之所深願也但本藩身在行間不克萬里扶櫬而藩子精忠昭忠業已入侍輦轂計惟藩母可以扶歸乃藩母年已及暮夕照如飛卽晨昏定省猶虞子職難全何忍易離膝下而特以藩父之故間關迢遞卽藩母亦有不能自忍者此本藩所以于萬難離別中不得不抑情而伸義也獨是藩母此行護送或衆雖遼城之內先人之敝廬猶有存者至所遺田土無多尙有餘丁耕種尤恐舊業難贖伏乞皇恩勅賜閒田俾得力作以足其食是藩父得安首丘皆我皇上天高地厚之恩存歿均頂誦于無量矣爲此除具奏外理合具揭須至揭帖者順治十二年六月二十九日

平西王吳三桂殘題本

(上缺)屯耕根本既□□□□□□□□皆有其基而接濟亦可資一臂□□□□□□亦可守戰亦能戰握運既深於是乃操必勝□權漸言恢拓始稱一勞永逸之計茲將在川各鎮官兵臣願統領前驅進取成都嘉定以立良圖收服之後如命臣共守則臣下官兵家口應移入成都如命撫臣固守聽撫臣自行料理撤臣帶臣下官兵回漢至於糧糶一項師行必先成都賊屯亦自有限止嘉定洪雅夾江峨嵋肆處略有人民少□接濟不足者應并聽督撫召買靴□□□□及責在督撫若謂慢言駐鎮□□□□□□算然封疆所關重大進止統□上裁并請勅下議政大臣將臣所奏機宜蚤定廷議行臣遵奉臣一得之愚思所以報國恩者如此儻或有所見不同是在固山額真侯墨勒根蝦督臣金礪撫臣李國英會同議奏抑臣更有說焉按撫臣疏言有同諸鎮漸次恢拓得寸守寸得尺守尺此誠仰副廟堂倚任若果能之臣亦爲我皇上封疆慶幸加額靡遑檮櫟如臣僑住漢中亦□臣分所宜目今南方多事狡寇狂□□□□乃克挫銳當此炎熱潮濕之□□□□□□儻蒙皇上不以臣爲無用特予一面之寄臣卽拂湯蹈火復何敢辭儻若□□利守不固臣自甘罪譴此又臣圖報一段忠悃統乞睿鑒施行緣係遵旨陳言事理臣未敢擅便爲此具本專差蝦線維明于亮齋捧謹題請旨順治拾貳年柒月拾貳日平西王臣吳三桂

(貼黃)平西王臣吳三桂謹題爲遵旨陳言事本年柒月初伍日准兵部咨前事到臣爲照進取成都之議該臣於拾年正月內議奏督臣孟喬芳爲亟定戰守之著一疏臣蚤已見及之有欲爲收服之圖須於成都省會之區首立根本設以重兵等議業奉有覽王所奏成都設以重兵有賊拒戰無賊則耕根本既立庶可漸次進取真爲國家久遠之計

說得是但大兵駐劄成都路遠民稀錢糧轉運維艱著王暫回漢中王下四城壯丁移至沔縣一帶分駐之旨臣是以駐劄漢中待上命而動近閱撫臣疏內忽云封疆之臣畏難避苦之言臣蓋不能無說焉憶臣於保寧殺賊之後首議進取成都以爲根本者臣也夫以臣言之於前而撫臣襲之於後是發臣之已發也而更作模稜之語蓋非所以律臣耳畏避等論不知其意何居臣今請以進取之局言之議取必先議守決戰必先決勝非有確然不易之算未足底績於有成否則即如前此兩動王師究無奠安之效一悞不容再悞豈可慢嘗臣愚以爲進則必如臣前所言先以成都爲根本根本既立即後來進取滇黔皆有其基而接濟亦可資一臂之力如此則守亦可守戰亦能戰握運既深於是漸言恢拓始稱一勞永逸茲將在川各鎮官兵臣願統領前驅進取成都嘉定收服之後如命臣共守則臣下官兵家口應移入成都如命撫臣固守聽撫臣自行料理撤臣帶臣下官兵回漢至糧糶一項師行必先成都賊屯有限止嘉定洪雅夾江峨嵋略有人民少可接濟不足者應聽督撫召買輓運如接濟不及責在督撫若謂慢言駐鎮保寧一隅恐非得算然封疆所□重大進止統候上裁并請勅下議政大臣將臣所奏機宜蚤定廷議行臣遵奉臣一得之愚思所以□國恩者如此儻或有所見不同是□□□□□侯墨勒根蝦督臣金礪撫臣李□□□□奏抑臣更有說焉按撫臣疏言有□□□□□拓此誠仰副廟堂倚任臣亦爲我皇上封疆慶幸樗櫟如臣僑駐漢中□□□□□目今南方多事狡寇狂逞屢勞□□□□□當此炎熱潮濕之鄉臣實有所□□□□皇上不以臣爲無用特予一面之寄臣何敢辭儻若戰□□□□□甘罪隴此又臣圖報一段□□□容鑒施行緣係遵旨陳言事理臣未敢擅便爲此具□□□

湖廣巡撫林天擎題本

欽差巡撫湖廣等處地方兼提督軍務都察院右僉都御史林天擎謹題爲屬郡送到自稱定藩世子識認難確等事順治貳年柒月拾肆日准經略輔臣洪承疇咨開本院部密題前事業已具揭帖移送貴院知會訖查疏內開查漢陽府見住有王旗下官兵家口內有定藩宮眷親屬又有阿達哈哈番孫守功在彼看家今自稱世子毋論真似必然送京查認應經過湖廣省城對江即是漢陽府正可就近一認更爲便宜真切臣卽選差隨征拖沙喇哈番王茂才防護伴送時下督臣祖澤遠恐公出荊州隨移會撫臣林天擎俟自稱世子到武昌傳知看家官孫守功轉報定藩宮眷親屬共相識認卽將認過情節聽撫臣再自具疏題報仍添差官員同臣差官護送赴京聽候廟堂認確定奪除密題移揭外相應咨會等因到臣而王茂才防護自稱小王子卽於本日隨到漢陽府時督臣出巡荊州臣當行令漢陽府知府丘俊孫與通判徐祚煥會同定藩看家章京阿達哈哈番孫守功傳知親信眷屬共相認識真僞確報去後至拾伍日早據阿達哈哈番孫守功蝦萬象新王朝會報爲呈報真僞等情事內開於拾肆日午刻自稱小王子住居公館未刻守功同小王子親眷伯母陳門王氏姨爹陳玳姨娘陳門白氏帶侍奉太監乾柴兒侍女姜大姐春梅等一齊進見坐居兩地約有百餘人彼時觀看不能守功及親眷侍女不識此人卽此人亦不識伯母姨娘侍女之一人也其親眷同宮女隨細問當日宮內情形一毫不知又將衣服脫開自頭至手手而至背全無些小王爺之生成記號也彼時天色已暮真僞尙在狐疑今早又仍同親眷侍女再三推究當日宮內事件及難別情節則言詞不一脫身再觀仍復如此種種因由毫無一是而虛僞之情又敗且露矣又據漢陽府知府丘俊孫通判徐祚煥稟報相同臣思原日親

信眷屬及伏侍多人彼此相對竟無一識則假冒已不待再問但事不厭詳細又行孫守功傳問親眷伏侍舊人此僧已非小王子其小王子有何疤瘡相別可爲實據隨據孫守功回稱小王爺向因瘋恙燒艾醫治頭頂上有壹艾疤眉心有壹艾疤嘴上有肆艾疤兩耳有兩艾疤尾節骨上有壹艾疤後頸窩艾疤壹處手灣有一黑痣未記左右其艾疤俱係小王爺伯母陳門王氏在遼東親燒之疤今伯母再三復看從頭至足毫無影跡而虛僞之情又更彰彰較著等情據此該臣看得自稱定藩小王子先在長沙經略輔臣已知其非但彼中無原日親近之人識認莫可爲憑今到漢陽灸艾之伯母王氏至親姨娘白氏長隨乾柴兒與自幼侍女姜大姐春梅等多人細認無一相識雖幼年面目或有長破而艾疤終身不變相別僅有三載即多人不認幼年之貌而當日相別已拾有貳歲未有不記得親屬一人之理且宮內事件難離情節一毫不知其假冒更無可疑矣再行根究俛首無言惟稱求見皇上甘心謹添差官李開先隨王茂才護送進京併將親眷認過情由據實密題仰乞睿鑒勅部覆議請旨施行緣係屬郡送到自稱定藩世子識認難確等事理臣未敢擅便爲此具本專差官李開先齎捧謹題請旨順治拾貳年柒月拾捌日巡撫湖廣等處地方兼提督軍務都察院右僉都御史臣林天聲

(硃批)已有旨了三法司知道

部題楚督請催江浙完解協濟楚餉殘件

(下缺)兩猶不足拾分之貳若兩浙之新餉貳拾萬兩鳳淮等肆府之新餉陸萬叁千柒百肆拾餘兩揚州府屬之新餉肆萬捌千叁百叁拾餘兩俱查無影響豈按兵撥餉爲計口授食之需而以有名無實之虛數胡以濟按月支放之實用也今查湖南之民賦已奉本部院就近兌撥各制營官兵俸餉再查湖北之民賦鄖陽以邊地荒殘徵解無出荆襄以兵馬駐劄酬應不敷僅武漢黃安德等府額徵之民賦有限料草之供應無窮且解協荆澧之夫船與採買湖南不產之料豆計其解過之銀與撥給之數是拾貳年之正供將盡司庫之收貯無餘以此思之豈塵可飯乎塗可羹乎而三軍不虞其庚癸之呼也豈神爲輸乎鬼爲運乎而司庫不患有不足之憂也屈而指之已捌月秋中矣以江南等處之距楚非止千里之遙可以朝呼而夕應者況荆長各營之邊餉非止一旅之卒可千百而取盈者以歲計之轉盼歲云暮矣以本省之錢穀計之目前搜括窮矣此時協餉不至何以濟三軍之實用哉切恐粉本司之身碎本司之骨僅本司一身一家之利害曾何益於軍需國計之毫末耶本司已陳請至再矣計無復之矣不得不仍望本部院而備極呼籲也等因到臣該臣看得部撥各省協濟銀兩皆各兵計口授食按月支應之急需蓋刻不容緩而亦當源源解濟無容催取者也今時已仲秋轉盼歲暮乃拾壹年分協楚舊餉浙江尙欠柒萬江南尙欠拾萬其該省延玩之極與楚兵盼望之苦似亦不待臣言之贅者至於新撥之餉江西拾貳萬壹千兩已於陸月貳拾貳日如數全完若江南拾貳年正賦銀伍拾萬兩又南糧改折銀叁萬兩共伍拾叁萬僅解拾壹萬其餘肆拾貳萬與浙江拾貳年正賦銀貳拾玖萬陸千玖百有奇竟不知起解何日若兩浙鹽課貳拾萬兩以及鳳淮徐揚肆府州陸捌兩年漕折銀陸萬叁千柒

百有奇又揚州府屬拾壹年分漕折銀肆萬捌千叁百有奇迄今俱分文無解夫歲撥僅壹百貳拾陸萬輒欠有壹百零貳萬玖千之多豈司餉者真點金可應而荷戈者風露可療饑乎況楚省正事勤兵以數萬兵馬托命於臣一人之身且滿旅駐楚供應尤不敢缺又況制兵之呼索不已萬有他虞谷將誰諉乎文催差催而延玩如故臣亦窮於法矣計惟有仰天控籲空據此萬不得已之苦衷耳伏乞皇上勅部速議併乞嚴行各督撫將悞餉各官指名叅究仍將新舊兩餉勒限盡數完解庶三軍得資飽騰以張撻伐而臣亦可少蘇襟肘捉露之苦矣臣謹會同撫臣林天肇治臣胡全才偏臣袁廓宇合詞具題伏乞上鑒施行爲此具本謹題請旨順治拾貳年捌月貳拾日題玖月初玖日奉旨該部速議具奏欽此欽遵抄出到部送司奉此相應議覆案呈到部該臣等查得江浙協濟楚餉刻不容緩臣部業經題請勅下各該督撫嚴催起解如再遲延不完即將經管職名指名叅處并題准每省差官壹名嚴催去訖今雖續准浙撫咨報起解過正賦柒萬兩鹽課拾萬兩其江浙貳省未完楚餉尙多以致楚督題請前來合請勅下江南總督浙江督撫各將未完楚餉勒令藩司等官盡數解楚以濟軍需如再延挨不完該督撫即將經徵各官指名題叅以憑從重議處如該督撫不能督催完解瞻狗不叅臣部將該督撫指名叅處以重軍需可也相應具覆恭候命下臣部轉行遵奉施行臣等未敢擅便謹題請旨（下缺）

戶部題本

少保兼太子太保戶部尚書臣交羅郎丘等謹題爲懇恩請討俸米以資養贍事據定南王下阿思哈哈番徐元勳阿達哈哈番劉明忠等呈前事內稱切照卑職等於順治拾壹年陸月內具題奉旨隨王靈郡主進京兵丁月餉家口米糧當蒙大部題請賞給卑職等各官蝦止領俸餉銀兩并家口米糧其應領俸米尙未給與至今貳載家口嗷嗷待哺養贍不敷切思寒舟蹇遭顛沛傾家資囊罄盡未免啼饑號寒若不討給俸米將何養贍餘生萬不得已懇乞洪慈雖無舊例憫念失家之苦難廣沛皇恩賞給俸米庶家口以活生命有賴而各官蝦均沾再造之洪恩矣等因具呈到部該臣部查得先經題定凡在各省居住竝無種地官員兵丁調取進京來者若固山額真等官家口陸拾名口梅勒章京等官家口肆拾名口甲喇章京等官家口叁拾伍名口牛泉章京等官并閑官家口叁拾名口兵丁人役家口拾名口給與口糧如給與地畝承種之後將家口糧米裁革如官員應照品級給與俸祿兵丁應照數給發錢糧米石而定南王下官員兵丁因其蹇遭苦難已經題定不論等第查其見在家口若干按月於京倉支給糧米今該臣部議得相應照定例不准給發俸米應俟給地承種之後將口糧裁革若官員照品級給與俸米若兵丁照甲分給錢糧可也臣等未敢擅便謹題請旨順治拾貳年拾月初捌日少保兼太子太保戶部尚書臣交羅郎丘尚書臣戴明說左侍郎臣王弘祚右侍郎臣交羅耳得啓心郎臣巴格

(硃批)依議